

فيها حاجة درنشة



فيها حاجة درنشة



تويا
دار لوجيا للتقنة والتوزيع

سارة الذهبى

فِيهَا حَاجَةٌ حَرِشَةٌ

"الجراديويشن سيرموني"

ألو معايا أ/ عادل والد الطفل مازن؟

- أيوه يا فندم.. مين معايا؟

أنا تيتشر مُنى من مدرسة مازن..

- أهلاً بحضرتك، خير.. مازن كويس؟

Mazen is very well, don't worry

- أؤمري؟

كونجراتوليشن يا فندم.. ابن حضرتك اتخرّج من **كي جي تو** ...

- آه مامته قالتلي، خير إن شاء الله؟

إحنا so proud إن مازن .. did it

- وإحنا براود على الآخر إنه خرج من مرحلة عُنق الزجاجة ومبسوطين

إن مازن did it بس يا رب ميكونش وسخلكوا المدرسة...

إحنا بس كنا بن- communicate مع ال- parents عشان نقولهم على ال-

graduation ceremony اللي هيتعمل للولاد..

- سيرموني!! مش دي بتعمل للعيلة المالكة على حدّ علمي!!!

لا يا فندم هههههههه، دي بنعملها للولاد عشان نقولهم good job..

- تمام، طيب ما تعملوها!!

طيب هحتاج من حضرتك تشرّفنا في المدرسة عشان تدفع لنا fees

ال- graduation ceremony ... هو مبلغ رمزي..

- لو كده ممكن أبعته مع الولد عشان مشغول؟

لأ، حضرتك ممكن الولد يضيّع ال- 1000 جنيه بتوع ال- ceremony

ومياخدش باله!!

- 1000 جنيه؟!!!

آه يا فندم... وفي 400 جنيه للروب اللي هيلبسه.

- روب إيه؟!! ده كله على بعضه 50 سم !!

أنا اتخرّجت واشتغلت مُعيد في الكلية وكنت مآجر الروب حضرتك!!! يبقى هشتريه لمارن بأمارة إيه؟ !

- وفي بس 200 جنيه للكاب بتاع الجراديوشن..
- حضرتك قصدك الزعبوط الأسود اللي شبه بتاع ساحر السيرك ده؟ !!
- آه يا فندم حاجة زي كده..
- البتاع ده بـ 200 جنيه؟!!
- آه يا فندم عشان كوالتي تعيش العمر كله، وحببت أفكر حضرتك إن في parents بيحبوا gifts لل teachers يشكروهم على مجهودهم ويقولولهم good job...
وإن في parents بيحبوا هدايا لل- students التانيين عشان يقولولهم good job..
وبيحبوا للإدارة عشان يقولولهم good job..
- حضرتك هو أنا متعهدّ الـ good job عندكوا واللا إيه؟ !!
ما هو ده دور المدرسين!! وأنا دافع آلافات عشان يعملوا الـ good job ده من غير ما أجيلهم هدية تقولهم good job!!!!
- أوك يا فندم.. هنستنى حضرتك والأسرة تشرفونا يوم الخميس الجاي بس أفكر حضرتك إن كل فرد هيجي هيدخل بـ 100 جنيه..
وفي 100 جنيه fireworks وبابلز للأطفال.. عشان يفرحوا..
- طيب مغيث هابي ميل وزنجر سوبريم لبابا وماما؟
- لو تحب يا فندم فيه بس ندفع 300 جنيه ههههههههههه
- يعني حضرتك الليلة دي داخلها في كام كده شاكب راكب؟
- ليلة؟! وشاكب راكب؟!!! تقريبا two thousands and half أو three

.. thousands كده ..

- توو تاوزند أند هااااف أو ثري تاوزندز!!!!!! عشان أقول لواد لسه

قالع البامبرز ولسه سايب البرونة من سنتين good job ..

ده أنا ممكن أزود عليهم تو تاوزند كمان وأدفعله قسط عربيّة!!

عامّة مُتشكر جدّا على وقت حضرتك ويا ريت تجهزولي ملف الولد عشان هاجي

أخده بكرة وأنا بشتري طرطور السيرموني والإسدال بتاع الجرايدويشن.. ولو في

هدوم مش نضيفة لما he did it يا ريت تحطوهالي في كيس أرجعهم للمدام

تنصفهم !!!

" الكتالوج العصري للراجل المصري "

• إنسان مقضيّ حياته بخمس تي شيرتات وبنطلون جينز وكوتشي و30 شرايات وبقاله كده 30 سنة, **فا متستينيش** منه يلفّ معاكي على محلات, هو لو يطول يقولك ملعون أبو الشوينج على المولات كان قالها, بس هو خايف عليك من أثر الصدمة.

هو أصلًا شايف كمية اللبس اللي عندك والشنط والجزم دي سفه مُمكن يتاجر بيهم وتقبّوا على وش الدنيا بقى, يعني مش هيصعب عليه إنك معندكيش باليرينا فيها نفس درجة الشنطة.. هيبصلك بمنتهى الاحتقار.. ما تعصبيهوش وهاتي باليرينا من وراه...

• إنسان بسيط جدّا كل درجات الألوان عنده تتلخص في أبيض وأسود وأزرق وأخضر,

مالوش بقى في قاموس الألوان اللي إنتي نازلاله بيه ده. أكرملك ما تسألبيهوش

تفتكر البينك أحلى واللا البربل واللا الكافيه أوليه، هو غالبًا هيقولك كلهم حلوين ولو ربنا كرمه واختار لون فا وغلاوتك هو قال أسهل لون عرف ينطقه مش أكثر ولا أقل.. ولما تلبسيه في البيت هيقولك مين اللي اختارك اللون العجيب ده.. اسألني منها أنتيمتك على الألوان عشان تفيدك..

- إنسان متصالح مع نفسه مش بيركز مع ستاتس صحابه ولا بياخد الكلام على نفسه, ولا ليهم في جو الخرزة الزرقا والحسد والعين. لو العربية اتدشدهت ما يقولش أصل محمود ركب معايا وحسدني. ولا هيفضح محمود واللي جابه ويجرسه على الفيس بوك زي ناس نعرفهم كويس!
- ما تسألهموش أسئلة محرجة زي تحب تيجي معايا عند ماما واللا تنزل تخرج مع صحابك...؟

بيني وبينك السؤال ده ما يتسألش. إجابته لا يختلف عليها راجلين على وجه الكوكب ده..

ومش هفسر أكثر من كده.. يا رب تكوني فهمتي..

- لو قالك مبيحبش السوشي أو التشاينيز فوود أو الهندي أو أي حاجة ما تحاوليش معاه لأنه مش هيجبها لو كلها من إيدك برضه.. هتترمي فا خليك في الخضار باللحمة.. سهل ولذيذ واتهرس مليون مرة.
- لو بتعمليله تاج ومش بيعبرك... إوعي تخرجي نفسك تاني بطلي جو الـ 5000 مينشن.. مش هيرد, طلعيه من دماغك واعملي تاج لدينا صاحبتك هترد في ثابتهها..

- لو بيجبلك هدية في الفلانتين.. فا هو مش مقتنع.

لو بيجبلك هدية في عيد جوازكوا، فا هو مش مقتنع؛

لو بيديك عيديه فا هو مش مقتنع؛

بس بيرجحك وبيرحم نفسه من بوز يُقدر بـ 7 متر وصلاحيته لمدة 3 سنين قابلة للتجديد !

- مفيش راجل يفهم التحوير بتاعنا..

اللي هو إنتا مش بتخرجني خالص وإنت مش بتحبني. الكلام اللي في المطلق ده هيوديكوا سكة اللي يروح ما يرجعش ! هيقولك ما أنا خرجتك يوم الخميس 2 يوليو سنة 2015 الساعة 8 بالليل وروحنا سينما وكلتي من كنتاكي دينر بوكس وجبتك كولسلو.. فا خليك دوغري.

- لو قولتي لجوزك مالك وقالك ولا حاجة, سيبه براحتة هو مش زينا بيعوز حد يتحايل عليه بدل المرة ألف.. هو بجد مش عايز يتكلم!
- الرجالة ملهمش في جو التصوير كل دقيقتين بتاعنا ده, هو لو اتصور بيبقى من غلبه وعشان تنزلي من على ودنه مش عشان حب التصوير فجأة.
- بلاش سيلفي مع راجل. مش هتعجبك النتيجة. مش هيعمل بوز البطة ولو عمله هيبقى بوز الديناصور.. بلاش أحسن..
- مفيش راجل بيموت في الزيارات العائلية زي ما إنتي فاكهه.. دي مجاملات.
- مفيش راجل بيحب المفاجآت, الرجالة مش بتحب الورد.. الرجالة مش بتحب جو العيد ميلادات ولا أي احتفالات.. الكب كيك بيعصه خليك يفاكرة النقطة دي كويس!..
- الراجل مالوش في جو السيربرايز بارتي ولا إنك تجيبيله تورته ويهف في الشمع وأقسمك بالله العظيم تلاتة مفيش راجل بيحب يجيب دباديب ولا يتجابهه دباديب !
- الراجل ممكن ما يركزش لو حاجة مش نضيفة, بس كله كوم والعربية كوم. اعتبري نفسك قاعدة في **حضانة** أطفال رضع ولو قدرتي تلبسي كيس بلاستيك فوق الجزمة إلبسي.. هيجبك **أوي** .. إوعي تاكلي أو تشربي فيها... برضه هيجبك أووووي.
- مفيش راجل بيحب الرغي, ما تستنيش منه يبجي يقولك كلت إيه وشربت إيه وعملت كذا في الخروجة.. دي حركاتنا إحنا بالنسبة للرجالة.. الحمد لله ده أجمل رد لكل حاجة.. كلهم كده.
- مش هيفرق مع راجل إن منة حامل أو إن ميار سابت شغلها.. أو ضربت مديريتها وجابتها من شعرها... كل ده بالنسباله هري..
- أكبر جميلة تعملها لراجل سيبه نايم على السرير وإيدله الريموت واشتركيه في البي إن سيورتنس, دي بالنسباله هتفرحه نفس فرحتك لو وداكي المالديف في فندق 7 ستارز!
- الراجل وهو مهاجر ممكن يحط هدومه كلها وجزومه في كيس بلاستيك من بتوع كارفور.. إنتي اللي بتاخدي الوزن كله.. ما تحوريش! فا لو طالعين الساحل ممكن يكون حاطط لبسه في جيب البنطلون... إنتي اللي ممرمطاه في الشنط والشيل والحط !
- أبووون... خروجة صحابه أجدع عنده من الخروج مع صحباتك المتجوزين وأجوازهم مليار مرة... تعايشي وبطلني زن.
- الرجالة مالهومش في التواريخ.. فاكر أول يوم اتقابلنا كان كام ميلادي؟ وأول يوم اتخانقنا كان كام هجري؟ وكنت لابس إيه لما قابلت بابا أول مرة.

- الديتيلز دي بتصيبه بالإعياء وممكن يفشلك الجوازة كلها.. هو مش في امتحان ثانوية عامة!!
 - الراجل مش بياخد باله إنك صبغتي شعرك إلا لو كان شعرك إسود وبقى أورانج أو فوشيا.. لكن لو صبغتي بنّي بندقي ولا هيعبرك من هنا لقرن جاي.. إنتي نفسك مش ملاحظة الفرق يا بايخة... اعترفي..
 - الراجل عنده اللي يصحيه من النوم من المحرمات, ولو فكرتي تصحيه يبقى لسبب قهري.. بتولدي مثلاً, غير كده إستني كلها 16 ساعة ويصحى من القيلولة بتاعته والدنيا ما طارتش.
 - جو أصل مامتك ومامتي وخالتك وخالتي وأختك وأختي آخرته حاجة من الاتنين.. يا هيسيلك البيت ويطفش.. يا إنتي هتعيطي لحد ما جفونك تبال وتباتي عند مامتك يا فالحة.. فا بلاش منه.
 - ما تغلطيش في صحابه ولا في قعدة القهوة, الحاجات دي ريد لاین...توقفي عندها وستووب يا أمووورة!
 - أكل مامته أحلى من أكلك ومن أكل 10 زيك.. دي من الثوابت الكونية زي الشمس بتشرق من المشرق كده.. ما تتعبيش نفسك وتحرقى سعرات على الفاضي!...
 - تبقي، لامؤاخذه في الكلمة، عبيطة لو قارنتي نفسك ببلاي إستيشن أو إكس بوكس أو بولة استيميشن أو بماتش الكلاسيكو.. أو حاطيتي نفسك في مقارنة مع الأهلي أو أبو تريكة...
- يعني ما ينفعش تقوليله أنا أهم واللا ميسي؟!
واللا ما تطنش ماتش برشلونة وتعالى نروح لمروة..
واللا ماتش الأهلي أهم واللا إننا نخرج سوا؟!
لازم تبقي متأكدة من الإجابة..
ميسي طبعًا..
وبرشلونة مين اللي يتطنشها... ومين مروة أساسًا؟!
ومعروفة إن الأهلي فوق الجميع..
إنتي عبيطة يا بنتي ..
الرجالة أبسط مما تتخيلوا يا جماعة؛
إحنا اللي تفاصيلنا كتير بزيادة!!
عرفتوا بقى يعني إيه الرجالة من المريخ..
كوكب دما!!!!!!غ!!

الأرض ومكسّر 5 أطباق وبيقرقش إزازهم وضحكته من الودن
للودن وداهن نفسه بسمنة جنة ونايم على ظهره في طاسة..
○ باسكيت الزباله بتغنيه: "بناديك تعالى... بناديك تعالى"، طول
اليوم هتلاقيه بيحاول يوصلها ويحط راسه جواها أو يلحس الكيس
!!
○ غالبًا هتلاقي خلال أول سنة مشي فيها واكل 10 علب من كريم
التسلخات بتاعه.. حتى لو مخبياه منه فوق التلفزيون بيعرف
يوصله ابن العفريته ده..
○ فإلّا تطلعي تلاقي وشّه كله مدهون أبيض وعمال ياكل فيه متخافيش..
○ إن شاء الله هتعددي على خير..

○ هتلاقي المحروس بيجري بسرعة 300 كم في الفسوة لو لقي
باب الحمام مفتوح، وغالبًا هتلاقيه حاطط إيدّه في البلاعة وياكل
الله أعلم إيه أو بيسرّح شعره بفرشة التواليت.. استهدي بالله
وحاولي تحتوي الموقف..
○ يا جمال فيش الكهربا والصعق بالكهربا وأنه ياخذ ينسه ويحطها
في الفيشة. يا جمااااالله.. خبي يا ختي كل الفيش، محدش
ناقص.. خبيهم بكنب خبيهم ورا ستاير.. اتصرفي..
○ آه هيلحس الجزم وهيقلب الشباشب وياكلها والمصيبة إنه
هيسطعمهم المقرف ده وممكن يدمنهم، ما تتكسفيش لما
تقولي ابني بيعمل دماغ شباشب زيكو وشرابات..
○ اقللي غطا التواليت يا حبيبتى، إنتي فاكرة ابنك شّعره اتبلّ
إزاي، ده دخل راسه جواه وخد غطس يا فالحة.
○ ابنك عينه هتلمع لو لمح موبايل أو ريموت كنترول أو ريسيفر،
هيبقى عنده إصرار خزعبلي إنه يمسكهم ويخرّبهم.. وهيوصلهم
مهما عملتي..
○ نصيحة.. اقللوا كل الأدراج والأبواب خصوصًا باب التلاجة عشان لو
عرف يفتحها مرة ممكن تدوري عليه بعد كده تلاقيه بيلعب
بالمكعبات في رف الخضار اللي تحت وبيكلم الطماطماية على
إنها صاحبتة.
○ في السن ده هتلاقي بّق ابنك علطول بيلعب.. سيبيه عشان
ممكن تلاقي محل خردوات جوه.. كله هينزل مع اللي بينزل..
○ إنتي عايشة مع مكنسة 5000 وات يا حبيبتى.
○ الغذاء الرسمي للأطفال في السن ده ورق الكلينيكس..
○ متقلقيش منه.. ده سيليلوز.. هضمه سهل إن شاء الله.. وأهي
مناعة على رأي جدتي!
○ طول ما هو صاحي ما تتكلميش في التليفون وتندمجي عشان

اللحظة اللي بيغيب فيها عن نظرك بيعمل فيها البدع.. الموضوع ممكن يوصل لكوارث بيئية!

- البوتاجاز والفرن بالنسباليه حلم العمر!!! تلاقيه مُنى عينه يفتح الفرن ويقعد جوه جنب الفرخة اللي بتتشوي جوه!!!
- في بوكس اللعب بتاعه معالق تلاقى، كبشه تلاقى، غطا حلة تلاقى، إيشارك اللي ضايح بقاله شهر تلاقى، بطارية الريموت اللي قلبتوا عليها الدنيا.. كله في البوكس اللعين ده!
- ابنك هياكل صواب الروح وكريم الأساس وهيرسم خرايط على جسمه بقلم الكحل.. اديني قولتلك أهو!
- عادي تلاقيه قرر يقلع البامبرز وماشيلك في الشقة يا مولاي كما خلقتني.. سيبي الشاب يقعد على راحته.. وربنا يكون في عون سكان البيت بقى.
- الأطفال في السنّ ده عندها قدرة خارقة على أكل الفتافيت وأي حاجة واقعة على الأرض.. زرار.. خرزة.. فتلة.. وهتكتشفي ده وإنتي بتغيريله.. صدّقيني هتنبهري..

من الآخر أي حاجة ضايعة منكوا في البيت هتلاقيها في البامبرز.. اصبري على رزقك..

ونصيحة من قلبي عشان شوفت كتير خلي عينك وسط راسك 48 ساعة في الـ 24 ساعة وكلها 10 سنين ويعقل إن شاء الله.. هااااانت!

"جوليلي يا بيبي"

كنت بتفرّج على فيلم World War Z بتاع براد بيت.
الفيلم بيحكى عن زومبيز هجموا على المدينة, سيكوا من قصة الفيلم وركّزوا معايا.
الزومبي كسّر إزاز عربية براد بيت وبنته بتعيط ورا وبيقولها.. just keep calm baby.. وكان ماسك أعصابه عشان بنته ما تتوترش خالص. والابتسامه مراحتش من وشه عشان تهدى وما تتوترش!
فا نزلوا من العربية وبيجروا وحواليهم زومبيز من كل مكان وهو بيقول لمراته run

!! ..honey..run honey

والدبدوب بتاع بنته وقع على الأرض وهما بيجروا وبراد بيت بص عليه بصة توحى إنه مستنقص نفسه أوي إنه خذل بنته وساب التيدي بير على الأرض عشان الزومبي كان بينه وبينه خطوتين وقالها !!Sorry baby

هو قال honey و baby والزومبيز بيجروا وراهم وقاطعينلهم نفسهم..

أومال لو كان عازمهم يوم الجمعة يتغدوا في تشيليز على الترابيزة اللي بتتمرحح في الأوبن إير دي كانوا قالوا إيه؟ وفي موقف تاني شدني الصراحة..

براد بيت منبّه على مراته ما تتصلش بيه وهو اللي هيتصل عشان ممكن يكون في ميشن، قوم إيبويه مراته زي أي ست كلمته عشان تطمن عليه وكان في نفس ذات اللحظة هما في مهمة وماشيين بالراحة عشان الزومبيز ميحسوش بيهم وجه موبايله رنّ وكانت المودام..

قعد يجري ويستخبى منهم ومقالش أي لفظ بذيء ولا لعن سلسافيلها ولا قالها لما كلمته: الله يخرب بيتك ولا إنتي طالق بالتلاتة.. فوّت الموضوع خالص وقالها !! Sorry honey I was busy

حاجة كده تقشعرّ لها الأبدان، والموقف ده إتكرر طول الفيلم... ومكانش فيه أي أفورة أو تمثيل..

خلاصة القول إن honey و baby دول أسلوب حياة للناس الحلوة اللي برّه..

ما قلهاش ما تجري بسرعة يا ولية، الزومبيز هيقرقشونا عشان ترتاحي يا فقر أو ما طنشهاش وجري بعياله مع إن الزومبيز كانوا هيعضوهم خلاص..

ولا قال لبنته بطلي صريخ يا زفته.. مش عارف أركّز مع الزومبي من زتك!!!

جتك نيلة طالعة بومة لأمك.. واللا محروق أبو الدبدوب على أبو اللي جابه!!

فا بجد أحب أوجه نداء للمتجوزين.. قولوا لبعض كلام حلو..

مش هضغط عليكوا وأقولكوا قولوا honey و baby عشان عارفة إنه صعب.. بس قولوا كلام حلو..

مش لازم يعني الزومبيز يجروا وراكوا عشان تنطقوا !!

وأنا عارفة إن الزومبيز لو طلغوا فعلاً هتبقى مش فاضيلهم عشان بتجرّس مراتك وبتديها شلاليت عشان تجري بسرعة وتقولها يلا يا دبة!!!

"منطق ستات"

خلينا نتكلم بالمنطق كده... لو كُنا شبه الأجانب كانت هتبقى حاجة مملة
أوي يعني..

تخيلوا معايا كده, هتبقى عنينا كلنا زرقا زي لون السمّما أو خضرا لون
البرسيم وبيض وشعرنا كلنا أصفر ذهبي وسايح وبيرفرف حوالينا وعادي
كده, من غير لا بروتين ولا كيراتين ولا فرد الشعر بالبيبي ليس 5 مرات, إيه
الزهق ده!!

طب قولي هتُعجب بواحدة ليه!! عشان شَعرها؟ عشان عَنيها؟ ما كلهم
نفس الشكل!!

فين المجهود اللي بيتبذلّ؟!

برّه كلهم نفس الإسْطِمْبة, قمرات وبلوندات وملونين. نفس الملامح
متكررة.

ولبسهم واحد, ميني جوب على بادي كات أو شورت على تي شيرت..

لكن إحنا في مصر خد عندك بقى.. صباح التنوّع اللي في الطبيعة..

وصباح الفن السيريالي في الموضة اللي بتتلبس..

سمرا تلاقى.. قمحاوية تلاقى.. بيضا تلاقى.. بيضا بس اتفحمت من
المصيف تلاقى.. سمرا بس مرمغت نفسها في فاونديشن وكريمات تفتيح
تلاقى!

طويلة وفرعة أوي موجود.. قصيرة ومكعبرة موجود... متوسطة الطول
موجود..

رُفِعة معصصة موجود.. سِمْنة مُفرطة موجود.. ممشوقة القوام موجود
بس بنسب تكاد تكون معدومة..

هتلاقى عيون سودا بالهبل.. بُني بالعبط.. تنزل على الخضار والزرقان
شاح بس هتلاقى برضه.. السوق مليون بس إنت دور كويس!

ده حتى العين الحمرا ما حرمناكوش منها...

وشّ فيه حَبّ شباب ووشّ فيه تجاعيد ووشّ فيه نمش, وشّ فيه ميكب آب
بشكل عشوائي متوافر وبكثرة..

وحتى ريحتنا مختلفة... إشي بيرفيوم شانيل أبو 1000 جنيه على برفانات
إفون وأوريفليم.. على لولواه نسيم الحياة... على ريحة بصل وتوم وطبيخ...
كله موجود...

وحتى إستايلات اللبس مختلفة..

هوت شورت تحتيه ليجن.. قميص أحمر كاروهات عاملة منه تونيك و فستان وبنطلون.. إستريتش على كارينا.. كيمونو فؤاد المهندس.. توربون.. لفة طرحة إسبانيش.. قُصّة صفرا كتا كيت طالعة من تحت اللفة.. خمار.. نقاب.. لبس محترم.. حجاب صح... كله موجود..

إنت بقى عمرك شوفت أجنبية لابسة بنطلون مليون ورد بلدي أحمر ف أخضر وعليه بادي من فيجا سكري ومدخلة البادي جوه البنطلون ولابسة إيشارب فيه نفس نقشة الورد البلدي اللي هرت البنطلون تحت دي!!!!
عُمرڪ شوفت أجنبية لابسة 8 إيشاربات فوق بعض بكل ألوان القوس قزح عشان تضمن إنها جابت درجة البوليرو والدريس والجزمة في لفة واحدة؟
عمرك شوفت حجم الراس دي أو التوازن اللي بتمشي بيه رغم البلوة اللي شايلها فوق دي؟ لأ وكمان مش بتقلب على قفاها من تقل وزن اللفة؟ هي دي سهلة؟!

عمرك شوفت كل ده بره؟ أشك.. لأ... ربييلي أشك.

ده التنوع وصل بينا إن في بنات بتلبس بوت في عزّ الصيف!! كل ده في سبيل الموضة والفاشون... نعملكوا إيه ثاني ها؟

ولو على لون العين فا اللينسز حليتها.. ده حتى بقى في لينسز مخططة ولينسز بلون عين السحالي ولينسز موف!! والبنات بتلبسهم شوفت بقى... شوفت؟

نعملكوا إيه ثاني؟!!

إحنا عندنا ساسبنس استحالة تلاقيه عند أي بنت تانية..

تمشي في الشارع تتفاجئ باختلاف الحضارات والفصول والأذواق..

بوت على زعبوط على بادي على كيمونو... كله في طقم واحد... أو مال لو شوفت بقية الدولاب هتعمل إيه..

إحنا الإكسيسوريز عندنا أوفر.. البنات بتمشي وهي لبساها تحسّ إن كارتة ماشية جنبك من صوت الشخلة.. الحاجات دي ليها ميزانية يا بابا مش أي كلام!

شوفت أجنبية قبل كده راسمة حواجبها 8 بالقلم الفلوماستر؟ وضاربة خدودها بلاشر لون الخوخ الحلو ده؟ بطلوا افتري بقى وقدّروا الشغل العالي اللي بيتعمل ده!! في صرف عالي!

العروسة الأجنبية شكلها يوم الفرح نفس شكلها وهي طالعة من الجيم...

لكن أتحداناك... أتحداناك تتعرّف على مصرية يوم فرحها وهي طالعة من
تحت إيد الكوافير حتى لو أختك التوءم..
نعملكوا إيه تاني؟ هاا؟ نقطّع نفسنا يعني!! المفروض تبوسوا إيدكوا شّعر
ودقن والله العظيم!!

"كتالوج الستات ومعاملة البنات"

- الدولار بتاعها مش بيتقفل من كتر اللي جواه بس معندهاش حاجة تلبسها.. معروفة!!
- البنت لو عملت فجأة كحكة فغالبًا حالتها النفسية مش قدّ كده، ولو قرّرت تقصّ شعرها خالص بعد ما كان طويل يبقى هتاخذ قرارات مصرية تانية هتفاجأك جدًا... خدلك ساتر بقى.. واستعدّ للي جاي.. واقرا المعوذتين!
- مفيش سبّ على وجه الأرض بتحب المقارنات، ما تقارنناش بمامتك أو أختك أو أي واحدة.. المقارنة طريقة بتوصلّ لحارة سدّ.. مش هتوصلك لحاجة غير للبوز والنكد والعياط.. لو ليك فيهم.. دووووس!

- لما تعامل الست كويس مش بتتمرع زي ما فهموك.. بتحبك وتقدرك أكثر.
 - الست ليها طموح وأحلام زيّها زي الراجل.. ما تستهترش بالنقطة دي.
 - الست لو قاعدة ساكتة على غير العادة وواحدة منك جنب، إقلق وهات صاحبك اللي قلق معاك قبل كده يقلق معاك تاني وتالت..
 - الموضوع أكبر مما تتخيل، في كارثة، حضر نفسك للقنبلة.
 - الست لو الأيلينر بتاعها باظ أو الكحل ساح أو الإيشارب لفته ما طبطتش، مُودها بيبقى منيل بنيلة.. ابعدها عنها!
 - الستات غالبًا مش غلطانين، ده من الثوابت الكونية ولو حضرتك مش عارف كده تبقى دي غلطتك إنت، ولو اعتذروا لازم بيرروا ليه غلطوا، وغالبًا بيلطوك في أي بلوة لو فكروا يعتذروا. فا خدها من قصيرها وكبّر دماغك بدال ما تقعد تقولها إفردي وشك 3 شهور قدام!
 - قول على واحدة معدية إنها جامدة، وفي نفس اللحظة خد المخدة بتاعتك وإنت عارف مكانك على أنهي كنية في الليفنج..
 - "إنتي تخنتي شوّية" الجملة دي لا تتقال بجد ولا بهزار، مفيش هزار في الموضوع ده الله يكرمك.. في بيت وأسرة وكيان كله بيتلط وبيدفع تمن الجملة دي!!
- الخلاصة: عامل مراتك المعاملة اللي تحبّ جوز بنتك يعامل بنتك بيها لما تتجوّز.. هترتاح وتريحها.

"كوكب القهوة الشقيق"

- البنت لو فرحانه بتخرج مع صحباتها وتشتري لبس وبيدخلوا سينما.
- الولد لو فرحان بيروح القهوة!!
- البنت لو مُكتئبة بتعمل شَعرها كحكة وتاكل التلاجة كلها وتتخن وتكلبظ وتعيط..
- الولد لو مُكتئب بيروح القهوة!!
- البنت لو قلقانة بتكلم صاحببتها وتقعّد تهزّ رجلها وتعيط وتتكعور في أوضتها..
- الولد لو قلقان بقى بيفكه من كل حاجة في الدنيا، وبيروح القهوة!!
- البنت لو عندها امتحان تجيب كل الملازم وتقعّد في أوضتها وتشرب 5 لتر

نسكافيه وتذاكر.. وممكن تنهار لو وراها بلاوي..

الولد لو عنده امتحان بيحيب الملازم من صحابه في القهوة، ويقعد يشرحوله في القهوة، وأحيانًا بيذاكر المنهج في القهوة.. وينام بالبيجاما في القهوة، ويطلع من القهوة على الامتحان عدل.

البنّت لما بتنجح بتشغل أغاني وتعزم صحباتها في حنة حلوة يتصوروا وتعمل أزعرينة في البيت..

الولد لما بينجح بيعزم صحابه على المشاريب في القهوة.. ويبقعد على القهوة، واللي عايزين يباركوله بيحبوا الشربات ويروحوله على القهوة!!

البنّت في عيد ميلادها صحباتها يجيبولها تورته ويخرجوا سوا ويصيتوها على الفيس بوك..

الولد في عيد ميلاده محدّش من صحابه بيفتكره ولا حتى هو بيفتكره، ويبقعدوا على القهوة زي أي يوم عادي، وممكن يفتكر بعدها بشهرين إن عيد ميلاده فات!!

البنّت لو بتحب، بتسمع تامر حسني وتحضن دبدوب وتكلم حبيبها وتشوف أفلام رومانسية ..

الولد لو بيحب، يقعد على القهوة ونفسه يجيب حبيبته تقعد معاه على القهوة..

البنّت لو فشكلت خطوبتها تعيط وتنهار ومتاكلش وتغير البروفایل بيكتشر لصورة عبلة كامل وهي قاعدة مربعة وتسمع جرح ثاني وتدب على الأرض..

الولد بيפקوا من كل ده ويعمل حاجة جديدة المرة دي... يقعد على قهوة ثانية عشان يطلع من الموود!!

البنّت قبل فرحها بيومين بتعمل ليلة حنة وتهيئ وتغني..

والولد قبل فرحه بساعتين بيكون قاعد على القهوة ويقوموه منها بالعافية!!

البنّت ليلة العيد بتظبط لبسها وتنصف مع مامتها وتعمل ماسكات وتزأطط وتكلم صحابها وقرابها تعيد عليهم..

الولد ليلة العيد يجمع كل صحاب عمره ويقعدوا على القهوة لحد صلاة العيد كنوع من التغيير بقى.. ويروح يفطر ويرجعلهم ثاني على القهوة.. مسافة السكة يعني..

حقًا.. نحن من كوكب الأرض وهم من كوكب القهوة!

"اعمليله محشي"

في عيد جوازكوا ما تاخذكيش الجلالة وتوصي على تورته دورين ولا حتى دور واحد. إوعي تتعبي قلبك في تورته ثري دي أبوس كوعك، ما تقوليش دي على شكل دراع بلاي ستيشن اللي بيحبه واللا عليها سمانة عماد متعب!! دي حوار فاشل فشل لا يتحملة إنسان!!

من الآخر جوزك هيشيل كل الإيسينج اللي عليها والفوندان وهتتشلفط ومش هياكل منها حاجة، ومبروك لبستي 400 جنيه واللا 500 جنيه!

استهدي بالله كده، وإعمليله محشي!!

في عيد ميلاده... متعمليش كيكة في البيت وتقولي يمكن يحبها أكثر من الجاهز، مش هيجبها وهتتكلفي كريم شانتي وكريز وكومبوت للتزيين على الفاضي، وهتقعد في التلاجة لحد ما تبقى ناشفة زي الرصيف.. اعمليله محشي!!

في الفلاننتين.. كلي إنتي الكب كيك اللي على شكل قلوب الحلوة دي، بس ما تنسيش تعمليله محشي.

هتقولي محشي في الفلاننتين؟! هقولك آه محشي.. اسمعي الكلام.

ما تفتكريش إنك لما تجيبيله كب كيكس تهبل من نولا هو هينبهر مثلاً!! نولا زيه زي أي مخبز عادي في الشارع عند الرجالة!! زيه زيّ البسكوت أبو عجوة اللي بتلاتة جنيه الكيلو.. خليلك إنتي نولا!!..

الموضوع ده مفيهوش زعل أو إن حدّ يقول الله يرحم الرومانسية... كل شخص وليه الحاجات اللي بتفرّحه..

لو جوزك بيحب الكب كيكس أكثر من المحشي والطواجن يبقى رزقك من السما.

لكن في رجالة بتقلب بوزها أول ما تشوف منظر تورته وراشق فيها شمعة... هما شخصيتهم كده... هنعمل إيه؟

المحشي والحمام اللي بالفريك والرقاق أو صينية أي حاجة في الفرن.. أي حاجة.. أجدع عند الرجل من أحلى تورته وأحسن كب كيك.

حتى لو حسّسك إنه انبهر بالمفاجأة، بس صدّقيني لو كنتي عملتي حلة محشي ومعها حمام، كنتي هتشوفي نظرة حبّ في عينه ولمعة عمرك ما شوفتيها قبل كده مع أي تورته جبتهاه.

ممکن تشتري مني وتعمليله حلة محشي، ولو جنبهم كباب وكفتة بقى يبقى كده هيعملك تمثال عجوة في الريسبشن.

ما تسمعي الكلام... ده إنتى دماغك ناشفة أوي على فكرة!!..
خدتي إيه من التورتات، بصيلي هنا وأنا بكلمك!!
جربي، ومش هتخسري حاجة.

"المذاكرة وسنينها"

هتذاكري لولادك.. ؟

وماله..

الجرأة حلوة مفيش كلام..

لا هو عيب.. ولا حرام...

الموضوع مش أزمة خالص..

بصّي يا ستي، دي تعليمات بسيطة للمذاكرة:

- افكري إن ده ابنك.. ضناكي, حته منك.. ما تخليش حاجة تافهة تخسركوا بعض. مش ده موكا ابنك البكري برضه اللي استمنتيه من الدنيا ولبستيله لبس حَمَل من

الشهر الثاني...

هوّ واللا مش هوّاا؟

مش ده اللي كنتي بتقولي إمتى يكبر بقى وكنتي

بتعدي الأيام عشان تخلصي من الرضاعة والتكريع

والبامبرز؟

أهو موكا كبر بسم الله ما شاء الله، ومطلّع تربانتيك أهو،

وبتقولي في شرك ولا يوم من أيام الأشط يا موكا يا

حبيبي..

إلسي بقى...

- حاولي تختاري الوقت المناسب. لأنه بعد ما بيرجع من المدرسة بيكون تعبان، وبعد ما بيتغدى بيتقل، وبعد ما بينام الضهر بيقوم وخمان، وبعد ما بيستحمى بيعوز يريّح.. اختاري وقت غير دول!!!! هيبقى مصصح ومفوق معاكي..

- خرّجي أي أطفال من أوضة المذاكرة عشان فجأة هيجب أخته اللي كان لسه مديها شالوت وملبسها في الحيطه، وهيكتشف فجأة إن عنده أخ أصغر منه وهي تفاجئ أكثر إن اسمه علي وإنه عايش معاكوا بقاله 3 سنين... سبحان الله!

- خلي **قُلة** جنبك أو زير أو كولدير، حسب المتوافر لأنه هيعطش 50 مرة.

بس حاسبي تتهوري.. بلاش **قُلة** لحسن الشيطان شاطر.

- خلّي جنبكوا عجل.. ادبحوا تيس... حمّريه ديك رومي... عشان هيجوع منك 100 مرة... مرة تدّيله فخذة العجل..

مرة ورك الديك... عشان تخلصي من زنه..

- ذاكري في أوضة جنب التواليت عشان هيتزنق منك 15 مرة، وممكن يجيله جفاف، فا خلي معاكي محلول..
- شيلي أي حاجة من قدامه، حتى بري الأقلام عشان هيلعب بيه ويعمله جيبة لأخته... خلي المكتب أقرع خالص..
- ما تضيعيش شقى عمرك على الإستيكرز، هيزهق منها بعد يومين وهيلزقهملك في قفا إخواته.
- قوللي المعلومة 20 مرة، والنبي ما هيجري حاجة.. قولها بصدر رحب وإنتي مفرشة كده، بدل ما تخسروا بعض على مادة ما تستاهلش أصلاً..
- استحضري فرفشة الفنانة فيفي عبده في فيديوهاتها بتاعة ه أمووووااه.. هوانيوووووو... هتفرق معاكي أوي... جو التحفيز بالشيكولاتة والكاندي ده بقى فاكس أوي، شجعيه وقوليله لو خلصنا الهوم ورك هنحرق الكتاب يا حبيبي.. هيبقى فوربيرة!!
- ما تسألهموش إنت بطل؟ هااا البطل بيعمل الواجب؟ عشان هيقولك أبو الأبطال على أبو المذاكرة.. على أبو.....، ما تعصبوهمش بقى، ذاكريله وإنتي ساكتة الله بياركلك!
- ما تتوقعيش إنه هيتحول سوبر مان، ويخلص قلمين رصاص من الحرت بعد البق ده..
- اقللوا التلفزيون في البيت كله، وما تخليش حد يتكلم عشان هو راشق ودنه في أي حوار...

ولسّه في بليتين غيره داخلين على تعليم وممكن يكون
هو أشطرهم.... إزاي الحال بقى؟

- لو لقيتني أي أعراض غريبة عندك.. "زغللة... هزيان...
تهتهة... بتعرجي... ظهور ميول انتحارية".. روعي للدكتور
علطول.. إنتي ملكيش صاحب واللا إيه؟ إنتي روح بردك!

"إرضي المدام يا ضنايا"

لو مراتك مش راضية عن حاجة، بلاش تعملها.
يا جماعة في ستات سرّها باتع ما بتهزersh!!
هي نيته مش وحشة خالص على فكرة، بس نفسّها تكون معاك علطول.
هي شايفة ليه تسافر مع صحابك مش معاها، حتى لو كنتوا لسه مسافرين من
أسبوع.
تحس كده إن النفسية من جوه مش مظبطة.
في واحدة عدم رضاها في السفر يقلب مثلا بتخييشة عربية أول ما تبقى لسه

هتمسك الطريق، فا كده إتنكد عليك بدري بدري يا معلم..
أو إنك تلاقى شرم الشيخ مثلا مفيهاش صريخ ابن يومين،
تلاقى الراجل، يا عيني، حاسس إنه راح صحرا.. مش رايح يغير جو..
تحسّ كده إن الطبيعة والجو والشوارع والزحمة والقطط وكل الكائنات تعاطفت
معاها، وبتعمل معاها واجب وبتعمل معاك الجلاشة!!
الدنيا تمطر وإنت رايح تلعب كورة، فا **تروح** جري قبل ما تتغرق..
عصفورة تعمل معاك السليمة وإنت لسّه نازل من بيتكوا.. فا تطلع ثاني!
كأن في هارموني بينها وبين العالم الخارجي ..
هتلاقى عكوسات كده بتحصل ملهاش أي تفسير..
القميمص زراراه وقع فا توطي تجيبه يقوم الآي فون يقع على الشاشة، تحسّ إن
في لعنة في الموضوع، وأكرملك تروح بيتكوا!
فا لو حسيت إنها بتقولك سافر مع أصحابك وهي متضررة ولو **0.0001%**.. كنسل
السفرية!! ومن غير تفكير.. **كنسل** وإنت راضي باللي ربنا كاتبهولك.
لو حسيتها مش راضية على موبايل هتشتريه إوعى تجيبه، أو هاته وأتأكد إن
الضمان مدى الحياة مش أبو سنة واقلب ده، أو هاتلها معاك وكده يبقى فلّ أوي..
اعملها زي ما بتعمل لنفسك وأحسن.. مش الست دي شايلاك برضه ..
قلبة الست وحشة أوي، ومش بهزار في ستات تحسّها مخاوية !!
وليها قدرات خارقة لو مش راضية عن حاجة ..
وده ملوش علاقة أبدًا إن عين الستات وحشة لكن الخلاصة..
إرضي المدام عشان الست دي بركة وليها كرامات..

"إزاي تتعامل مع شخصية بتخاف من الحسد؟"

من الأساس بلاش تتعامل مع الشخصيات دي أسهل وأريح, بس لو اضطريت يبقى عملي اللي هقولك عليه:

- إوعي حسك عينك تقوليلها كلمة مجاملة, من نوع إيه الجمال ده أو اللبس ده شيك, إوعي, هتلاقيها نزلت إيدها جنب جسمها وبدأت تدور على خشب وإيدها هتترعش لحد ما تلاقى **ترابيزة** وهتخمس من تحت لتحت، وتتمتم ببقها وهتسمعي سورة الفلق بودانك وهي بتقراها عشان خايفة منك... والنفس بتاعها هيتسارع لدرجة إنها هتبقى مفضوحة أوي مع إنك قولتي عشرين مرة بسم الله ما شاء الله!!!
إوعي تقوليلها كلمة حلوة لحسن تلبسك تهمة.. بلاااها..

- نصيحة أخوية اعملها unfollow على الفيس بوك, أصل كل بوستاتها خرزة زرقا وكفوف بتخمس وستاتس من بتاعة "بخري وخمسي" و"سيبوني في حالي يا كفرة" مش هتضيف لك أي حاجة, بالعكس هتخسي بكمية توتر غريبة لما تشوفي البروفایل بتاعها! وغالبًا هتلاقي اللي بيعمل لايك ليها باباها ومامتها بس..

دي كل كلامها بتدعي على شخص أو بتحسبن على حد! مين بقى فاضي للهبل ده؟

- كل الصور عندها صور أشلاء بشرية, أو أعضاء متقطعة!! إيشي صُباع محروق أو دراع مكسور أو ضرس مخلوع في طبق أو عيل من العيال بيرجع ومصوراه فيديو! على عقلة صباع بتخر دم!! إحنا ناقصين هم وأرف!!

كل صورها مأساويات، والله أعلم حقيقية واللا تأليف عشان تخزي العين!

- تبقي غبية لو كتبتيلها كومت على صورتها أو صور ولادها، ونهارك مطين لو صورتها هي وجوزها، هتجيبني لنفسك مصيبة ديلفري لحد

عندك! فا نرجع ونقول unfollow او unfriend .

إنتي هتتجنني وتقوليها ربنا يحفظكوا!! هتلاقي بعدها بربع ساعة رزعاكي واحدة: "منها لله اللي كانت السبب في خناقتي أنا وجوزي... وكنا هنتطلق بسببك يا بعيدة"، والكلام ده.

- لو لابسة دبلة جديد ولا تقولي مبروك.. اعتبريها لابساها ترويش!!!
- لو بطنها قدامها 10 متر اعتبريه انتفاخ... إوعي تهتمي.
- لو شايلة بيبي على إيدها.. اعتبريه ابن اختها.. إوعي تسالي..
- لما تشوفي ولادها إعملي نفسك اتعميتي، آه اتعميتي!! كإنهم فراغ.... مفيش إزيك يا حبيبي ولا الهبل ده. ولو كلموكي إعملي إنك اتطرشتي!! ما توجهيلهمش ولا كلمة، عارفة ليه؟ لو بودي ابنها بعد 6 سنين كان لازم يشيل اللوز، هتجيبها فيكي لما شوفتيه وهو بينادي أخته بصوت عالي فا حسدتيه على حنجرته ولوزه العسل دول!!!
- ما تحاوليش تختلطي معاها أو تروحي بيتها، خلي العلاقة سطحية، ويا ريت كل كلامكوا يكون عن أهمية الخرز الأزرق وتأثيره في المجتمع..
- ما تاخديش كلامها ثقة.. اللي بيخاف من الحسد مش بيكون دوغري.. بيتوه ويلف ويدور وممكن يوصل للكذب.. فا متركزيش مع كلامهم..
- لو كل لبسها أزرق في أزرق ما تسألهاش ليه.. معروفة.. هي لا بتحب لون البحر ولا نيلة! هتلاقيها لابسة خاتم كف مدور وسلسلة مكتوب عليها عين الحسود فيها عود.. سيبيها في اللي هي فيه!!! هي بتقرا تعويذة دلوقتي أساسًا!!

الناس اللي فكرة الحسد مسيطرة على حياتها لدرجة إنها بتنسى تتحصن بالقرآن الكريم وملهية في جو الكف والشبابش والحوارات دي بتشوف كل اللي حواليتها باصينلها في أي حاجة..

فا الناس بتضطر يبعدوا عنهم عشان محدش ناقص تهم على الفاضي!!
الحافظ هو الله، والحامي هو الله، والناس أقصى حاجة بيعملوها إنهم
بينفذوا مشيئة ربنا....

الحسد مذکور في القرآن والتحسين منه في القرآن برضه مش بالخرز
واتهام كل البشر بأنهم قاعدینک مربعین وموراھمش حاجة غير
يحسدوكي!!

الحسد أصله مش سبب اللي بيحصلنا.. السبب هو بُعدنا عن ربنا وتقصيرنا
في الذكر والعبادة..

لازم تفهمي كده...

إنتي مش أنجيلينا جولي يا غالية!!

إحنا لو بنقولك كلمة حلوة بتبقى مجاملة عشان نعملك منظر!!

والله دي ذوقيات تعامل مش أكثر يعني..

قاطعوهم قبل أن يتكاثروا!!

"السبلاي ليست"

- ماماااااا، أنا جبت ورقة السابلاي ليست .
* روح ارميها لبابا يا حبيبي في حجره و اجري... ما توقفش قدامه.. ارميها و اجري

..

- باباااااااااا، أنا جبت ورقة السبلايز من المدرسة ..

© ورقة إيه يا ضنايا؟ إنت اترفتت من أولها، يخرب مُخك !!!

- السبلاااااااااااايز... يا باباااااا... اترفتت إيه بس!

© يعني إيه يا ضنايا، وغلاوتك مش فاهم؟

* يعني ورقة طلبات المدرسة يا محمد ..

© هيّ بقى اسمها صبلايزز!!! الله يرحم أبوك وأمك كانوا بياكلوا الأستيكة أمّ

ريحة.... ورّيني!

- عايز أول ورقة، واللّا الثانية، واللّا الثالثة؟

© هاااااااااااا أسوح!!! همّا 3 ورقات؟

- آه يا بابا..

© ياخررررراشي دول فلوسكاااااااب!!!! يا مُرّك يا محمد !!!!

© هاتهم كلهم شكلوا يوم كاروهات ...
© عايزين إيه من الدير ريسبكتد نيله بيرنتس؟ كليتهم؟ طحالهم؟ أؤمروا؟
بلاستيك بوكس " 39*39 سم " ده إيه التباتة دي؟! !!
بلاستيك إبرون؟
علي...علي...بصّ إجري اسأل ماما يعني إيه إبرون، بس اعمل كإنك إنت اللي
مش عارفها.. إوعى تقولها بابا ببسألك، سامع يا علولة يا حبيبي؟
- ماما!!!!، بابا بيقولك يعني إيه إبرون، مش عارفها؟
© آه يا كلب!

* يعني مريلة بتتلبس لما يلونوا يا محمد..
© تعالى يا زفت إنت مش عارف إبرون يعني إيه؟! آدي آخرة المدارس
الإنترناشونال!!!!
خلينا نكمل العريضة اللي مبعوتة دي ...
سبورة بيضا صغيرة "ليبيبيه هو إحنا اللي هنشتري السباير كمان، ما ناقص
نشتري الطباشير!!!!"
- طباشير إيه يا بابا، دي وايت بورد!!!!
© سوري يا خويا...نسيت ...

أقلام للزفت وايت بورد.... أومال همّا اللي هيشتروهم...ده حتى ميصحش!!!!
10 فايلات "5 زرق و5 بينك" ... بس ب-zipper.. ده إيه التناكة دي!!!!
ألوان خشب تخينة، وألوان خشب رفيعة، وألوان مياه، وألوان جواش، "ليبيبييه
هما فاكرينك ليوناردو دافينشي"، مش عايزين نشتري بويه من جوتن بالمرة!!!!
إيه؟ crayons!! وماله ...
علبة صلصال play dough!!! هو حتى اللعب واللغوصة إحنا اللي هندفعها؟! !!
بينسيل شاربار "ما يقولوا 5 برايات" هي الناس دي مالها متأنعرة علينا ليه يا
دعاء؟! إنتي مزعلاهم في حاجة؟

5 أساتيك ومقصين و 3 إسكتشات رسم وعلبة أقلام رصاص ماركة faber Castell
!!!! ده أنا مجبتهمش إلا في إعدادي هندسة؟! !!
3 باكيتات مناديل عادية و3 باكيتات ديتول "دي باكيته الديتول ب- 50 جنيه يا
كفار... يعني حبة المناديل دي دخلالها في ورقة بمتين عفريت ينططوكوا ".
معجون سنان وفرشاة سنان، وفرشاة شعر، وملابس إكسترا ...
يا دعاء! نسيوا يكتبوا شيشب وبيجاما، ما تنسيش تبعيهم مع عليّ أول يوم
عشان شكلها مدرسة داخلي... أصل استحالة دي هتكون طلبات مدرسة
عادية... هتوحشني يا عليّ والله .

فرش ألوان تخينة..
فوم بجليتر ..

علبة toung suppressors!!!! هما العيال كلهم جوا عندهم اللوز يا دعاء؟ إحنا
كمان هنصرفلهم على الدكتورة بتاعتهم؟!! شوفيلنا الموضوع ده لحسن يبقى
في فلوس كشف وإحنا منعرفش !!!
معقم لليدين "ديتول" نهار مش معدّي.. مش لسه جايبين واييس بـ 200 جنيه
فوق !!!
20 ورقة بيضا "A4"
40 ورقة ملونة "A4"
جلاد شفاف... جلاد ملون أحمر وأصفر وأخضر ورمادي وأوف وايت!!
بصي همّا مش كاتبين عايزين أد إيه يا دعاء، فا هنجيب 20 متر يدوب كده من كل
لون.... نبقي جنبنا بزيادة، واللي يتبقى نبقي نلزقه على حيطان الليفينج !!
3 شنط بسوستة؟! له وعشان إيه طيّب؟ !!
كونستركشن سكيتش!!!!
دعاء، أنا آخر طلبين مش فاهمهم، بس شكلهم خلاص هيدخلوا الواد هندسة...
شكلهم قرروا خلاص فا اسألهم بس القاهرة واللا عين شمس، عشان مبقاش
زي الأطرش في الزفة بس مش أكثر ...
وبعد مرور ساعة ونص من الصمت:
دعااااااااااا دعاء... تعالي لو سمحتي..
بصي أنا قدامي حاجة من اتنين: يا أدفع فلوس المدرسة يا فلوس الصبلايز دي...
يا إما نطلّعه من أم المدرسة دي خالص وأفتحله بالفلوس دي مكتبة كده قدّ
سمير وعلي وهناكل من وراها الشهد
فين أيام الكشكول الصفحة وصفحة، والكراسة التسع تسطر ودمتم !!!
دعاء بقولك، شوفي كده وردّي عليّ، وياريت البطاطس اللي بتحمريها دي
تفردبها على ورق الصبلايز بدل ورق المناديل، أهو يبقى استفدنا من وشه
بحاجة

وابقي كلمي المدرسة اسألهم: عايزين كليتي واللا مسامحين فيها... لحسن
الناس دي ما بتعتقش !!

"يوميات زوجة عادية خالص"

مراتك نيّمت الولاد..

* آه..

وهي بتطبخ عينها في وسط راسها لحسن حدّ يتخبط أو يكسر حاجة..
عايشة مع خلفية متواصلة من الزنّ والرغي والطلبات اللي مش بتخلص..

بتسمع كلمة ماما 500 مرة وعايز 1000 مرة والمفروض تمسك أعصابها
وتبقى هادية وبتضحك وبتلاعب وبتدلع...

بتحلّ في نزاعات غلسة واشتباكات غتية بين طفلين سابوا 200 لعبة
وحبكت يلعبوا بلعبة واحدة في نفس اللحظة.. كل واحد لو يطول يجيب
التاني من زوره هيجيبه..

بتسايس في دهّ عشان يسمع كلامها وتحايل في دي عشان تسبب
شعرها اللي قطعته في إيدها..

بتقنع بنتك إن الكلينكس مش بيتاكل وبتطلع الورق من بقها بأعجوبة..
بتلمّ اللعب بتاعتهم معاهم 40 مرة عشان تعلمهم التعاون ويساعدوا بعض
إزاي..

بتعقّم بيرونيات، وتحضّر لكل واحد أكله، وتضحك معاهم، وتلعب وتعمل
حصان وتقلد صوت البطة، عشان ولادك يضحكوا نص ضحكة.. ودي عندها
بالدنيا كلها..

بتشوف معاهم الكرتون اللي بيحبوه وحفظت أساميهم أكثر منهم، عشان
تشاركهم كل حاجة ويحسوا إنها قدّهم..

عرفت هيّ في كوكب تاني ليه، ومش موجودة في الوجود لما ناموا؟
هي ساكنة ومنتحة عشان هنجت.. الفيوزات ضربت..

وهيحصل إحلال وتجديد للفيوزات دي خلال ساعتين الهدوء دول، عشان
تبدأ المعجنة من جديد كمان كام ساعة..

عايزة تفصل من الزنّ والصداع اللي عاشتهم، إنت لما بيجيلك تليفون شغل
طويل شوية بتتخفق، شوف بقى هي مصدّعة إزاي من رغي عيال بيتفهم
بالعافية، وساعات كثير هي الوحيدة اللي بتفك شفرته ☺

شابوو للأمهات بقى..

اللي بيعملوا أراجوزات وبيطبخوا ويأكلوا ويلعبوا ويحمّوا ويبقوا هيقعوا من
التعب، بس كل ده على قلبهم زيّ العسل.

"غتاة مجتمع"

هو ابنك طالع وحش لمين؟
ده وحاشااشة أوي!!
ده سماارة خالص!!
جوزك مش حلو واللآ إيه؟
بنتك شَعرها طالع خشن لمين؟ غريبة!!
إنتي شَعرك خشن واللآ باباها؟
مناخيرها مالها كبيرة كده؟!!!
أورتها مالها عريضة كده؟!!
هو ليه ابنك طالع أحلى من بنتك؟
غريبة أوي إنك عنيكى ملونة وبيضا.. الولد طالع قمحاي وعينه سودا!!
غريبة أوي!!!
إنتي إتوَحمتي على إيه في ابنك؟ ما له عامل كده ليه؟
إنتي وباباه أحلى بكتير!!
اللي يشوف الولاد دول يقول استحالة إنهم ولادك!!
هما شبه جوزك ليه كده؟
هما شبه حماتك ليه كده؟
هما طالعين كده لمين؟!!
ابنك أقرع ليه، ده عنده شهرين يعني طالع لمين؟
بنتك طالعة شولة ليه؟ بنتك ليه أحلى من ابنك؟
ابنك ليه أحلى من بنتك؟
الحوارات دي إنتوا شايفينها قليلة الذوق أوي، وممكن الرجالة تشوفها over
وإن أنا مكبرة الموضوع فا أحب أقولكوا إن الكلام ده بيتقال لأمهات كتير!!
وممكن من صحابهم المقربين أو قرايبهم..
محدّش يقولي دول مش عايزين يحسدوا الولد..
كلمة بسم الله ما شاء الله مفيهاش حسد، ولو حدّ شايف إن الأم أو الأب
أحلى من الطفل فا يحتفظ برأيه لنفسه، دول ولادنا وفي نظرنا أحلى
وأجمل هدية ربنا بعتهالنا.. ومحدش طلب تفصولنا ولادنا!

ومش هقعء أءور في سءلات العيلة الورائية ليه ابني طلع قمحاوي وأنا بيضا؁ ولا يفرق معايا عنيه سودا واللا خضرا واللا نبيني؁ ده خلقة ربنا وألف حمد وشكر ليه..

مش هروح أحلل DNA وإديلكوا التقرير عشان تعرفوا بنتي طالعة سمرا لمين!!!

أرجوكوا خلوا الكلام الدبش ده لنفسكوا. عمر كلامكوا ما هيعقد أم من ابنها حبيبها أو بنتها حبيبتها بس نفوسكوا بتبان.

ومش هنسمح لأطفالنا يسمعوا الأرف ده عشان ما يتأثروش بيه!! وعامة هتتردلكوا في عيالكوا من ناس لا أنا ولا إنتوا نعرفها؁ بس الأيام دُول.. استمروا بقى وقابلوا..

"فرفرة وأفتخر"

بعض الرجالة بيقوا شايفين الستات فرافير ومش بيستحملوا ولا هيستحملوا التعب اللي بيتعبوه همّا في شغلهم برّه؁ وطول اليوم يحسسوهم إنهم مرفهين وولا داريين بالدنيا.

يقولوا لمراتهم إنتي أصلا بتدلّعي؁ إنتي تعبتي في إيه؟!!!

وولا بيّفهموا ليه الستات ساعات بيجيلهم اكتئاب بعد الولادة؁ ولا بيقدّروا ده وبيفسّروه إن مراتهم منقوع نكد وبس!!!

فا أحبّ أوضّحهم كام نقطة...

الفرفرة دي عرفت إنها حامل لّمّا نَفَسها بقت تغمّ عليها طول الليل والنهار ومكانتش قادرة تقف على رِجلها من ضغطها الواطي...

الغرفورة دي استحملت الترجيع والرفض ووجع جنابها وضررها طول الحمل..
بقت تلبس مقاس أكبر من رجليها 3 نمر ووشها ورم ومش زعلانة...
الغرفورة دي كانت بتصحى طول الليل من الحموضة والحرقان اللي في معدتها..
اللي جربته كل حاجة وما بيروحش...
كانت ممنوعة من كل الأدوية مهما كانت بتتألم..
كان مؤدها بيتغير في اليوم عشرين مرة وإنت مش دريان بيها...
الغرفورة دي كانت تقوم تقف في المطبخ وهي مش قادرة تشم ريحة اللحم ولا
الخضار ولا البيض بس واقفة عشانك....
الغرفورة دي جسمها عبّا مية وعضمها كله مكسّر من ثقل البيبي جوّه، ونسيت
شكل نصّها التحتاني، ومبتعرفش تلبس الجزمة والشراب آخر شهرين..
مش قادرة تاخذ نفسها عشان مفيش مكان خلاص فاضي، البيبي ومايته
كابسين على نفسها شهر عن الثاني...
الغرفورة دي آخر ثلاث شهور مش بترتاح في قعدة ولا في نومة... ولو نامت بتنام
وهي قاعدة وبتصحى كل نص ساعة من الخبط والرزق اللي جواها... كل الأوضاع
مش مريحة بالنسباليها وبتنهج كأنها في ماراثون، وضربات قلبها كأنها بتجري
حتى وهي نايمة على الكنبه...
ممکن جدّا تكون بتشتغل، وبترجع تعمّلك الأكل وتنصف البيت، وتربّي ابنك
الأولاني وتعلمه البوتي وتشيله وتنصف مكانه وبطنها قدامها متر!! عادي جدّا ..
الغرفورة دي خدت حقنة الإبيديورال بتاعة الضهر، وفتحت بطنها بدل المرة اتنين
وتلاتة ومكلمة عادي... أو قعدت تولد يوم كامل والطلق هاري جتتها وضررها...
لحدّ ما ابنك أو بنتك شرفوا للدنيا...
إحنا ممكن نكون فرافير، لو بتعتبروا الغرفرة إن قلبنا بيقع لو حدّ من الولاد اتخبط..
أو إننا بنبكي لو سمعنا صوت حدّ بنحبه زعلان..
أو إننا بنطلع نجري لو شوفنا كلب ماشي في آخر الشارع...
إحنا فرافير بالنسبة للرجال عشان دمعتنا قريبة ومش بنعرف نخبي... بس
ينبقى قدها وقودود ساعة الولادة، وساعة التربية والمذاكرة، وإننا ناخذ بالننا من
أسرة مكونة من كذا فرد بكل تفاصيلهم وتنايفهم... وساعات ينبقى أرجل من
رجالة وقت الجدّ والأزمات..
بنولد ونقوم ثاني يوم نراعي الطفل الجديد ونسهر معاه طول الليل وننام
ساعتين ونقوم نكمل عادي... ونبدأ ثاني دوامة الفرافير...
إحنا مش فرافير... إحنا حساسين وفي فرق كبير أوي بين الإثنين..

ولو إحنا حاجة delicate كده فا ربنا عز وجل قاصد يخلقنا كده عشان الحياه
تستقيم... عشان لو كنا ناشفين وجامدين مكنّاش هنبقى الضلع اللي بيحتوي
الأسرة كلها، ولا كنا هنستحمل الضغط ده كله من حمل وولادة وتربية وشغل...
لو كان الحمل دلع واللي بعديه دلع فا افتكروا قول الله عز وجل: (حَمَلَتْهُ أُمُّهُ كُرْهًا
وَوَضَعَتْهُ كُرْهًا).

وقوله عز وجل: (حَمَلَتْهُ أُمُّهُ وَهْنًا عَلَى وَهْنٍ)، أي: مشقةً على مشقةٍ...
وساعتها مكانتش الجنة هتكون تحت رجل الست الفرفورة دي... ولكن ربنا عدلٌ
ورحيمٌ ومُطَلِّعٌ على المجهود اللي ببذله..
شوفتوا إحنا فرافير وما بنستحملش إزاي؟

وشكرًا لكلّ راجل شايف إن مراته مش فرفورة ومحترم تكوينها وطبيعتها.. وعارف
إن ربنا خالقنا كده لحكمة...

إحنا مخلوقين من ضلع أعوج للاحتواء مش عشان نتكسر....
كلُّ مُيسّر لما خُلق له...

وشكرًا لكل راجل مقدّر دور زوجته وشايف بتتعب قدّ إيه.. لأن إحنا بجدّ مش
فرافير..

ولو بجدّ الفرفورة في نظركوا كده فأنا فرفورة وأفتخر.....

"النوم وسنينه"

ابنك وهو داخل ينام:

- هيفتكر إنه عايز يشرب **ميّه 50 مرة** ، معلش اعذريه ما إنتو اللي حاطين سريره في الصحراء الغربية!!
- هيقولك في بيبي مع إنه لسّه داخل من فيمتو ثانية، ويتنططلك على السرير لو مدخلش!!!
- هتسمعي كلمة أنا جعان لأول مرة في اليوم، وهتتقال خمسين مرة..
- لأ وإيه، هيقولك عايز أكل ملوخية وفراخ، واتصرفي إنتي بقى، مع إنه بياكل معلقة الرز بالضرب على الغدا!
- جوّ الحنان هيشغل وييجي يبوس راسك عشر مرات ويديكي أحضان لحدّ ما تزعقيه..
- هيدخل معاكي في جدال عن الظواهر الكونية وليه بنام بالليل وبنصحى الصبح، وعايزك تقنعيه ليه الشمس مش بتطلع بالليل، وليه ما ينفعش نصحى النهاردة وبنام كمان أسبوع مثلاً..
- هتسمعي بقى قصص من خياله البحت اللي هي غالبًا هلوسة: "أصل الديناصور لَمَّا جالنا الكلاس وعضّ إيد صاحبي، ولمّا التيتشر أكلت منّي السندويتش ولسعتني بالشمعة في قفايا"، أي كلام عشان يأخر معاد نومه وخلص...
- لو في صوت حدّ في العمارة اللي جنب جنب جنبيكوا هيفط من مكانه يقولك مين ده؟ وإيه ده؟ ومين بيزعق؟ وأنا كده مش عارف أنام..
- لو جرس الباب رنّ هتلاقيه زيّ العفريت رايح يفتح، مع إن طول اليوم ريقك بينشف عشان يردّ عليك أصلاً!!
- هيفتكر مواقف كانت بتحصله في الشهر التالت لما كان في بطنك وقدّ إيه وحشه اللعب مع الحبل السري !!!! وغالبًا بينام بعد يكون فرهد من العياط لأسباب كلنا عارفينها.

بالليل وتلغي وشك فجأة يجيلها هارت أتاك وتموت!! أو يتكعبل فيكي بالليل طفل
صغير يجيله صرع فا ما يعرفش ينام بالليل مدى الحياة ..

بالعقل كده اللي يبوصلك ويضحك، أو يبوصلك ويتخضّ ويطلع يجري زي المجنون
تفتكري حبّ يخسّ فجأة، كله منك ومن عميلك!!

البلاوي دي كفيلة تخليكي ترمي اللينسر دي في الزبالة في لحظتها.. أو
تعدميها قبل ما ترميها..

مش تلبسيها كتير عشان يتعودوا على شكلك بيها!!!!

طب والله العظيم وحشة وحشة وحشة، صدقينا كلنا إنها وحشة جدّا.. تحبّي
نرجع عشان تصدّقي؟ واللّا نعيّط واللّا نجري؟

راعوا ربنا في عدساتكوا مش كده!! في ناس ملهاش ذنب.. إلبسيها في البيت
في أوضة لوحده لو نفسك تلبسيها لكن دي أرواح ناس!! يعني حلو لما تموتّي
أختك بالسكتة القلبية عشان شافتك بتتمشي في المطبخ بالليل؟ البنت
افتكرتك خفاش!!

هتقول لي لأمك وأبوكي في العزا ماتت ليه.. هااا هااااا... ما تردّي عليّا؟! ارحموا
اللي جابونا مع خالص تحياتي وأرفي واشمئزاز الملايين..

"مذكرات أمّ مغتربة"

أنا بنت في العشرينات.. اتجوّزت وسافرت لجوزي علطول.. قعدنا فترة طويلة
في شدّ وجذب وخلافات وإن محدّش فينا فاهم الثاني لفترة محترمة، لحدّ
ما كلّ واحد فينا عرف طبع الثاني واتعوّد عليه.. والفترة دي صعبة جدّا في
الغربة بشكلٍ خاص..

لما بزعل منه كنت بروح أتكلم معاه عشان ما ليش غيره..

لما كنت بعيّط أوقات كتير من الغربة ومن برودها ما كنتش بقول لأهلي
عشان ما حدش يشيل همي..

اتعلمت أضحك وأهزّر طول ما أنا بتكلم معاهم..
اتعلمت أخبّي وأداري..

دخلت المطبخ ونفذت تعليمات أمي وحماتي بالحرف, كنت بأكتب بالورقة والقلم، ولما الأكل كان بيطلع حلو كنت بطير من الفرحة بمعنى الكلمة, زي العيال.. بالظبط.

وكنت بتنكد لو باظ مني، وممكن أعيط من القهرة والإحساس بالفشل..
اتعلمت أغسل وأنشر وأكنس وأمسح في يوم واحد، وأطبّق غسيل وأحضر السفرّة وأستنى جوزي يرجع ياخذ بحسّي..

مش هضحك عليكما أوقات كثير أوي كنت بقعد خايقة، وأيام ما كنت ببات لوحدي عشان جوزي مسافر كنت بتربع وما يجيليش نوم لحدّ ما الصبح يطلع..

كنت بخاف من حاجتين: الغربية والوحدة..

بس شوية بشوية قلبي قوي, بقيت بنام كام ساعة بالليل..
كنت بفتح التلفزيون يونّسني، وأخلي نور الشقة متقاد، وأقوم أبصّ على أبواب كل الأوض مفتوحة واللا مقفولة وأدخل أنام جري زي العيال الصغيرة..
عرفت إني حامل.. حسّيت أحاسيس غريبة وأنا بمرّ بشهور الحمل لوحدي..

مكنتش فاهمة أيّ حاجة في أيّ حاجة.. ولا جوزي فاهم إيه الدريكة اللي بتحصل في حياتنا دي..
اكتشفت كل حاجة لوحدي..

أقوم أرجع فجأة ولو جوزي في الشغل ملاقيش حدّ يناولني كوباية المياه..
اتعوّدت أبقي داخة وعندني حموضة وهبوط وضغطي واطي وأقوم أخدم نفسي وأشوف جوزي اللي طالع عينه بره لأنه بيصعب عليّ..
هو هيشيل إيه واللا إيه؟

بطني كبرت وبقيت لا بقدر أوطي ولا أشوف تحت رجلي إيه بس هعمل إيه بعمل نفسي شايفة وكويسة..

بطنش ورم رجلي اللي بقت قدّ الفيل وشدّة رجلي اللي بتصحيني من النوم..

ممکن أنام وأنا قاعدة وراسي ملووحة لتاني يوم من التعب وجوزي هلكان من التعب فا أفضل كده للصبح.. ملووحة..

وولدت الحمد لله، وسهرت الليل كله وكنت بكلم نفسي.. لو تعبانة محدّش جنبك يساعد أو يشيله منك ساعة واحدة عشان تفردني حتى جسمك مش تنامي.. مكنتش فاهمة ابني عايز مني إيه وكل الكلام النظري طبقته وفشل.. أخذته في حضني وعلمت نفسي بنفسي، إزاي أغيرله وأشيله وأهديه..

وحسّيت بالتعب اللي بجد سبحان الله في المرة الثانية..

تعب الحمل مع طفل بيتعلم يقلع البامبرز وأم بطنها قدامها 5 متر كان بيخليني أحسّ قد إيه أنا ضعيفة ومحتاجة أمي وأختي معايا..

كنت لما نفسي تغمّ عليّ، برجع وأقوم في لحظتها أجيب لابني الأكل عشان ياكل.. كنت ببقى دايرة جدّا بس لازم أكون مصحّحة لحسن ابني يعمل حاجة غلط أو يحتاجني في حاجة..

جوزي كان شايل معايا وكنت بصعب عليه جدّا، وأنا بقعد ابني على البوتي وأنصف وراه وأشيله كل نص ساعة وأحايله وأنا أصلاً مش شايفة خطوتين قدّامي..

ده غير بقي تغيّر الهرمونات وسنينها، فجأة تحسّني إنك هتموتي وتعيّطي.. فجأة أحسّ بخنقة أو نفسني مكتوم. جوزي كان مش عارف مالي وفيّا إيه ويعملي إيه وأنا كمان مكنتش فاهمة إيه اللي بيجرالي.. بس الحمد لله كنت بدعي ربنا يقويّني..

الغربة مش سهلة خالص، ربنا يعلم إن في أوقات الواحد بيحسّ فيها إنه أضعف ما يكون وإن محدّش حاسس بيه ولا هيفهم الضغط اللي هو فيه.. الناس فاكراك مقضيها فُسح وخدم وحشم، وما يعرفوش حياتك ماشية إزاي..

الغربة مش مولات وفسح وشوبينج وبس، ليها ضربيتها.. وليها قسوتها وبرضه ليها حلاوتها..

يعني أحسن حاجة اتعلمتها من الغربة إنني عرفت قدراتي بجدّ، عرفت إنني الحمد لله بستحمل وبعاقر ولما بقع بقوم ثاني في سن صغير غيري فيه لسّه معتمد على باباه ومامته بنسبة 100%..

اتعلمت تحمّل المسؤولية كاملة زي ما الكتاب بيقول، بكل حذافيرها..

عرفت يعني إيه خلوا بالكوا إنتوا مالكوش غير بعض يا ولاد اللي الأهالي بيقلوها..

عرفت يعني إيه الزوج والزوجة يحلّوا مشاكلهم بينهم وبين بعض من غير تدخل من حدّ...

الغربة هتعرّفك قيمة البيت والأسرة ويعني إيه إحنا في مركب واحدة..
ويعني إيه الدنيا بحلوها ومرّها وضحكها وبكاها..
وقدّرت قيمة التربية والتعب في التربية، وإن ولادك لازم تتحمّلي إنتي
وجوزك مسئوليتهم من الألف إلى الياء.. من أول لحظة يتولدوا فيها.. مش
واحد يرّبي والثاني بيتفرج ويعلق المشانق!
كفاية إنني عرفت مين الجدع معايا ومين النصّ كم..
بقيت بفهم في شخصيات الناس من نظرة ومن طريقة كلام ومن موقف..
تحسّ إنك زدت فوق عمرك خمسين سنة خبرة..
محدّش يستهون بالغربة ولا يفتكرها دلع..
الغربة مدرسة بجد، بس الشاطر اللي يستفيد فعلاً من التجارب اللي
بيعيشها فيها..
والجدع اللي يعرف إن كل حاجة بتوجهه بتعلمه وكل درس بنتعلم منه مش
بيعلم علينا.
الغربة مش غربة وطن وعيشة بره بلدك.. الغربة ممكن تكون وإنت قاعد في
بيتك وسط ناسك بس شايل نفسك في كل حاجة ومحدّش دريان بيك ولا
بيسأل عليك.. وإنت شايل الهمّ مع إن اللي حواليك ممكن يهونوا عليك،
بس ده مش بيحصل..
الغربة على قدّ ما بتقسي عليك بتعلمك حاجات تفيدك..
على قدّ ما هتخليكي إنسانة قوية بس برضه بتحسّسي بجوزك وولادك
وأهلك حتى لو بعاد عنك..
الغربة ممكن تقربكوا أكثر ما إنتوا فاكرين وممكن تبعدكوا لو إحساس الوجد
بتاعها سيطر عليكوا..
وأخيراً... الحمد لله على كل حال وكل سيناريو حياة بنعيشه.. الحمد لله
حتى يبلغ الحمد منتهاه...
توقيع أم مغتربة..

"البريبيء إنترناشونال سكول"

التريند اللي ماشي دلوقتي إن ولادك لازم يكونوا في "البريبيء" إنترناشونال
سكول.

مش مهم البريبي ده يطلع إيه.. المهم إنها إنترناشونال سكوول وخلص.
في ناس مديونة عشان السبب ده, عشان شكلهم وبرستيجهم.. مش عشان
مستوى أفضل من التعليم لولادهم!
لو ظروفكوا ما تسمحش مش لازم ابنك يروح المدرسة أم 70 و الـ 100 ألف جنيه
خالص..

لو دخلها مش هيطلع رائد فضاء زي ما إنتي فاكره.
مش هيجراله حاجة لو مدخلش المدرسة البريتش اللي في التجمع.
مش هيستفيد حاجة بحفلة الهالويين وإنه يلبس قرع غسل وتلبسي لبس
الساحرة الشريرة في الحفلة كل سنة, الموضوع هيبوخ..
العربي والإسلاميك اللي هو الدين سبب مهم إنك تختاري المدرسة مش
تطلعها من حساباتك!!

الولد مش هيطلع معقد لو مطلعش روما في كامب المدرسة اللي في الشتا..
ومش هيحسّ بالنقص لو مراحش برشلونة في الصيف وهو في جريد تو!!
مش لازم يبقى معاه 8 ولاد بالكثير في الفصل عشان يتعلم كويس..
لو اتكلم عربي مش هيجيله جرب, لازم تفهمي النقطة دي..

المدرسة ما اتخلقتش عشان تعلمه الشيش وكرة الماء والتزحلق على الجليد يا
إما تبقى يااي ودون المستوى!
لما يتعلم سباحة وكرة قدم وطايرة فا ده مش عيب في المدرسة فا تدوري على
غيرها..

عدد فدادين الملاعب وعدد حمامات السباحة الأولمبية مش أهم عنصر في
اختيار المدرسة زي ما فهموكي.
ابنك مش لازم يتعلم جولف في أولى ابتدائي, ما تخافيش عليه هيعيش برضه..
عادي لو أصحاب ابنك مصريين, وعادي لو مدرسينه مصريين وشاطرين. مش
عيب ولا حرام.

مش لازم تدفعي بالدولار واليورو, عشان تثبتي لنفسك إن مدرسة ابنك أحسن
مدرسة!

التعليم عمره ما كان منظره!

المدرسة مش بتدخلها عشان تنتططي بيها على خلق الله!
لو مش مدخلة ولادك إنترناشونال عشان يتعلموا صح ويشغلوا دماغهم بدال
الحفظ والصم يبقى خسارة الفلوس اللي بترميها على الأرض!

ياما أجيال اتخرجت من مدارس خاصة وتجريبي وتفوقوا في دراستهم في جامعات بره مصر وجواها!

العبرة بالأهالي وبالتفكير اللي بيزرعوه جوّه ولادهم.

الأهل همّا اللي بيخلّوا ولادهم يبصّوا للمدرسة على إنها منبر للعلم واللا فشخرة من ضمن الحاجات اللي بقينا بنتفشخر بيها !

"التمس لأخيك سبعين عذرًا"

الكام سنة اللي فاتوا فهموني الناس أكثر..

خلّوني أقدر أعذار كنت بفتكرها مجرد مبررات بتتقال عشان أسكت وخلص.

فهمت لما حدّ كان يقولي أصل مديري مزهّقني وملقّني حوالين نفسي.

فهمت إحساس واحد مش طابق شغله بس لازم يكمل عشان وراه التزامات في رقبته.

عرفت يعني إيه couple ما يخرجش معانا أو يقرّروا على آخر لحظة إن فلوس السفر دي الأولى تتدفع في بند تاني عشان وراهم مصاريف بالكوم, وإنهم مش بيعملوا كده غلاسة..

فهمت إزاي اللي لسّه مخطوبة أو متجوزة أو والدة بتكون مش قادرة تركّز مع

اللي حواليا زي الأول.. وإن لازم نحترم الإضافة الجديدة اللي بقت في حياتها..
فهمت وقدرت تعب أمّ عاملة مسحولة, محتاجة 10 أيدين عشان تقدر تخلّص
اللي وراها وعايزة صحة 3 سنات مع صحتها عشان تقدر تنجز اللي عليها...
عرفت يعني إيه واحدة سهرانة طول الليل فا مش شايفة قدامها بالنهار فا نسبة
تركيزها مع صحباتها قلت بس كل ده غصب عنها...
عرفت يعني إيه واحد في غربة وشايل نفسه من الألف إلى الياء، وساعات كتير
أوووي محدش بيحسّ باللي جواه..
أو إرهاق بنت بتحصّر دراسات عليا ومش شايفة قدامها..
فهمت توتر شابّ وشابّة مش لاقيين نصّهم الثاني وكل الناس بتقولهم هاا
هنفرح بيكوا إمتى؟
فهمت تفكير أبويا وأمي في مستقبلنا وفي تعليمنا..
فهمت ليه أمي كانت شقيانة في تربيتنا وكانت مش بتعدّي أيّ حاجة غلط
نعملها..
فهمت شعور الواحد لما يفقد عزيز ويبقى شايف الدنيا سودا واحترمت عزلته.
عرفت يعني إيه واحد خايف على ولاده في الزمن ده وقدرت توتر كل أب وأم على
ولادهم.
عرفت يعني إي واحدة حاسّة بالوحدة فا تعوّدت عليها ومش قادرة تخرج من الجو
ده.
قدّرت إحساس واحد مش لاقى نفسه في أيّ حاجة بيعملها وحاسّس إن
أحلامه حاجة وحياته حاجة تانية بعيدة خالص.
قدّرت ألم حدّ خرج من علاقة وهزّته من جواه حتى لو عامل فيها إنه قوي وجامد..
بس من جوّه هو متأثر ومجروح..
فهمت إحساس واحدة عندها خلافات زوجية أو مشاكل عائلية..
قدّرت لو حدّ عنده مريض في بيته وبيرعاه وإن حموله كتير.
فهمت يعني إيه أصلي مليس نفس أتكلم..
مليس نفس أخرج..
مليس نفس أعمل أي حاجة وهخشّ أنام...
الجمل دي بالذات كانت بتزعّليني أوي، ومكنتش بحسّ باللي وراها، وكنت
بنسى صاحبتى اللي قالتها أكيد قالتها لأنها تعبانة وزهقانة ومخنوقة...
كنت بنسى صاحبتى، وأركّز بس إنني أزعل وأتقمص..

عرفت إن عادي الواحد يكون قرفان وزهقان ومخنوق، ويبقى مش قادر يختلط
بحدّ وعاييز يقعد لوحده.. عرفت إن عادي ممكن أهرب.. ممكن ما أحبش أتكلم ولا
عايزة حدّ يقولي مالك مليون مرة..

احترمت فكرة الهروب في بعض الأوقات.. وعرفت إن الموضوع مش شخصي..
معظم الأوقات الناس بتكون مش بتتدلع.. الناس مضغوطة فعلاً..

قِلة المكالمات أو قِلة التواصل مش دليل إن الناس وحشة والله، الدنيا هي اللي
بقت صعبة أوي ولاهية الناس ومحدّش عارف إيه اللي جوّه الثاني..

الدنيا مش مستحيلة نيجي على بعض، كفاية إن حاجات كتير تاني بتيجي
علينا..

صدق اللي قال اللي يشوف بلاوي الناس تهون عليه بلوته.. في ناس بيبقى
جواها بلاوي فعلاً بس ما بتقولش..

مش هنيجي إحنا ونعاقبهم كمان إنهم بيستحملوا، وإن دي طبيعة شخصيتهم..
بلاش نزود مشاكل بعض بدال ما نهونّها، حقيقي الدنيا مش ناقصة!

"إنترفيو المدارس"

اتفضل يا فندم.. اسم ابن حضرتك إيه؟

* آدم

- حضرتك مقدم له إيه؟

* إن شاء الله KG1

- حضرتك بتشتغل إيه؟

* مهندس ..

- فين؟ هنا واللّا برّه مصر؟

* هنا.

* بتقبض بالدولار؟

- لأ.

* بتاخذ كام في الشهر؟

- نعم يا خويا... قصدي نعم حضرتك.. ليه يعني؟!

* عشان نعرف دخل حضرتك يكفي أقساط المدرسة واللّا لأ ...

- هيكفّي إن شاء الله، يا إما مكنتش تعبت نفسي وجيت من الأول ..

* مش ناوي تسافر تحسّن دخلك؟

- هو حدّ اشتكالك يا سئيل يا رذل !!!

- * بتحوّش كام؟
 - هعمل نفسي مش سامع عشان ما ضايقكش ..
 * مشتركين في كام نادي؟
 - كااام نادي؟ هي النوادي بقت بالكبشة اليومين دول...هوّ نادي واحد وادي دجلة ..
 * وساكنين فين؟
 - الجيزة.
 * ليه الجيزة؟
 - هو إيه اللي ليبييه؟ مزاج أهلي كده، قصدي مزاج أهل حضرتي كده... بحبها.
 * يا ريت حضرتك تـ watch your tounge
 - يا ريتك إنت اللي تواتش اللي طالع من بقك يا حبيبي ...
 * ليه مش ساكن في كومباند زي ما الأهالي بتعمل؟
 - زي ما قولتلك... مزاج أهل حضرتي كده ..
 * عندكوا كام عربية؟
 - عندنا أسطول فيراري على لامبورجيني... ولما بزهب بـكروز بالهليكوبتر بتاعتني.
 * حضرتك بتهزّر...طب موديل العربيات إيه؟
 - 2014
 * يااااه.
 - معلىش استحمل قارفينك معانا !!!!
 * موبايلك؟
 - 01076...
 * لا لا لا. قصدي نوعه؟
 - جلاكسي نوت.
 * آيفون أحسن ..
 - معلىش إنسان غبي تقول إيه!! معرفش مصلحتي كويس !!
 * طيب الأم بتشتغل فين؟
 - ربة منزل.
 * ليه؟
 - هوّ إيه اللي ليه، وإنت مالك؟.... ما تخليش الواحد يطلع من هدومه بقى.
 * بتقضوا الإجازات فين؟
 - السخنة والساحل.
 * مش بتروحوا برّه مصر ليه؟ الولاد تاخذ culture بلاد تانية ..
 - أنا بحب culture مارينا وشواطئ السخنة والولاد بياخدوا tan ما تقلقش عليهم... اعذرني أصلي إنسان رجعي ومتخلف... بس أوعدك السنة الجاية هطلع بيهم

- على المالديفز ..
- * عندك عقارات... أملاك... أراضي؟
- عندي طين.. طين كثير في البلد .
- * الطفل بيتكلم إنجليش في البيت؟
- آه يعرف شوية كلمات، وبيفهم الجمل البسيطة ..
- * ما يعرفش يفهم اللي بيتقال في ناشونال جيوغرافيك؟
- لمّا تبقى إنت تعرف، أوعدك هو هيعرف ..
- * ابنك معاه بطولات؟
- آه بطل العالم في الكشط والرفص والشلايت... ينفع؟
- * ابنك معاه لغات؟
- بيتكلم إسباني ويوناني حلو أوي وياباني مكسر..
- * حضرتك بتهزّر؟
- لأ بستظرف ..
- * عندكوا ولاد تاني؟
- ثلاثة..
- * كتير أوي.. ليه؟
- يا بني ما تلعبش في عدّاد عمرك معايا، والله العظيم أنا على أخري من أم لبيبيه دي !!
- * بس كده الطفل هيبقى مستواه أقل من صحابه !
- همّا مش صحابه كجي 1 برضه، وكانوا لسّه قالعين البفتة من شهرين باين!!
- مستوى إيه يا أبو مستوى ..
- * سوري بس بعذر لحضرتك، لا ابنك ولا أسرتك مطابقين للمواصفات.. اللي بعده
- طب وفلوس الريجستريشن؟
- * لا تردّ يا فندم.
- لا إبيبيه يا روح قلب الأفندم!!!! يعني أنا سايبك تستغبي وتسالني أسئلة مراتي بذات نفسها لا تجرؤ تسألها لي وعدّيتها ...
- حسّستني إني جاي من ورا الجاموسة وعدّيتها ...
- لكن فلوس الريجستريشن دي يمين بعظيم ما أنا ماشي غير وأنا واخدها على داير مليم ...
- إنتوا فاكريننا داخلين الجنة يا أخي ...
- أخذ الفلوس منين بدال ما أجرسكوا على الفيس بوك، وساعتها هتقولولي أبوس إيدك هاتلنا آدم وأقولكوا ما أستنفضش... أخدها منين.... إخلللللص ...
- * تاني باب على إيدك اليمين يا باشمهندس..
- دلوقتي بقيت باشمهندس!! ناس تخاف ما تختشيش!!!

"مفيش مشكلة خالص ... "

الموضوع بسيط خالص..

هاتلها 5 سفرجية و4 طباخين ونانيز على قدّ ولادك و 5 ينضفولكوا الفيلا:
"يعني إتبست في فيلا"، وإعملها عمليات تجميل في أمريكا وهاتلها
لبسها من باريس وفريق متخصص للـ make up والباديكير والماني كيور
وللبس وللمحافظة على وزنها.. وسافروا كل شهر هاواي أو فرنسا عشان
المدام تغير جوّ وتروّق أعصابها..

وبعد كده إبقى قارننها بنانسي عجرم واللا بالست كيم كارديشيان على
راحة راحتك!!

إحنا ولا مؤاخذة لمّا بنحطّ قلم كُحل على ماسكرا وبنجيب صبغة لوريال من
صيدلية سيف شكلنا بيتغير وينقى حاجة تاني خالص فما بالكوا باللي
بينفخوا ويحقنوا ويشيلوا من هنا يحطوا هنا وكل يوم في السبا وعندهم
عشرة بيعملولهم باديكير ومانيكير!! وماساج ويوجا والحاجات الحلوة دي..

الفنانة لو زهقت من شعرها بتكلم الكوافوووور بتاعها بيجيلها بالطيارة
يحطّلها إيكستنشن ويرجع صدّه ردّه، أو يحلقّلها زلبطة ولو معجبهاش
بيطوّّلها شعرها تاني لحدّ ضررها في نفس اليوم...

لو زهقت من لونه وعايزة كل خصلة بلون بيلونلها أبوه..

لو عايزاه لونه أصفر وفيه كاروهات رمادي بيقولها من عنيا...

كله بالفلوس بيفك..

تركيب رموش مروحة ماشي... تغيير لون حدقة عين وقزحية قشطة.. إدي
جسمي لون برونزاج في ربع ساعة ما يضرّش... عايزاه أبيض لون الزبادي
مممكن..

عايزه فستان زي اللي كانت لابساه فلانة في الأوسكارز آخر مرة، فا تروح
مكلمه مسيوووووو إيلي صعب يعملها هوا وييعتهولها في الطيارة ومعاه
10 فساتين احتياطي اتلبسوا في الإيمي أوورد ...

لو حبتّ تخرج وتروح أي حنة ما بتفكرش هسيب الولاد مع مين ولا هتنتع
على قلبها شنطة بيبي وزنها 10 كيلو...

وسيبك من كل ده كفاية إن مراتك بتسهر بعيال ودي كفيلة تعملها 2 طن
هالات سودا فحم تحت عنيتها، وتقوم الفجر عادي جدااااا تفطر الولد عشان
يروح المدرسة وتوصله وتشوف هتتغدوا إيه وتلمّ الغسيل وتطبخ وتغسل
المواعين وتذاكر وتحمّي وتلبّس وتقلع وتلاعب، وفي النهائية بتبقى لابسة
حلو ومهندمة وريحتها حلوة...

ما ليش دعوة بالستات اللي ريحتها بصل 24 ساعة، ولا اللي قاعدة
منكوشة طول اليوم لأن الكلام مش ليهم..
أنا بتكلم على الستات الوسط الحلوة، اللي شبه بنات كتير في مصر..
هات لمراتك حدّ يشپيل عنها المسئوليات دي، وخليها تفضى لنفسها كل
يوم تصبغ وتنفخ وتركب رموش من غير ما تكّرّع ولا ابنك يعمل عليها بيبي أو
يدلق عليها الأكل وهو بيلعب ولا تمسح مكانه فا ضوافرها تتكسر،
وساعتها هقولك ليك حق تقارننا بنانسي وما نانسيش..
أنا عارفة إن في رجالة مقدّرة وفاهمة ومراتهم عندهم بالدنيا ومش
شايفين غيرها.. بس في رجالة بتقارن مراتها بمغنية أو رقاصة، مش فاهمة
من أنهي اتجاه الصراحة!!
هي عمرها ما قالتك عايزاك شبه عمر الشريف.. اتصرف!!!
يلا اعملّي الحسنة بتاعته عشان بحبّها مثلاً!!!
واللا عايزاك شبه توم كروز وتقاطع براد بيت ووسامة جورج كلوني.. ومش
هقبل بأقل من كده..
استهدوا بالله كده.. وقوموا صلّوا ركعتين.. عشان الشيطان شاطر..

"صراع البوتي"

ما تبقاش إنت والبوتي عليها!
سيبها!
تنفّس عن نفسها شوية.. اللي بتشوفه مش قليل!!
مراتك بتتعامل مع أنيل عمليه حيوية بيعملها البني آدم.. بتتعامل مع بيبي!!

عارف يعني إيه بيبي؟!!

أديك قشعرت وقرفت وإنّتى بتقرا وقاعد على الكنبه زي الباشا!!
بتعلم كائن حي صغير غالبًا بيكون عايز يستفّزك وبالأارد إنه يقلع البامبرز..
البامبرز اللي واخذ عليه كأنه حتة من جسمه.. اللي متعلق بيه أكثر من أخته
الكبيرة.. ومنك إنت شخصيًا.. بيحبه بجدّ مش بهزار..
بداية الرحلة إنها بتجربّ تلبسه بانتي مشمّع... تلاقيه ولا فارق معاه مبلول زي
مش مبلول.. متوسّخ زي نضيف مع إن المسكينة افتكرته هيقرف... بالعكس ابنك
حبّ الموضوع كده أكثر.. شايف الكارثة.. متخيّل الخيبة الثقيلة..
متخيّل الأرف..

هي اختارت المشمّع عشان حضرتك شارط عليها ما توسّخش البيت وما
تشمّش أي ريحة وحشة، ويا ريت ما يتعلمش أصلًا.. لو عليك يقعد بالبامبرز لحدّ
إعدادي عشان تريح دماغك..
الحل الثاني.. الملط..

تلاقي ابنك ماشي زي البطة المنتوف ريشها في الشقة، وما تسألش ريحة
الحمامات العامة دي جاية منين.. بقولك ابنك بلبوسة!!
بلبوووووووووصة..

لمّ السجاجيد وخطّ مفارش وحطّله بوتّي على بعد كل 5 خطوات.. ومامته
هتقعده كل 10 دقائق وهيعمل أول ما يقوم من على البوتّي.. على أنتريه بقى
على باركيه على ستارة... إنت ونصيبك..
إلبس كمامة، هنعملك إيه طيب..
ما هو لازم يتعلم...

الاستفزاز بقى لما يفهم إيه المطلوب منه بعد فترة، وبيعد لمجرد إن كيفه
كده..

وهي تمسح وتنصف، والديتول بيبقى في أيدها 24 ساعة.. ويستخبي منها
عشان يعمل على نفسه، وتحلق عليه كأنها بتحلق على فرخة..
فا مش وقته خالص تقولها البيت مكركب ليه أو الأكل اتأخر ليه.. أو تستغرب هي
متعصبة ليه..

هي بسّ غيرت لابنك 50 مرة وشغّلت الغسالة 20 مرة ونشّرت ومسّحت الأرض
ونصفت بوتّي وتواليت، وعمالة تقنع في واحد ولا باصلها أصلًا بحاجة هو مش
مقتنع بيها ولا عايز يقتنع...

تخيلت؟!!!

إنت لازم تساعد.. ما تتفرجش بس وتقرف...

هو ابنك زيّ ما هو ابنها..

شيل طلباتك وشاركها معنويًا ..

في رجالة مش عايزة **دوشة** ، فا مش فارق معاها أيّ حاجة تخصّ ولاده.. وكده ما ينفعش..

ما تكونش سبب لتراجع مراتك عشان مش بتحبّ وجع الدماغ..

هي مش ناقصة إحباط أبوس إيدك....

هات أكل معاك وإنت جاي.. اعملّها واعملّك شاي..

حلّق معاها على ابنك..

وركّز معاها عشان لو لقيتها هتشنق نفسها بسالوبيت ابنك وهتبقى متدلّدة من مروحة السقف، لازم تفصل القوات وتأخذ ابنك بعيد شوية..

الموضوع مُرهق ومُقرف..

وربنا يعين كل أمّ تعديّ المرحلة اللذوذة دي بنجاح وفي أقصر وقت.. ويهدي كل بطة منتوفة تتعلم بسرعة وما تعصلجش..

"ما تستعبطيش"

ما تتقربيش لراجل وعارفه إنه متجوز، ما تتسهوكيش وتمثلي عليه، ما تتصليش بيه... احترمي نفسك!

ما **تخديهوش** من بيته ومراته وعياله، وتقولي وفيها إيه؟!!

فيها كتير... فيها خراب بيوت.. تعرفي يعني إيه خراب بيوت؟

عايزة منه إيه؟!!

ما تستعبطش.. إنت بتخرب البيت وعارف إنك بتخربه، كلامك معاها واهتمامك بيها آخرته إيه؟

مراتك وضعها إيه وسط الأرف ده كله؟ إنت فاهم إن ده آخره خراب.. مكمل فيه ليه؟

لو كنت صديتها مرة والثانية كان الموضوع انتهى، حتى لو صديتها عشرة، إنت اللي استسلمت واستسهلت!

من البداية أنا مش بتكلم على الزواج الثاني مش هنتطرق لموضوع التعدد
خالص عشان ما ندخلش في متاهات..

أنا بتكلم على الخيانة... بتكلم على ستات بتخرب بيت!

بتكلم على رجالة سمحت تخون وتخرب بيتها بإيدها وفتحت سكة!

بتكلم على مراتك اللي مأمالك وبتتخان!

بتكلم على التلات عناصر دول, عنصريين اتحدوا لخيانة التالت.. بغض النظر عن
نسبة مشاركة كل عنصر... في النهاية اسمها خيانة..

إنت اللي فتحت الباب أو سييته موارد..

إنت اللي استجبت أو اللي فتحت السكة من الأساس..

إنت اللي حطيت بيتك ومراتك وولادك في الموقف ده..

إنت اللي نسيت إن مراتك أمانة، ونسيت وعدك لأهلها إنك هتحافظ عليها..

إنت اللي كنت المفروض تفرمل. إنت راجل مسئول مش واحد ما يعرفش الصح
من الغلط..

وإنتي ما تخربيش البيت وتقولني نصيبه كده.. إنتي اللي بتخربيه ومقررة تخربيه..

ما تخربش البيت وبعد كده تخلق أعذار ومبررات عشان شكلك ومنظرك قدام
الناس..

وإنتي لو كنتي محترمة ما كنتيش هتفكري تشدّي انتباهه أو تحسّسيه إن كلك
مميزات..

مكنتيش هتهتمي بتفاصيل ما تخصّكيش عشان تعرّفيه إنك أحسن من مراته..

احترمي نفسك قبل ما تحببي اللوم على ستّ قاعدة في بيتها بتخونها
وخليتي جوزها يخونها!!..

أنا مش بلوم الستّ اللي بتعمل كده بس، بلوم الراجل اللي بيستجيب.. اللي
بيتناسى إنه متجوز...

اللي حتى لو مراته فيها عيب فاحله مش الخيانة..

وغالباّ اللي بيستجيب بتكون عينه فارغة، بيحاول يطلع أي عيب في مراته
عشان منظره بس.. أو بيخلق عيوب وهمية..

كلنا فينا عيوب ولو الخيانة هي المخرج يبقى دي بقت غابة, كله يخون كله
وعلى عينك يا تاجر.

حتى لو مراتك قصرت معاك قومها بهدوء واشتري بيتك, محدش فينا معصوم من
الخطأ..

لو جربت كل الحلول وفشلت معاها فا ده موضوع ثاني وساعتها يبقى ليك حق
تشوف حياتك مع حدّ ثاني, بس بالأصول مش بالخيانة.
في فرق كبير أوي..

لكن ما تكونش محترمة وغلبانة وتتمنالِك الرضى وتعرف عليها واحدة أيّا كانت..
أيّ طرف حاسس إنه مش مرتاح يتكلم مع الطرف الثاني، ما يستناش لحدّ ما
يبقى بيتلكك عشان أي واحدة تديله سكة ينجرِف معاها.. ويغلط معاها أو
يتجوزها على مراته!!
اتقوا الله في بيوتكوا..

اتقي الله في مراتك اللي إدتك ثقتها وعمرها وصحتها..
وإنتي اتقي الله في بيوت غيرك..

ما تبنيش سعادة مؤقتة على تعاسة الآخرين..

والأيام دول, اللي بتعملية في بيوت الناس هيتردلك في بيتك..

الكسرة اللي كسرتها للست دي والخيانة دي هتتردلك..

في ملايين مش متجوزين مش عارفة ليه بيحلى اللي متجوز وعنده بيت وأسرة
!!

البيوت فيها مشاكل وده العادي، ولازم نعدّيها بالتفاهم والحب مش بالغدر..

موضوعنا إن اليومين دول خراب البيوت بقى كتير أوي وسهل أوي!

موضوعنا مش مين غلطان أكثر.. البنت اللي بتتسهوك واللا الراجل اللي
استجاب؟

موضوعنا إن يمكن حدّ من الاتنين يقع في إيده الكلام ده ويراجع نفسه..

يمكن ضمير حدّ فيهم يصحى ويعرف إن خراب البيوت ده حاجة صعبة أوي.. وإن
عواقبه أصعب وأصعب.. ده الهدف من الكلام.. يمكن الكلام ده يفوق حدّ.. يمكن!!

"دليل البنات للمُحن والأفورة والحركات"

- ارزعي "إنتي إزأاااااااي" قبل أي جملة..

إنتي إزأااااااي حلوة كيبيدأااا؟

إنتوا إزأااااااي لايقين على بعض كيبيدأا؟

إنتي إزأااااااي كنتي "كيوتة" في فرحك كيبيدأااا؟..

- حظّي صور شباب بدقن وسكسوكة وموديلز بيلوفرات وكرافئات وتفاحة آدم واكتبي فوقها هيبيييح، ولأن الحلال أجمل سأنتظر وبوستس شاب بيلبس بنت جاكيت جده الله يرحمه عشان الجو برد واستمرّي بقي. دي حركات البنات اللزجة اليومين دول.

- كل يوم لازم تكتبي ستاتس إن طيبة قلبك مودياكي في داهية، وإن حنية قلبك مطينة عيشتك وإن اللي زيك انقرضوا مع التنين المجنح...

- الكلمات دي استخدمها كتير: "بث خلاث... حبيكي أنا.... إنتي طيووبة، كيوتة، حدّ عسّول مووت، قمراية ونواراية وعمري أنا وحياتي يا ناااااس، خلااااااااااا.."

قولي أي كلام على الوزن ده بيقتضي الغرض.

- في نوع ثاني اتهرس من زمان: "قمصانة، زحلانة منك، مش تحب غيري، أحبوش، مش أحب".. حاولي تجدّدي بقي.

- لو خطيبك قالك حاجة مش عاجباكي قولي: "تؤؤ تؤؤ" وساعتها ردّ الفعل هيكون على حسب شخصيته، في ناس بعد التؤؤ دي بتفسخ الخطوبة في لحظتها وبيطوحوا الدبلة بعزم ربنا ما إداهم في النيل، وفي ناس بتضطر تكملّ عشان كتبوا الكتاب ودي أعراض ناس.

- بربشي كتير، كتير أوي، وركّبي رموش عشان لما تبربشي تلاقى حاجة بتتحرك، إنتي رموشك واقعة أصلاً ما تمثيلش، بس تبّتي على الصمغ كويس لحسن يوقعوا ويلزقوا في مناخيرك وإنتي مندمجة في البربشة وتبقى فضيحة.

- لما حدّ ياخذ رأيك في حاجة خصوصاً لو ولد قوليله وهميبيبي بجدّ، توووووحفة مووووووت، أمااااااازينج بشكل عجيب!! وبرّقي جامد عشان الانبهار بيقى واخذ حقه بس لو حسيتي إنه بدأ يخاف منك إهدي شوية ولمّي الليلة..

- ضمّي في شفايفك كده زي الفنانة القديرة ميّ عز الدين في كل أدوارها تقريباً وطلعي الكلمة بالعافية، كنوع من الرقة، بسّ حاسبي ساعة الجد

تفتحي الجعورة وتتكشفي لو اتخانقتوا.. ركزي أبوس كوعك..

- خليكي أوفر في أي ردّ فعل: "صرّخي، دبدبي على الأرض، اتمرغي في الوحل"، خلي رياكشنك يعلم مع الناس. لو قابلتي واحدة مشوفتيهاش من يومين إجري عليها واحضنيها لحدّ ما تكسري قفصها الصدري وقوليلها وحشتيبييني يا مجرررررررررررمة وفرّجوا عليكموا الحرم الجامعي، يمكن الشاب اللي هتموتي عليه يعبرك من أفورتك..

- خلي الكافر فوتو بتاعتك حاجة من نوعية: "أنا البنوتة اللي لما بصحي من النوم ببقى قمر 14" أو "أنا الفتاة التي يعشق حبيبها تراب رجليها وأشف إيديها"، بس مليس دعوة باللي هيعملوك بلوك، أنا بقولك ع السكة وخلص..

- خلي بوستاتك لصحاتك كده..

mayyoyaaaaaaaaa a7laaaaa banooooota felllllll donyaaaaaaaaaaaaa *
bamoooot fekyyyyyyyyyyyyyyyyyyyyyyy

ومعرفش ليه بيعملوا كده، بس باين ده دليل الحب والمُحن، الاتنين سوا...
أي واحد يلاحظ أي حاجة من الأعراض دي على بنت يعرفها، يقطع معاها غلطول وما تنساش تعمل بلوك من الغيس بوك والواتس أب واللاين...عشان تبقى سدّيت البلاعة كويس..
أفورة تقلب البطن بصحيح!

"إنت بطل حياة ولادك"

ابنك لو شافك داخل من باب الشقة وما سابش اللي في إيده عشان يجري عليك ويعملك فرح ويقول بابا جه بابا جه....
أو حتى مش ملاحظ وجودك من عدمه وما فرقش معاه يقولك إزيك يا بابا وكمل لعبه عادي..

يبقى في حاجة مش مضبوطة في علاقتكوا كآب وابن..
لازم تراجع أوراقك, إوعى تطنش!
دورك في حياة ولادك عمره ما كان مادّي وبس..
إنت مش ماكنة ATM وخلص !!
طبعا الحياة صعبة وطلبات عيلتك مش بتخلص وربنا يعينك..
بس ما ينفعش كل علاقتك بابنك تكون من خلال مامته..
من خلال سؤال في التلفون..
هما كويسين؟ هما كلوا؟ محتاجين حاجة؟ هو نجح؟
هتفاجئ بأخبارهم زيّ الغريب بمرور الوقت..
لازم يكون في عالم خاص بيك إنت وولادك, مفيهوش حدّ غيركوا..
جربت مرة تاخذ ابنك في حضنك وهو بيعيط وتهديّه لحدّ ما ينام, إحساسك إنه
ارتاح وهدى معاك هيقربكوا من بعض أكثر..
بدل ما تشتكي من زنه وتسيب الأوضة وتمشي إلعب معاه.. حايله... ده ابنك زي
ما هو ابنها..
افتكر وإنت صغير كان نفسك باباك يلعب معاك إزاي وقت أطول وإعمل ده مع
ابنك.. هاتله كوره وإلعبوا سوا وخليه يجيب فيك جوون ويفرح ويقلدك.. هتشوف
نفسك جواه.. هتشوفك وإنت صغير جوه عنيه..
جرب واتفرّج معاه على الماتش بدل ما تنزل مع صحابك هيقلدك في انفعالاتك
وفرحتك بالجون..
هتحمسّ إنك بتشوف ماكيت صغير منك بيمشي على رجلين..
جربت تسرحّ لبنتك شعرها مرة وتقولها إنها جميلة..
كلمتك دي هتديها ثقة في نفسها متتصورهاش..
جرب وانزل لعالمها وإلعب معاه بعرايسها ومطبخها واعمل إنكوا صحاب..
هتقضي وقت ممتع أكثر من وإنت بتلعب بلاي إستيشن مع صحابك.. لأن فرحة
بنتك بلعبك معاه إحساس فيه متعة محدّش يقدر يحسّسها لك غيرها..
هتبقى مشتاقه ليك كل مرّة تدخل أوضتها.. مستنياك تخبط عليها وتعملك
الشاي في الكوبايات البلاستيك بتاعة عروستها وتترمي في حضنك..
خد ابنك اللي عنده 4 سنين يصلّي معاك واخرجوا سوا..
كانه صاحبك... هاتولكوا فشار وروحوا فيلم كرتون بيعبه.. وشوف فرحته ساعتها..

إنت اللي هتحتاج تكرّر الخروج دي لأنك اتبسّطت أوي أكثر منه..
مامته مش هتعرف تعلّمه كل حاجة..
في حاجات لازم إنت بنفسك تكون موجود بشخصك فيها..
مش حاجات تتحكّيك وأحداث تعرفها بعد ما تكون خلصت..
جرّب تكون صاحب ولادك قبل ما تكون البعبع اللي بيخافوا من زعيقه وعصبيته..
واللي بيضرب ومعدوش خلق يتكلم..
ما تحرمش نفسك من حضن ولادك ولحظات هتعيشها معاهم في سنّ مش
هيتكرّر ثاني عشان شايف ده مش دورك..
إنت مش خزنة بالنسبالهم..
ولا بنك فلوس بس.. ولا مارد بيحقلهم الطلبات..
ما تظلمش نفسك بالدور ده..
إنت بطل حياة ولادك..
خليك قدّها..

" إنه اللؤم يا سادة! "

- خسّيتي كده إزاي ما شاء الله.. روحتي لدكتور؟

• آه..

- اسمه إيه؟

• نسيته..

- طب حاولي تفتكري اسمه !

• حاضر..

بعد 5 أيام..

- ها افكرتيه؟

• لأ..

- طب حاولي أنا محتاجاه ضروري قبل فرحي !!

• صوت صرصور الحقل!!

- جبتي الشوز دي منين؟

• يااه تصدّقي مش فاكرة, ولادك عاملين إيه.. احكي لي؟
• كويسين، بقولك الشوز دي كانت من أنهي مول طيب؟

- مش من مول.. مقولتيليش أخبار ولاد أختك إيه؟

- !!!!!!!

- عندك حدّ يساعدي في البيت, هولد خلاص ومش قادرة أقف على رجلي؟

• لأ "وهي عندها جوه" !!

- هو نوع قلم الكحل ده إيه.. ما شاء الله تحفة؟

• معلش مش عارفة أجمع اسمه.. بستخدم أنواع كتير فوق بعض!!! "أي كلام في الهجايش".

- مش هو ده اللي حطيتي منه دلوقتي حالا؟

• لأ ده بتاع مرات أخو ابن عمتي نسيتته معايا.

- المكرونة جميلة طريققتها إيه؟

• بعملها عادي..

- عادي إزاي؟ دي جميلة..

• عادي زي ما بتتعمل!!

- آآآآآه يا زفته، آآآآآه !

- نمرّة اللي بتفصّلي عندها كام؟

- اتمسحت من عندي.. موبايلي اتفرمت .. موبايلي اتحرق في الفرن.. موبايلي وقع في المحيط الأطلنطي والنمر اتمسحت!!! واللي بفصل عنده هاجر جزر القمر!!

- بتجيبني لبس ولادك منين، أنا داخنة على لبس حلو والله؟

- من عند البريئ اللي هناك ده.

البنات اللي من النوعية دي.. أحب أقولهم حاجة, إنتوا فاكرين الخبث ده شطارة؟

مش عايزين منكوا حاجة بلا خيبة, بس المفروض الناس لبعضها يعني!!
قال رسول الله صلى الله عليه وسلم: "خير الناس أنفعهم للناس" و: " لا يؤمن أحدكم حتى يحب لأخيه ما يحب لنفسه" صدق رسول الله صلى الله عليه وسلم..

هتخسروا إيه لما تساعدوا غيركوا وتدلهم معلومة تفيدهم؟
بس تقول إيه نفوس ما يعلم بيها إلا ربنا!!

"واتس آب العيلة"

تمت إضافة:

ماما سوسو

تينة

خالتو منال

خالتو عبير

خالتو أمل

محمد ابن منال

نهى بنت عبير

خالو أحمد

أحبك ربي "خالتو عزة"

يارا بنت خالو أحمد الغلسة

خالتو منال: صباح الفل يا ناس يا أجدع من جنابن ورد وفلّ.

خالتو عبير: صباح ورود معطر بعوود على أجمل خدود والوز والكتكوت.

خالتو عزة: صباح القشطة يا ناس يا قشطة يا اللي طلعت بيها من الدنيا

والقشطة.

خالتو منال: تسلمي يا بيرو، إيه الكلام العسل ده يا زوزا.

يارا ونهى ومحمد شافوا الرسائل ومحدّش فيهم ردّ.

تينة: يا عبير يا واطية مجيتيش ليه إنتي ونهى تشقروا عليّ زي ما قولتي؟

خالتو عبير: والله يا ماما عبده إتحانق معايا وحلف عليّ ما أجيلك... هبقى أضيفه

هنا عشان تبستفيه.

خالتو أمل: لو صفات الشيف حمبوللا وأشهى الأكلات اتصل علي

09006655777... الدقيقة بـ 500 جنية.

خالتو عبير: آه والله الواحد زهق من الطبخ.

خالو أحمد: صدق أو لا تصدق.

حمار وحشي يلد بطة في المنيا... انقر على هذا الرابط لترى الفيديو:

WWW.virus_virus.com

خالو أحمد: شوفوه الحمار خَلّف بطة فعلا!

يارا ونهى ومحمد: شافوا المسدجات وقفلوا النوتيفيكيشنز.

خالتو منال: سبحان الله، ربنا كبير. هشوفه يا حمادة.

خالتو أمل: اللهم ارزق أحبتي الفرحة والسعادة.

خالتو عبير: لا إله إلا الله محمد رسول الله. إن لم تنشرها لمليار شخص

هتسخط سحلية يتيمة واعلم أن ذنوبك قد منعتك!

"فنّ اختيار الهدايا"

لمّا شيري عادل قالت في فيلم بلبل حيران: "فن اختيار الهدايا" مغلطتش يا جماعة.

في سوء تفاهم جامد أوي بين المتجوزين والمرتبطين في موضوع الهدايا ده.

هدّيكوا مثال..

الراجل يبقى عارف إن مراته بتموت في الورد وبتعشق الشنط وممكن يُغمى عليها لو اتعشيتوا برّه والستاف بتاع المطعم جابلها حتة كب كيك أو حتى واحدة نايتي وخطوا جواّها شمعة وغنّولها: انزل يا جميل في الساحة ورغم كده بييجي يوم عيد ميلادها ويطنش أو يعمل إنه اتشغل وده بيكون عقابه شنيع وهيقابل بوز عم شكشك في وشه..

أو بقى يجبلها حاجة من وجهة نظره إنها حلوة زي مثلاً طقم خشاف أو حلتين للمطبخ!! واللا سجادة للأوضة هي مش محتاجاها أصلاً ويستغرب هي مش منبهرة ليه ويحلف ما هو متنيها ويتخانقوا بدل ما يفرحوا! والستات عارفة إن جوزها مثلاً بيموت في البلاي إستيشن أو هي عملها قلبه هيقف من الفرحة لو جابتله سي دي فيفا 2016 أو إشترتله دواسات للعربية بدل ما العيال مبهدينها برجليهم ورغم كده ترزعه كب كيك من اللي عمره ما طلبه في عيشته أو تجيله بوكيه ورد وشمعتين ودبدوب أحمر من ضخامته واصل لسقف الشقة!

طب بدمتك يا شيخة متوقعة نيم الدبدوب في حضنه واللا يقفل نور الشقة وتعيشوا على ضوء الشمعتين؟ واللا يحرق أم الدبدوب بالشمعتين؟ ده مش جوهم خالص.

فا نريخ كل واحد يا جماعة, أكيد حفظتي جوزك وعجنتيه وهو حفظك وهرسك. فا نجيب من الآخر.

يعني نجيب لبعض الحاجات اللي الطرف صاحب الهدية يحبها مش اللي أنا بحبها!!

لو ملوش في البلاين ما تقطعيش نفسك نفخ... مش لازم..

لو مش بيحب المفاجآت.. بلاها.. عشان ما يجلكيش إحباط.. سيبه على راحته..

ملوش لازمة تحطيله الدبدوب اللي زيّ الغوريلا ده في الريسبشن وتقفلي أنوار الشقة وتستغربي هو اتسرّع ليه، وليه شتمك عشان كان هيتشل من الخضة! ما الخضة دي وحشة إن جيتي للحق! الراجل ما غلطش!

وإنت لو عارف إن مراتك بتحب الطرقة, أطرقلها مرة مش هيجراك حاجة..
لو بتحبّ التورتات والشمع والبلاين.. اتّجه علطول..
هاتلها الشنطة اللي لقحتك كلام عليها كل ما تعدي من قدامها, أكيد
بتلقح عشان تجيبها مش عشان تجيلها مطبقة يوم عيد ميلادها أو
مروحة سقف..
ريّحوا بعض وكل سنة وإنتوا طيبين..
هي مش هدية عشان تبقى عملت اللي عليك والسلام.
هاتها بحب.. الهدية لو حلوة بتفرح القلب بجد..
ما ترموش فلوسكوا في الأرض, وتعالوا على نفسكوا عشان تسعدوا اللي
بتحبّوهم.
والله ما صعبة!

"الصحوية والندالة دونت ميكس"

إمبارح كنت في مول لاقيت اتنين صحاب بيشتروا لبس..
فا واحدة منهم بتقول للتانية: "دي تحفة عليكى.. بجد وهمممممم..
فا التانية قالتها بس حاسّاها متخناني أوي..
فا ردّت عليها صاحبتها لأ بالعكس هو موديلها كده يهبل عليكى، وaaaa

بجد..

فا شدّني فضول البشراني أشوف إيه اللي يهبل ويجنن والتحفة ده ويا ريتني ما بصّيت على الواااو بجدّ ده..

البنّت قصيرة ومكلبطة الله أكبر وصاحبته جيبالها كيمونو طويل مدلدل على الأرض, بجدّ كان مخلّيتها بالونة.. مع إنها أمورة جدّا بس اللبس مش متظبط مع جسمها نهائي وأي حدّ يقول كده.

فا اتعصّبت من إصرار صاحبته إنها تقنعها بالعكّ ده..

ولقيت البنّت لوحدها جت سألتني وسألت بنتين تانيين وكلنا حاولنا نزوّق الكلام بس نقولها تدورّ على ستايل تاني أحسن.

فا البنّت صحبتها عمالة تقولها والله روعة ده تحفة هاتيه, ومتعصبة إننا بنقولها تشوف غيره, نظرات عنيتها لينا تحمل معنى ما تغوروا بقى أو عليكم اللعنة..

فا إصراري زاد على متابعة الموقف.. مش هسيبها تغرق الغلبانة دي معاه..

كل ده وف دخلة مامت البنّت اللي بتشتري لاقيتها بتقولها إيه الأرف اللي إنتي لابساه ده مخليكي زي الشوال, ذوقك إيه اللي جراه يا هبة.. مكونتيش كده!! كويس إنني نزلت معاكي, عايزة العريس أول مرة يشوفك تبقي مدهولة كده!؟

إقلعي.. إقلعي.. ده لو طفش كان هيقاله حق!!

كلنا بقى سمعنا عربيبيبيس وفتحنا بوقنا وجوانا كلمة واحدة, إخص عليكى يا ندلة إخص..

وصاحبة البنّت لوت بوزها خالص وبدأت تختفي من مسرح الجريمة تدريجيًا..

كان نفسنا نزرعها قفا ثلاثي الأبعاد والله من غيظنا على كام شالوت يطيروها برّه المحل..

الخلاصة..

صاحبتك الجدعة هي اللي تقولك قبل ما تشتري اللبس إنه بيتخنك أو بيرفعك..

هي اللي تتمالك الخير وتحبّ تشوفك حلوة ومبسوطة.

الواطية بقى هي اللي تقولك ده تحفة ومخليكي مزّة وتفضل وراكي لحدّ ما تشتريه وإنتي فيه شبه عجل البحر أو عود القصب المزعزع..

الصحوية بتبان في المواقف دي أوي.. خصوصًا لو في عريس.. حطّي تحت

وهطبخلك وأكنسلك بس إوعي تنزلي من السرير وأنا هجبلك نجوم السما
تحت رجلكي.. ويقوم شايلها ويطلعها فوق.. عشان ترتاح"، مع إن شقتهم
دور واحد بس إحنا حافظينها كده في كل الأفلام.. لازم يشيلها وتريح فوق!
وهي تقوله نفسي في خرشوف يا عادل مع إنها حامل في يومين.. وعادل
يجيلها خرشوف من تحت الأرض.. ومن ثاني يوم بيتدوا يحشوا بطنها
مخدرات..

السيناريو الثاني:

هيقولها.. "اللي في بطنك ده لازم ينزل... الواد ده استحالة يعيش.."،
ويزقها جامد فا تترمي على الأرض وتمسك بطنها وتقول حرام عليك يا
عادل.. ابني لازم يعيش يا ظالم وهو يرزق الباب في وشها.. وتكلم فوزية
تقولها تعالي حالا وفوزية تيجي تلاقى مرمية على الأرض وتطلع في
الروح.. وبتنزف مكروكروم من كل حته!

إنما واقعيًا بقى فا عادل هيقولك مبروك وهو بيقرأ الجرنان وإنتي هتقومي
تقلي البانيه عادي جدًا..

طب كان إيه لازمه كل ده يا جودعان!! عملتونا البحر طحينة ليه من الأول
بدال ما أخرتها هندخل نقلي البانيه عادي يعني!!؟

"مرحلة الـ " يالهووووووووي"

سؤال لكل بنت وست مصرية :

يا ترى دخلتي مرحلة الـ " يالهووووووي" واللا لسّه؟

من أول يا لهوووووي إنتي كل ده قاعدة من غير جواز!!!!!!

يا لهوووووي، مش بتشتغلي ليه؟!!!!

يا لهوووووي، بتشتغلي وسايبة ولادك ليه؟!!!!

يا لهوووووي، إنتي حامل وبطنك صغيرة أووي مش بتاكلني ليه؟!!!!

يا لهوووووي، بقيتي أد الكرومبة، كده استحالة ترجعي بعد الولادة..!!!!

يا لهوووووي، إنتي ولدتي قيصري، ليه تفتحي بطنك حرام عليك..!!!!

يا لهوووووي، مش بترضّعيه كفاية، شايفة الولد قدّ العروسة اللعبة إزاي..!!!!

يا لهوووووي، مش بتشربي مّغات ولا بتاكلني حلاوة، حرام عليك يا شيخة، لو

مش عشانك عشان ترضّعي كويس!!!

يا لهوووووي، بترضّعي ابنك صناعي!! اتقي ربنا، رضّعيه إنتي.. مالكيش دعوة

بكلام الدكتور حتى لو مفيش لبن...!!!!

يا لهوووي، ما دخلتيش الأكل لبنتك وهي 3 شهور كده هتغلبك طول عمرها...!!!!!!

يا لهوووي، ما لِحستيهوش صلصة الكشري لحد دلوقتي، إزاي ما ياكلش محشي ده عنده 6 شهور!!

يا لهوووي، إنتي ما فطمتيش بنتك ليه لحدّ دلوقتي؟!!

يا لهوووي، ابنك بياخد تيتينة!!!!!!

يا لهوووي، بنتك مش بتقعد لوحدها ومش بتحبّي لسّه!! دي متأخرة أوووي..

يا لهوووي، بنتك ما سننتش ليه إلا 6 سنان، المفروض تكون بتطلع ضروس العقل دي سنة!!!!!!

يا لهوووي، ابنك لسه لابس بامبرز أنا ابني كان وهو سنة بيعمل بيبي في التواليت ويبستحمي لوحده ويمسح الحمام ويطلع يلبس وينام!!!!!!

يا لهوووي، بنتك مش بتعرف تاكل لوحدها، ودّيها لدكتور مخ وأعصاب يمكن تعبانة صدّقيني ما تسكتيش على حالتها...!!!!!!

يا لهوووي، ابنك بسأله ماما فين ما ردّش عليّا، هو في مشكلة عنده في التخاطب أصل عنده سنة ونص.. كبير يعني!!!!!!

يا لهوووي، إنتي لسّه ما جبتيش أخ لبنتك. هتحملي إمتى حضرتك، العمر بيغوت!!!!!!

يا لهوووي، إنتي جايباهم لضم في بعض هتربيهم إزاي حرام عليكى!!!

مرحلة الـ يا لهوووي دي مرحلة طبيعية جدّا لازم تمرّي بيها فا كبري دماغك خالص واعملي الأصلاح لبنتك وولادك.. لأن عمرك ما هتخلصي من كلام الناس!

"حركات فيسبوكية"

بجدّ يقطع أم جوّ الساسبنس اللي البنات بتعمله على الفيس بوك ده!!
تلاقيها كاتبة على الوجل..

* يارب!! استرّها من عندك بقى، ماليش غيرك خليك جنبي!
تسألها مالك يا بنتي؟

تقولك لا يا قمر مفيش حاجة!! موضوع شخصي!!!!

بيبقى ساعتها نفسك تشتمّيها بالأب والقمع بسّ ماسكة نفسك عشان
إنتى بنت ناس مش عشان أيّ حاجة تانية!!

* تيجي في آخر التاسع وقبل الولادة بيومين واحدة صاحبها أوي تسألها...
ها ولد واللا بنت؟ وصاحبها أصلاً ربنا رازقها بمحمود وعمر وعندها **توعم**
بنات مليكة وملك، وتقولك والله أحمد أصرّ إن الدكتور يعملها لنا مفاجأة!!!
رغم أنها لما كانت بتسأل صاحبها من الشهر التالت كانت صاحبها بتقولها
بسلامة نية..

فا ترد عليكى إن جوزها هيقفش لو مخلها لوش سربرايز! وقالوا للدكتور
إوعى تقولنا نوع البيبي!!

إنتى هتمثلي إنتى وأحمد إنتى عاملة سونار 4D من الشهر التاني وكررتيه
100 مرة!!

فا طالما مش عايزة حدّ يعرف عنك حاجة يبقى بطلّي تستجوبي صحابك
وتعرفي كل تفاصيلهم وتزعلي لو سألوكي ربع الأسئلة دي!!
* تكتب البقاء لله وتجري!!

الفيس بوك يتقلب وتليفونها ما يبطلش رنّ عشان الناس تطمّن وهي ولا
في الدماغ!!

بدل ما قدرتي تكتبي البقاء لله اكتبى الشخص وارحمي قلق صحابك!!
* تكتب ياااااااااااه ألف حمد وشكر.

تكتبيلها خير، فرّحيني؟

تقولك تعالي inbox وتلاقيها فصّ ملح وداب!! وتتهرّب منك كأنك ممضياها
على كمبيالات!!

ولمّا تسألها تاني، تتوهك في الكلام!!! وتحسّي إنه سرّ حربي، طب
كاتباه ليه؟

لمعلوماتك إحنا مش هنقطع شرايينا عشان نعرف أخبارك...
ما ينفعش تنشري تفاصيل حياتك public ولما حدّ يسألك تحرجيه وتقوليله
دي حاجة خاصة !!
ده صحابك كتر ألف خيرهم بيعملوك قيمة وجوّ يا هبلة!!

"الفرح المصري ... "

أولاً العريس بيستلم عروسته من الكوافير بعد ما يكون اتلغبط فيها 5 مرات،
وأول صورة بتتاخذ ليهم وهيا مكشّرة عشان معرفهاش.
وفي لحظة الخروج من الكوافير هتلاقي 30 واحدة شبه بعض، دول قراب
العروسة طالعين من تحت إيد نفس الكوافير، ده مش استنساخ.. ما
تخافش..

الجيونة بقي، وما أدراك ما الجيونة.. الجيونة لازم يبقى متفق عالمياً كده
أن يكون في حدّ أقصى للنفشة بتاعتها عشان اليوم يعدّي على خير .. لأن
في كوارث بتحصل لما العريس بيشيل عروسته ويلف بيها لو **النفشة** كانت

بنت ال... اللى لازم تتعمل..

لمّا تيجي العروسة تلفّ عشان تحدف البوكيه.. افتكريلها أيّ حركة جدعنة عملتها معاكي واستحملها.. بس ما تاخديهوش.. هيتنظرك فيه على الفاضي والواحد مش ناقص وقف حال..

بالنسبالك إنت... الكاميرا مان اللحظة دي بالظبط هيضرب الفلاش في عينك ويصوّرك فيديو.. ده علطول تكعبله بسلك الكاميرا.. إوعى يصعب عليك !!!

أي عيال صغيرة لازقة في الكوشة من تحت ومش بتتحركّ شاورلهم على الراجل بتاع الدّي جي وقولهم روحوا لعمو معاه شيكولاتة.. بس كده, كده ضربت عصفورين بحجر يا معلم..

لو لقيت العريس والعروسة مصمّمين رقصة سوا زي بتاعة الفيس بوك.. افتكر إن دي ليلة العمر ما ينفعش ننكّد عليهم فيها.. حتى لو مش حافظين الحركات ولا بيعملوها سوا.. صقفلهم ومش لازم تقوم تصوّرهم فيديو إنت برضه بشر من لحم ودم مش هنتقل عليك أكثر من كده..

لازم تشارك في القطر بتاع الولاد أو تشارك في قطر البنات اللي بيلف القاعة ده، وخلي بالك من جيبونة العروسة أبوس رجلك مش هيبقى إنتي والنفشة عليها..

لو الدّي جي ما شغلش بشرة خير تالت أغنية بالكثير روح اطّمن عليه إنه كويس.. بشرة خير دي مفيهاش هزار يعني..

اللي عارف إنه مش هيقدر يشيل مراته ما يشيلهاش.. الموضوع بيقلب عكنة في الآخر.

لمّا تهري نفسك رقص كلنا عارفين إن ده مش معزة للعروسة ولا حاجة، ده عنصر مساعد عشان يجيلك عدلك، فا اقعدي لأن الشباب ما بقتش تاكل معاهم الحركات دي..

لو خالة العريس ميّلت على أم العروسة ووشوشتها وكانت بتبصّ عليك، يبقى جالك عريس يا بطة..

إنما لو عمّة العريس ميّلت على أم العروسة ووشوشتها وكانت بتبصّ عليك، فا أنت لبست يا معلم!!

خد ديلك في سنانك، واقطع علاقتك بالعيلتين..

أول ما تسمع موسيقى زقزقة عصافير قووم كأنك رايح الحمام وإقف قدام البوفيه قال يعني مش واخذ بالك، بس اقلع البدلة وشمرّ القميص وتقمّص شخصية ملك إسبارطا في فيلم 300....

مش هتكلّم على البوفيه عشان دي أعراض ناس.. وأنا فاهمة وإنتوا
فاهمين اللي بيحصل...

لو بعد البوفيه لقيت 22 نفر في القاعة يبقى ليك الكلام..
أول ما تلاقي مهرجانات اشتغلت ما تسلمش على حدّ وقوم روّح..
وإنت ماشي لو طنط من الطنطات قالتلك والله لو كان عندي بنت كنت
جوزتهالك.. روح صلي ركعتين شكر إنك طلعت حيّ من الفرحة ده بدون
خسائر, وما نجلكوش في حاجة وحشة يا حبايب..

"اختاري الوقت الصّحّ يا خايبة"

ما تسألينش جوزك على حاجة:
وهو رايح الشغل.. عشان أكيد مستعجل..
وهو راجع من الشغل.. عشان أكيد تعبان..
وهو بيتكلم في الموبايل.. طب بدمتك هيردّ عليك إزاي!
وهو مستنّي مكالمة من مديره أو صاحبه أو خدمة العملاء!!
وهو بيشفوف الماتش.. ده ماتش يا هاهاهاهاه!!
أو مستنّي ماتش..

وهو بيقلب في الفيس بوك..
وهو قاعد مستكنيص وفارد جسمه على الكنبه.. بقولك مستكنيص!!
وهو باله مشغول..
أو باله هيتشغل..
ولو قران في شغله.. يعني كده قفلت عليك السنة كله !!
وهو بياكل..
أو بيشرّب..
أو جعان..
أو حرّان..
أو بردان..
أو نازل يلعب كورة..
أو هيقابل صحابه..
أو داخل ينام..
أو يفكر ينام..
أو متخايق مع حدّ بره..
أو متخايق معاكي جوّه.. كده سنتين اتقفلوا في وشك كمان !!
غير كده اتكلمي معاه وإرغي بقى واسأليه براحتك..

وسيبك بقى من إننا كستات بنعرف نرغي مع صاحبتنا علي الموبايل وبنغيّر
للبيبي وبنقلب على الحلة، ومش ناسيين نطفي على الرز بعد 16 دقيقة وفي
نفس اللحظة بتردي على جوزك اللي بيسالك التي شيرت الكحلي فين
بالظبط... ومش حاسّة إنك بتعملي أي حاجة خارقة يعني...

هّمّا مش زيبينا خاااااالص..

هّمّا بيركّزوا في حاجة واحدة بس ولو بالهم مشغول، فا كده كل سنة وإنتي
طيبة هتسمعي أحلى "أي حاجة" مع كمية "ممممممم تمام" هتعجبك
أوووي!! فا غالبًا أسكتي أحسن ..

"ثقافة الـ Red Line"

بلغتنا هو خطّ في أي علاقة, بتيجي عنده وستووووب... ساعات بتتساءل عن سرّ نجاح صداقة بين اتنين بقالها سنين وسنين، رغم إنهم مختلفين في حاجات كثير جدّا...

الموضوع ببساطة إن كل واحد عارف حدوده فا ارتاح مع الثاني. كل واحد عارف إنه ممكن يتكلم مع صاحبه في كل حاجة ما عدا في كذا وكذا.. الثقافة دي غالبًا بتتفهم غلط في مجتمعنا..

بيعتبروه غموض منك أو تكبر، مع إن دي مساحتك الخاصة الصحية اللي المفروض تكون موجودة لكل واحد عشان العلاقة تكون سوية ومضبوطة. وتنفيذ ده بيحتاج ذكاء من الطرفين, في ناس الخطّ الأحمر عندهم حاجة واحدة بس وفي ناس بتتعدد عندهم الخطوط الحمراء زيّ أهله وطريقة تربيته لولاده وشئونه المادية... إلخ...

مش ساعات تكون خارج مع ناس وفجأة تلاقي حدّ اتغيّر ووشّه قلب وما بنكونش عارفين السبب! غالبًا في الحالة دي بيكون حدّ اخترق الـ private zone بتاعته وغلس فيها. عمّا ينتقد ولاده بشكل مستفز، أو مصرّ إنه يقوله بيقبض كام أو بيحوّش إيه رغم إن الشخص الثاني موضحله إنه مش عايز يردّ، وإن مش عاجبه أسلوب الاستجواب ده فا بيرد على قدّ الكلمة...

أكيد حصلت معاك وقابلت ناس لسه بتشوفهم أول مرة ويقعدوا يدحلبوك في الأسئلة وكأننا هُبل، هااااا بتشتغلي إيه ومرتبك قدّ إيه ومبسوطة مع جوزك وهتجيبني أخ إمتي لبنتك، رغم إن دي أول مرّة تتقابلوا فيها، ودي غالبًا بتكون الأولى والأخيرة!! أصل سياسة الهجوم والتفصيل دي غالبًا هتقفلك منها بدري بدري...

أيّ علاقة ناجحة لازم يكون ليها إطار يكون ليه ملامح واضحة للطرفين.. ما تكونش سداح مداح..

العلاقة المبهوأة دي حتى لو ناجحة النهاردة فا محكوم عليها بالفشل لأن أكيد في حاجات هتحصل مش هتعجبك ساعتها يا هتسكت وتستحمل التدخل ده في حياتك يا هتقول إنك مش مرتاح, وفي اللحظة دي الله أعلم اللي قدّامك هيفسر ردّ فعلك إزاي..

غالبًا هيفسرّها إنك اتغيّرت معاه وهتطلع إنت اللي غلطان, فا خليك واضح من الأول..

خليك اجتماعي, دي حاجة جميلة بس حط حدود..

عادي لو ما ردّيتش على اللي بيستجوبك وتتهرّب منه أو تقوله إنك مش بتحب الطريقة دي بأدب..

ما تتكسفش إنك تبين إنك مش بتحب حدّ يتدخل بشكل مستفز في أسلوب تربيتك لأولادك, خصوصاً لو حدّ بيحرجك قدام الناس.. وأسلوبه قليل الذوق !
أو إن حدّ يصرّ يعرف تفاصيل حياتك..

أنا مش بحب أقول صريحة ما لكش دعوة بس لو اللي قدامك اضطرّك إنك تقولها بسبب بجاحته لازم تقولها, لأن لكل فعل ردّ فعل...

الموضوع ببدا بالهدوء وإنك توصل رسالتك بالمحسوس وبالأدب مرة واثنين وتلاتة وتنتهي بما لكش دعوة دي حاجة شخصية جداً مش بشاركها مع حدّ..
خليك واضح بأدب..

من حقك كإنسان يكون ليك Red line والناس تحترمه..

وانت كمان احترم الـ Red line بتاع غيرك...

خليك حقّاني..

"لمّي مناخيرك يا حلوة"

رسالة للمهووسين بالسيلفي..

إيش حال إننا شعب أفريقي.. أفريقييييي وغالبًا مناخيرنا كبيرة وبوقنا مش منمنم وساعات بيبقى في هالات سودا كتير تحت عنينا وعنينا عادية، يعني مفيهاش سحر فتّاك مثلاً..

يبقى جايبين منين العشم ده كله إن صور السيلفي هتطلع حلوة؟

إحنا كده, ما نصدّق نمسك في حاجة ونطهّق العالم منها..
وبيني وبينكو إحنا لازم نعترف إننا غير مؤهلين أبدًا للدك فيس, لأنه بيقلب على
شنخر وصخر بتوع سلاحف النينجا.. بجدّ البوز ده بيصيب الواحد بحالة غير طبيعية
من الإعياء..

ولازم نتفق إن السيلفي مكانه مش الحمام ولا أول ما تصحى من النوم ووشك
يكون منفخ.. عارفة ليه؟

عشان إحنا بشر وبنخاف.. دي طبيعة بشرية.. راعي النقطة دي.. الخصة
وحشة..

وعامة إحنا حفظنا تضاريس مناخيرك وبقينا نعرف حشيتي ضرس واللا خلعتي
سنة من كمية السيلفي اللي بتتصوريه كل يوم.. ولو طلعتك حباية في وشك
بنقولك سلامتك يا قمر.. مكانتش موجودة إمبارح دي!!

على فكرة لو عايزة تاكلي بالهنا والشفا.. لكن تفتحي بقك وتمسكي البيتزا بإيد
والموبايل بالإيد الثانية.. مش حلوة.. ده اسمه أحداث وسبيك مننا إحنا.. هتزيّتي
الموبايل!! اللي بتتصورى بيه قدام المرآة عشان بيان إنه أي فون.. طب كده
هتتصورى بيه إزاي!!

ومش كل لبس جديد أو شنطة جديدة بسيلفي.. مش لازم.. عيشي عادي..
والله في ناس عايشة من غير السيلفي وزى الفل..

وصاحبتك اللي خدك لازق في خدّها دي كنتي لسّه بتتريقي عليها من 10
دقايق.. مش لازم صور الحب الأوفر أمّ خدود..

وسؤال بقى.. البنات تكون قاعدة عادي، ولمّا يتقال يا سيلفي كل اللي قاعدين
يتحوّلوا.. اللي تطلع لسانها يمين واللي تطلعه شمال واللي تحوّل!!

ونفسي أفهم إيه حكاية إنكوا بترفعوا رجلكوا لورا؟

إيه الإعجاز في الحركة يعني؟!!

إيه الجمال في إنك تطلّعي لسانك!! ده حتى كلنا إتربيننا إنه عيب وغير كده
شكلك بيكون مش عاطفي خالص!!

بعد ده كله بقى عايزة حدّ يفهمني ليه إحنا أكثر شعب في العالم بيتصوّر
سيلفي؟

أومال لو كان فينا عرق أوروبي كنا هبنا إيه؟! إيببييه؟!!

نفسى حدّ يقولهم يرحمونا شوية بقى عشان طهقنا!

"في بيوتنا قنبلة موقوتة"

"إديله الموبايل يتلهي فيه ويتكتم, أنا مصدّع!"
" افتحيله طيور الجنة عشان يبطل زنّ، دماغنا وجعتنا، هو ما يفصلش؟! "
" إوعي تنسي التابلت وإحنا خارجين لحسن تبقى خروجة ما يعلم بيها إلا ربنا
!!"
" بسرعة إلحقي هتفتح الجعّورة، شغلولها أغنية ماما جابت بيبي .."

الكلام ده يا قولناه يا سمعناه من اللي حوالينا، يا بنطبّقه وبدرجات متفاوتة مع
ولادنا وإحنا مش دريانين!
الأم مننا أول ما يبدأ طفلها يتفاعل مع الدنيا ويطلع له حسّ، علطول تدور على أيّ
حاجة تكتمه بيها كأنها بتسدّ بلاعة بالظبط؟!
طيب مش هوا ده يا ستي البيبي اللي كان نفسك يناغي ويبصلك ويتجاوب
معاكي وتسمعي صوته وياخد بحسّك في البيت وزنّه وعايطه يملى الدنيا كلها؟
ليه مصرّة تسكتيه وتلهيه بطرق تخليه عرضة كبيرة جدّا للتوحّد وتأخر النطق
والكلام وتدخّليه في دوامة اللفّ على دكاترة التخاطب، وقلبك يوجعك عليه يوم
ورا الثاني؟

دكاترة الأطفال أكّدوا في دراسات إن القنوات اللي بتعرض أناشيد برتم معين زي
طيور الجنة وأي قنوات إنشاد من اللي منتشرين دلوقتي خصوصًا في شهور
الطفل الأولى بتكون سبب من أسباب "التوحد اللا جيني" وبتخلي عندهم
أعراض معينة منها:

- مش هتلاقي تواصل بصري بينك وبين الطفل أثناء الرضاعة.
- مش هينتبه لو ناديني عليه باسمه، مع إن عنده 9 شهور.
- لمّا تحضنيه، مش هيتجاوب معاكي.
- مش بيتتبع بنظره حاجات حوالين المحيط اللي هوّا فيه بـ 30 سم،
على عكس الأطفال في سنه.
- مش بيحب يلعب، ولا يتواصل مع حدّ.
- عدواني بشكل كبير.
- يعمل لنفسه عالم خاص بيه من اللعب والشخصيات، ويفضل
ينغمس جوّاه أكثر من احتكاكه باللي حواليه.

• الطفل هيكون عنده حركة مفرطة أو خمول شديد..

والمشكلة الأكبر بقى إن في أمهات بيفرحوا إن أطفالهم هديت وسكتت لَمَّا أدمنوا التلفزيون، وبيفرحوا إنهم بطلوا زن ومش بيركزوا في الأعراض اللي ظهرت على رضيعهم خصوصًا لو عندها أطفال أكبر مركزين معاهم أكثر في مذاكرة وامتحانات والذي منه!

بس فعلاً حرام نعمل كده في ولادنا مهما كنا مضغوطين وورانا مسئوليات، كل حاجة ممكن تستنى لكن ولادنا لأ، وحرام نحرمهم من تفاعلهم مع البيئة والناس اللي حوالينهم عشان ما نسمع لهمش حس ونشرب الشاي ونتكلم ساعتين في التليفون بمزاج!

الطفل لازم يلعب بإيده، ويناعي ويتحرك ويفشك ويكتشف عشان يطلع سليم ومتزن..

وللأسف في مجتمعاتنا مفيش توعية كافية حوالين استخدام التكنولوجيا الحديثة الضارة كسكاته للرضع والأطفال ومدى الضرر اللي هينتج عنها، وإزاي هيمنت تأثيره السلبي على النظر والنطق والتواصل.

يعني المفروض الأطفال تحت عُمر التلات سنين ما يشوفوش التلفزيون أكثر من ساعتين في اليوم ومش متواصلين ويكون المحتوى مفيد، مش أناشيد بتتكرر وخلاص، إحنا على أرض الواقع الطفل من أول ما يصحى من النوم لحد ما بينام يا وشه في التلفزيون يا في التابلت ومن غير ما نتابع هو بيشفو إيه ودي كارثة لو حدها أصلاً!

أرجوكي بلاش تديله الموبايل أو التابلت. أرجوكي فضي نفسك واقعدي معاه والعبوا سوا باللعب والدباديب والشخاليل. احكولهم قصص.. العبوا معاهم بالصلصال.. لُونوا سوا.. اشتروا مكعبات وطيارات وشاركوهم اللعب، لكن حرام نسيب ولادنا قدام شاشات عشان نريح دماغنا.. ولادنا أهم ويستاهلوا نتعب عشانهم، ولادنا أعظم أمانة ربنا وهبها لنا..

التكنولوجيا الحديثة دي زي القنبلة الموقوتة، لو أسأنا استخدامها أول ما هتفرقع؛ هتفرقع في وشننا!!

"السّوافة في مصر على اللي عايز يسوق"

السّوافة في مصر ثاني على اللي عايز يسوق!!

لأ بجد المعجزة دي ما يتسكتش عليها أبدًا!!!!!! !!
هيّ الناس ليه محسّساني إنا في Need For Speed ؟
أو إنك لو شيلت واحد بكبّوت العربية وهو بيعدي الشارع، هتاخذ لايف زيادة ولو
رقصته رايح جاي هتاخذ توب سكور!!
وليه الناس بتعدي الشارع وهي مش باصّة ولا بتفكر تبصّ.. كأنهم بيتمشوا في
صالة بيتهم !!

أو كأنهم نازلين ينتحروا ومرّوحين علطول!
في حاجة غلط!!

وعايزة أفهم ليه عربية كارو بحمار تمشي عكسي على كوبري؟ العربيات كلها
كانت هتلبس في بعض والحمار كان هيموت.. منظر يقطع القلب أقسم بالله!!
الناس بتركن صفّ رابع!! رابعا!! لبيبييه؟!

الله يرحم أيام ما كنا نقول لبعض يلا بسرعة لحسن أنا راكنة صفّ تاني وهتاخذ
مخالفة.... أيا!!!!!!ام!!

والجديد الظريف بقى إن الشعب المصري دلوقتي ماشي بمبدأ "الزخنوق"...
يعني إيه بقى؟

يعني أيّ مساحة تاخذ عربيتي، يبقى أدخل فيها.. وشّ كده..
أترخنق في أيّ زخنوق ...

حتى لو الزخنوق شمال وأنا سكتي يمين.. بس لازم أطلع عين اللي حواليّ!!
تلاقي ميكروباص كبس عليك عشان يحشر نفسه بين عربيتين وفي الآخر يرجع
كما كان.. طب كان ليه م الأول يا عم!! تلاقيه كانت بس طالبة معاه "زخنة!!"
أنا بدأت أشك إن في حدّ محلّف السّواقين على المصحف ما يمشوش في
الحارة بتاعتهم.. لازم يمشوا خط زجاج على حبة سامبوكسة على دواير... أهو
أي شكل غير خط مستقيم والسلام!!!

كلّ ما تعجن أكثر تبقى جامد أكثر وأكثر !!

ونفسي أفهم ليه الناس بتعند معاك لما تدي إشارة؟ تحسّ إنهم بيربّوك عشان
بتلتزم بقواعد المرور!!

إنت عايز تدخل شمال.. طيببيبي... ورّيني بقى يا حيلتها هتدخل إزاي!!

تلاقي كلّ العربيات بتتكاتف عشان تأرفك مش أكثر!!

وهي التريلات اللي بتاخذ غرز دي وضعها إيه؟ السّواق بيتعامل مع التريلا كأنها

128.. وبيكسر بيها عادي جدًّا!!

وبالنسبة للتريلات اللي ماسكة نصّ الطريق ومهدّية دي سواقها ضارب إيه؟
والتريلات اللي ماسكة الشمال على الطرق السريعة دي إيه؟
ولو جدع ترعشله... لو راجل ترعشله..

إنت متخيّل لّمّا سوّاق تريلا يحطّك في دماغه ممكن يعمل فيك إيه؟! ده
هيعجنك..

ورسميًّا دلوقتي بقى في تكتك لكلّ مواطن.. تحسّ إن التكتك بالسّواق هيبقوا
على جِرك وممكن يدخلك راسه من شبّاك عربيتك يقولك غير الأغنية دي يا
كابتن عشان مش بحبها..

مش طبيعي إن الواحد يتوتر كده أو يتحرق دمه كده طول ما هو سايق أو قاعد
جنب اللي بيسوق؟! الدنيا مش ناقصة والله..

الكلاكسات يا بشر للضرورة...

للضرورةووووووورة... إنت مش ماشي ورا زفة !!

ولو كلاكس واحد كفاية مش لازم تجيب صمم لسكان المنطقة, صدّقني رسالتك
وصلت خلاص بكلاكس واحد!! دول العالم كلها بتطبق غرامات على الكلاكسات
وإحنا بنحط إيدنا عليه من أول ما ندور العربية لحدّ ما نركن!! الرحمة حلوة!

ونفسي أفهم لّمّا الإشارة تكون واقفة واللي ورايا بيزمرلي.. المفروض أنا أعمل
إيه؟ أركب الجناحات واللا أتشقلب في هوا واللا أعدّيه إزاي دلوقتي؟

الناس دي لازم تتعالج و فورًا !!

نفسي يسحبوا الرخص من كل السّواقين في مصر ويمتحنوهم امتحان يرضي
ربنا ويدّوا الرخص للي يستحقوها بسّ عشان الموضوع بقى عشوائي وغوغائي
بشكل عجيب!!

تحسّ وإنت نازل مشوار إنك بتتضرب في الخلاط وبتفرهد قبل ما تعمل اللي إنت
نازل عشانه!!

وبتنزل من العربية بتنهج كأنك كنت واخذها جري..

مفيش بلد في العالم السواقه فيها بالمنظر ده!!

الناس بتمشي زي الألف.. ومن غير لا ظابط ولا عسكري..

ليه السلوك العام إن الناس بتشتتم بعض وبتزق على بعض وتكسر على بعض،
ومحدث مستحمل الثاني ولا طابق دبان وشه أساسًا !!

تلاقي عربية بتنزل ست كبيرة أو واحدة نازل معاها أطفال وواقفة على جنب

وبرضه الناس مش راحماها من الكلاكسات!! طب نعمل إيه ما ننزلش يعني!!
عيب ما يصحش كده!! تحبّ نزلهم إمتى وفين عشان يناسب جنابك؟ إتلموا
بقى..

وكنت هنسى أقول إن المطبات اللي بتجيب بطن العربية دي مش مطبات دي
بلاوي زرقا حرام عليكوا.. المطبات مواصفاتها مش كده خالص.. والبلاعات
المفروض تبقى في نفس مستوى الأرض مش أطول منها بمتري!!
العربيات اشتكت مش كده والله!! إمشوا في حارتكوا وحياة عيالكووا..
اللي فهمكووا إن السّواقه بالذراع ظلمكووا أقسم بالله.. خلتونا نكره السواقه اللي
كانت زمان بالنسبة لناس كثير متعة من متع الحياة!! ربنا يهديكووا!

"مهزلة الأوبن بوفيه"

عزيزي الـ "جيسيت" المقيم في الفندق:
- مش لازم تملّي الطبق في الأوبن بوفيه لحدّ ما ينقّط منك ملوخية وينزل رزّ من
الجناب، ونقعد ندوس على الأسبابجتي اللي بتقع منك، أنت محتاج سرفيس أو
حلّة كبيرة مش طبق عشان يكفي الكميات اللي حضرتك جايها ..
- الموضوع مش محتاج جري.. إهدي إهدي كده.. والله هتاكلي ..
- مغيش معدة بني آدم هتستحمل كمية النشويات والسكريات والدهون
المشبعة والزيوت المهدرجة والمشروبات الغازية والعصائر الفريش اللي حضرتك
بتستهلكها دي، أقسملك بالله كمان نصّ ساعة بالظبط هتخط صباغك في بقك
وهتتمني ترجع كل اللي ترسته ده ..
- الحموضة هتبهلك... معلومة على جنب كده.. إهدي شوية ..
- ممكن بعد إذّنك تحط كل معلقة في طبقها؟ أنا أسفة لو بضايقك بسّ محدّش
مجبر ياكل من معلقة اتحطت في صلصة، وبعد كده هووووب نزلتها في سلطة
الزبادي!! نحترم نفسنا شوية!!
- 45 قطعة جاتوه سوارية ليبيبيه؟! ولميبيبين؟! إنتوا كام واحد؟ طب بطنك دي
ملهاش أهل يسألوا عليها?!!

- الديك الرومي المحطوط ده والمشاوي دي لينا كلنا والله... أنا عارفة إنني صدمتك

..
- ما تحطوش المكرونة في كيس أو اللحمة في كيس عشان لو الولاد جاعت..

هما بياكلوا بالعافية أصلا على الغدا وبتضربوهم عشان يبلعوا اللقمة ..

- ما تدخلش العيال بالمايوهات المطعم!!! العيال بتنقط علينا مياه يا ولية!!!! إيه

ده إنتوا داخلين برملتكو علينا ليه؟! إنتي مش بتعرفي تقري اليافطة اللي بره

دي واللا عاملة من الكونغو؟! !!

- معنديش مشكلة إنك بتحب المكرونة البشاميل، بس أنا سايباك بتحط منها

بقالك ربع ساعة... أرجوك كفاية... والراجل اللي وراك ده بيزغذك فعلا فا

متعملش إنك مش فاهم ..

- إنت حرّ تاكل حلو وحادق وسلطات وفواكه، بس إزاي بتضرب شاي وبيبسي في

نفس اللحظة؟! واللا أبو بلاش وكده؟! !!

- لو مش عايز رز بخلطة ما تحطوووش، مش لازم تحطّ من كل حاجة في طبقك!!

حبّه مش هيتزرع في قلبك دلوقتي يعني وإنت بتكرهه بقالك 30 سنة ..

- معقول في حدّ بيستهلك في الوجبة كيلو تفاح و2 كيلو موز و30 علبة مربى

فيتراك من الصغيرة و25 واحدة كرواسون؟! السؤال ده طبعا ملوش إجابة في

الوجود !!

- متقوليش لابنك أملي الطبق ده وتعالى، الواد بيقولك مش عايز وأبوه مش عايز

ولا إنتي عايزة... خلاااااص قومي عادي وإطلي الأوضة والله عادي.. سيبى

غيرك يتبقاله حاجة !!

- ما ينفعش تلضمي فطار في غدا في عشا في سناكس.. والله العظيم الجهاز

الهضمي ومصارينك مش هترحمك، أنا بقولك عشان مصلحتك ..

- في أي وقت تحسّي إنك هترجعي إنتي والولاد بطلوا أكل.. أرجوكي.. مش لازم

نتغم معاكوا.. قبل الترجيع بخرطتين مكرونة وقفي أكل.. هتعيشي عادي ..

- افتكري إن قاولونك ده ليه طاقة لهضم الأكل.. لو قام عليك هيجيبك الأرض..

بلاش تستغزيه ..

- ما تنسيش وإنتي طالعة من المطعم تطلبي سندوتشين همبورجر وهوت دوج

وبطاطس محمّرة عشان الولاد يأزأوا فيهم الربع ساعة دي لحدّ ما تلحقوا العشا

..

حرام العيال شكلها هفتان ..

وعادي مش حرام أطنان الأكل اللي بتترمي عشان جنابكوا تاكلوا الـ 3 طقّات

براحتكوا ..

الموضوع ده ملوش علاقة بالمستوى الاجتماعي أو بالغنى والفقير.. والله العظيم

التصرفات دي أغلبها بيطلع من ناس معاها فلوس بس ثقافتها ما تحترمش

النعمة ولا تحافظ عليها ..

السيسي حلو ... آه،
مبارك حلو... آه..
ماما حلوة يا ضنايا !!
وطبعًا في ناس معتدلة ووسط دول نسيينا منهم عشان كويسين:))

"اتجوزي اللي يرفعك لفوق"

مش المفروض خالص إن الست لما تسيب الراجل تحلو، وتبقى بتحبّ الحياة
أكثر زيّ ما البوستس منتشرة على الفيس بوك، دي حاجة ما تفرّحش حدّ!!
المفروض الست تكون واخدة بالها من نفسها وسعيدة من غير جواز، والجواز
يزوّد نجاحها ويزوّد سعادتها هي وزوجها..
لكن لو عكس ده بيحصل يبقى الجوازة دي كانت قبر للست بدال ما ردّت فيها
الروح بعد الانفصال بالشكل ده !!
في بنات أعرفها اتحوّلت لمومياة في آخر أيام جوازها وبعد الانفصال بقت زي
القمر!! ده بقى معناه إيه؟
الجواز اتعمل عشان نكمل بعض سوا، مش نكمل على بعض وإحنا سوا ويبقى

يوم الهنا إننا نتطلق عشان الست تقدر تعيش ثاني !!

في ستات من كتر الهم اللي بيشوفوه يا بيكملوا حياتهم مع أزواجهم غصب عنهم عشان خاطر الولاد وبيكونوا عايشين وميتين في نفس اللحظة أو بتقرّر تنفصل وساعات كثير الزوج بيحبر مراته تبريه من كل حقوقها عشان يطلق !!

كل ده مش جواز وقلته أحسن وعلاقة تغور في داهية !!

الناس بتتجوز عشان يحسّوا بطعم ثاني من السعادة والحبّ اللي مش هيحسّوه إلا مع بعض، مش عشان طرف يتقهر ويتعب وصحته تتدهور من كتر النكد والغم!! وممكن الطرف ده يكون الراجل برضه بس للأسف الأغلبية بتكون ستات..

العلاقات الزوجية نسبة فشلها وصلت لـ 180.000 حالة طلاق السنة اللي فاتت ومنهم 14% لزيجات مكملتش حتى سنة على بعض جواز!!

وانتوا في الخطوبة، سواء إنت أو هي حسّيتوا إن مفيش توافق مبدئي بينكوا في التفكير والقناعات يبقى مش هينفع!!

لو لقيتوا تفكيركوا أقصى الشمال وأقصى الجنوب ومفيش نقطة تلتقوا فيها يبقى بلاش منها من الأول!!

لو أولوياتكوا غير بعض خالص يبقى بايظة!!

لو حاسس إن في بنات كثير أحسن منها وإنك مش مقتنع بيها وبشخصيتها يبقى ما تظلمهاش وترتبط بيها، لو شايفاه مش مالي عينك ودايمًا شايفة إنك تستاهلي أحسن منه يبقى تعتذري فورًا ومتكلميش!!

ما ترتبطوش بشخص عشان والدتك شايفاه كويس وهو مش نازلك من زور ولا تاخذ قريبك طالما مش مقتنع بيها عشان خاطر والدك شايفها الأنسب ليك وخلص!!

أصل مش هتبقى حياتكوا طول فترة الخطوبة خناقات وشدّ وأول ما تتجوزوا هتتحولّ العلاقة بقدرة قادر لاتفاق وحبّ ومودة وكمنجات!!

الجواز مش علاقة بندخلها عشان نخلص وخلص ويا صابت يا خابت!!

الجوازة لو فشلت في أطراف بتتجرح وبتتكسر وفي أطفال بيدفعوا تمن حاجة ملهومش ذنب فيها!!

الجواز مش لعبة بسّ قليل اللي بيصدّق إنه مش لعبة!!

"شخصيات من كوكب إوعى"

لَمَّا اللّٰي بتقولك إوعى تتجوّزي ما تتجوّزش وترفض كل اللّٰي يتقدمولها.. صدّقها.
لَمَّا اللّٰي بتحذّرك من الخلفة وتعبها وسهرها تقرّر ما تجيبش ولاد وما تحملش
أبدًا.. صدّقها.

لَمَّا اللّٰي بتسخّنك على جوزك وتقولك سيبيله البيت وإمشي لقيتها بتعمل كده
في بيتها ومع جوزها.. صدّقها.

لَمَّا اللّٰي بتقولك الدنيا سودا والموت أحسن والعيشة تقصّر العمر تقرّر تنتحر..
صدّقها.

لَمَّا اللّٰي كل ما تشوفك تقولك اطلقي تطلق.. صدّقها.

لَمَّا اللّٰي بيخوفك تاخذ خطوة أحسن في شغلك ويطلعك فيها القبط **الفطسانة**
ويربيلك الرعب يرفض فرصة زي اللّٰي جاتلك... صدّقه.

لَمَّا اللّٰي يقولك اقطع مع فلان وعلان عشان همّا وحشين رغم إنهم زيّ الغل
معك يقطع معاهم.. صدّقه.

لَمَّا اللّٰي يقولك إوعى تسافر يرفض نفس الفرصة لو جاتله.. تبقى تصدّقه.

هيّ الناس اللّٰي بتوزع علينا طاقة سلبية دول كتروا أوي كده ليه؟

وعايزين من اللّٰي حوالهم إيه؟

عايزينهم ليه مكثبين وعايشين في وحدة وخنقة وخوف وأرف؟

همّا مستكترين غيرهم يتجوز أو يخلف لحسن يمكن يتبسّط؟!!

إوعوا تصدّقوا الناس اللّٰي بيسوّدوها في وشكوا طول الوقت..

الناس اللّٰي قبل كل كلمة يقولوك "إوعى" !!!

إوعى تسافر..

إوعى ترتبط..

إوعى تتجوز..

إوعى تخلف..

إوعى تجرّب حاجة جديدة...

كل دول سيبك منهم ومن سلبيتهم، لأنها ممكن تدمرك حياتك...

بشتان الفرق بين اللّٰي بيكرهك في حاجة واللّٰي بيحدّرك من إنك تقع في نفس
أخطائه عشان يبحك وخايف عليك ..

الأسلوب في الحالتين مختلف تمامًا، ومن حقّ صحابنا علينا نشاركهم أخطاءنا ونحذّرهم منها لكن منتهى الغلط إننا نقفلهم من الحاجة تمامًا..

اللي عايز ينصح بحبّ مش بيخوّف ولا بيعقد اللي حواليه..

أنا ممكن أديكى خلاصة تجربتي من غير **ما أكرهك** في الخلفة أو الجواز أو الارتباط..

قبل ما حدّ يحبط حدّ ويخليه ياخذ مليون خطوة لورا بدل ما كان هيطلع خطوة
لقدام يفكر هيستفيد إيه من الكآبة والتعقيد وسدّ النفس اللي بيعمله؟

سيبوا غيركوا يعيش اللي عيشتوه..

يجربوا وياخدوا نصيبهم..

إدّوهم نصايحكوا بس سيبوهم ياخدوا قرارهم بنفسهم..

ما تسدّوش نفس حدّ عشان الأيام دول وهتقابلوا اللي يسدّ نفس عشرة زيكوا
مش يسدّ نفسكوا إنتوا بس!!

"معاناة امرأة"

أكثر نوعية من الستات بتعاني في مجتمعنا مع إني أظن إن كل الستات
بتعاني بطريقة ما: (المطلقة واللي لسّه ما إتجوزتش.. لأنى بكره كلمة
عانس، عشان بتتقال إنها شتيمة!!

والأرملة واللي لسّه ربنا مرزقهاش بأطفال).

في كل الحالات المجتمع بيحاسبهم على حالتهم الاجتماعية أو على
نصيبهم!! عمركوا شفتوا أرف أكثر من كده؟

يعني بدل ما يلاقوا دعم من اللي حواليهم بيلاقوا برطمة ونارزة وتلقيح
كلام!

المجتمع مصمم يطلعهم فيهم حاجة غلط مع إن اللي باصلهم كده هو الغلط نفسه وماشي على رجلين.

مين إدالك الحق تسأل ليه علانة قرّرت تنفصل عن شريك حياتها، أو تقولها ما إنتي اللي غلطتي من الأول لما قبلتي بيه وتنكد عليها وتقلب عليها المواجه كلها، إنت مااااااااالك؟؟!!

ليه تجبرها تدافع عن نفسها وهي مش محتاجة تبرر لجناب حضرتك حاجة أصلاً؟

ليه تحطوها في موضع اتهام!!

دي حاجة خاصة جداً بيها وبية ومش من حق أيّ حدّ يتدخل فيها أو يعايب بسببها!!!

مممكن جداً جنابك لو مكانها كنتي انفصلتي قبلها بمراحل ومقدرتيش تستحملي زيبها!!

ومين إدالك الحق تسأل هي علانة لسّه ما إتجوزتش ليه!! هي لمعلوماتك مش ناقصها إيد ولا رجل ولا بتمشي على الحيط!! وممكن جداً تكون أحسن مننا كلنا، بس لو كانت لقت شريك حياة مناسب كانت هترتبط بيه فا مش من حق أيّ حدّ يديها كلام ملوش معنى أو يلّمح لها إن سنّها اتأخر! لا إنت بتصرف عليها ولا شايل همّها ولا قاعدة فوق دماغ حضرتك!!

لك أن تتخيل إن في ناس بتتهم الأرملة إنها بومة وبوز شؤم وكانت وشّ نحس فا جوزها اتوفى!!

بيعاملوها كأنها قتلتها، شوفتوا البجاجة!! مع إنها غالبًا بتكون هيّ اللي شالته ووقفت جنبه لحدّ ما جه قضاها!!!

يعني حتى قضاء ربنا الناس هتكفر بيه وعايزين يلبسوه لمراته!!

وإن في ناس بتعيب في الست وتقول عليها أرض بور عشان اتأخرت في الخلفة!!! ده على أساس إن الخلفة دي بزار... ندوس عليه نحمل علطول، مش إنها رزق من عند ربنا وحده وإن ممكن جداً يكون جوزها محتاج يتعالج والتأخير مش منها!

الناس تقعد تلاحقك كل يوم وفي كل مناسبة وبدون مناسبة...هاااااااااااا
مفيش حاجة في السكة؟

إنتوا بتحاسبوا الناس على النصيب والرزق والأجل!!! على قضاء الله وقدره؟

لو كل واحد حط نفسه مكان غيره قبل ما يتكلم ويدي عبر ويقول إن الستّ كان المفروض تستحمل وتسكت وترضى وإنها غلطت بالانفصال أو بعدم

الزواج، كانت نفسية الستات دي مش هتتعب من اتهاماتكوا وإنكوا محشورين في حياتهم بدون وجه حق.. ومنصّبين نفسكم الحاكم بأمر الله وإنّتوا ولا عارفين همّا استحملوا إيه واللا شافوا إيه واللا عافروا كام مرة عشان المركب تمشي...

في ستات كتير الانفصال كان أملهم الوحيد إنهم ما يضيعوش وإن ولادهم يتربوا في بيئة محترمة مفيهاش غلط وإهانة وضرب، أو هزّ لصورة الأب والأم في عين ولادهم..

في بنات كتير لسه مجاش نصيبهم، أو ربنا كاتب نصيبهم حاجة تاني أحسنلهم من الجواز..

مش إنتوا اللي بتقسّموا الأرزاق..

محدّش عارف إيه اللي بيحصل جوه البيوت عشان يحكم ويتهم ده ويبرأ ده!!

يا ريت نبتّل نحسّس أيّ حدّ منفصل سواء ست أو راجل إن فيهم حاجة غلط، لإنهم وارد جدّا يكونوا أحسن مننا كلنا بس ربنا كاتب كده.. وده الخير ليهم..

ما تتحشروش وما تسألوش أهل البنت كل يوم عن عدلها وتحسّسوهم إن بنتهم عالية!!!

ليه عايزينها تقبل بأيّ حدّ؟ إنتوا هتستفيدوا إيه؟ ده إنتوا أصلاً لو بتحبوها عمركو ما هتسربعوها كده ولا هتضغطوا عليها كده.. إنتوا ناس حشرية ولتاتة مش أكثر!!

كتير القعدة في بيت الأهل بترحم من بهدلة جوازة مش متكافئة ولا مدروسة. حصيلتها البنت بترجع مقهورة وشايلة عيال لحمة حمرا على دراعها أو دايرة تلفّ بيهم على محاكم الأسرة..

"أزمة فينو"

مش فاهمه ليه معظم الرجالة بتتعصّب وبتبقى قرفانه جدّا من جملة :

هات فينو معاك وإنّت جاي..

واللا هات زبادي معاك وإنّت جاي..

واللا هات بامبرز معاك وإنت جاي..
إحنا مش كل مكالماتنا بتكون غرضها طلبات بس ساعات الأمور بتستدعي
بقي...

يعني حتى لو كانت المكالمة أولها لذيذ وإزيك وأخبارك..
بس أول ما يسمعوا كلمة "هات".. تلاقي صوتهم اتغيّر وتخن أكثر ما هو
تخين.

تحسّي إن عفاريت الدنيا بتتنطط قدامهم عفريت عفريت !!
وبلاش ندخل في موضوع خد كيس الزبالة معاك عشان بيضايفكوا أوووووي
فا هنخليه على جنب..

بس إجمالاً، الجمل دي مفيهاش شتيمة والله...
ولو على الزبادي والفينو مقدور عليه، بلاهم خالص..
بس لّمّا تعوزوا تتعشّوا وما تلاقوش عيش ولا زبادي هتقولولنا مقولتوش
ليه!

وبلاها سندوتشات المدرسة خالص..
وسيبكوا من العيش، بسّ البامبرز أعمل فيه إيه..
أرجع لعصر الكوافيل، واللا أسيب ابنك يا مولايا كما خلقتني!!
واللا نحوّل البيت لحظيرة!! واللا أقوله معلش يا بودي إمسك نفسك يومين
تلاثة؟!!

أنا مقولتش هاتلي سوشي في إيدك لا سمح الله..
يقطعني لو قولتها...

ولا قولت هاتلي سيمون فيميه نفسي ربحاله..
كنت ساعتها ترجمني بالطوب..
ده فينو..

فينوووووووووو

وبامبرززززززز...

أنا طول اليوم بيتقالي هاتي وودي واعملي وسوي ولبسي وقلعي وغيري
وأكلي 100 مرة وعادي... مش بقول هو كل يوم ولا بقول لأ أنا زهقت
اتصرفوا إنتوا ...

... Take it easy

"الأسطوانة المشروخة"

الواحدة لما تشتغل وتبقى مُرهقة ومُجهدة يقولولها: "هو إنتي لسه شوفتي حاجة !!!"

لما تتجوز يقولولها: "هو إنتي لسه شوفتي حاجة..!!"

لما تحمل وتتعب وتحسّ بتقل ودوخة يقولولها: "هو إنتي لسه شوفتي حاجة !!!"

لما تولد وتجب ببيي وتقول لصحباتها ما بنامش ومش قادرة أتأقلم ولا عارفة أتعامل مع البيبي يقولولها: "هو إنتي لسه شوفتي حاجة !!!"

لما تجيب البيبي الثاني والثالث ويلاقوها مستهلكة ومش قادرة يقولولها: "وهو إنتي لسه شوفتي حاجة" مع إنها ما فتحتش بقها أصلاً!

تسافر وتحكيلهم عن تعب الغربة يقولولها: "هو إنتي لسه شوفتي حاجة" !!

همّا الناس اللي بيقولوها بجدّ وتحسّهم فرحانين في اللي تعبانة وهلكانة وما بتنمش.. هدفهم إيه من الجملة دي؟

يعني لما صاحبك تحكيلك إنها تعبانة بتكون محتاجة دعم, وإن حدّ يفهمها بالراحة تنظم يومها إزاي, أو حتى حدّ يسمعها وخلص وتفرض معاه بس من غير ما يسود الدنيا في وشها!!!

إحنا بدل ما نقول لبعض "ربنا يقويكي، وإنتي قدّها وقُدود"، نقولها إستني ولسّه يا ما هتشوفي!! ونكلكلهم الدنيا ونحكيلهم أسود المواقف اللي قابلناها أو لسه ما قبلناها حتى!! بيبيقى اللي ناقص بس يطلعوك لسانهم !!

الجملة دي بتضايق ناس كثير وبتحبط ناس أكثر..

اللي عنده كلمة حلوة يقولها.. حلوة... ماشي؟

والله ما حدّ ناقص كلكعة وسددان نفس!!

بطلوها بقى الله يباركلكم!

"حوارات فيسبوكية"

ممکن الماسدج بتاعة حضرتك تكون seen فعلاً بس ممکن أكون فتحتها؛

وأنا بأكل, ده بعد إذن سعادتك طبعًا وكنت هردّ بس الولاد كانوا جعانيين فا اتلخمت وأكلتهم, أو ابني إتخبط فا قومت أشوفه...

أو كنت هردّ بس قومت أغير لبنتي وبعتر إني بغيرلها في الوقت اللي حضرتك بتكلميني فيه.. أوعدك هربّيها ما تعملش تاني كده..

أو بنيمها وبرضه بعترلك من كل قلبي..

أو وأنا سايقة فالأسف ما لقيتش حته أركن فيها على الدائري عشان أردّ بسرعة الاستجابة اللي حضرتك عايزها لأنني مش بعرف أكتب برجلي. الأوبشن ده هحاول أنزله السوفت وير الجاي إن شاء الله..

أو ممكن أكون بروح في النوم ومش قادرة أردّ, خصوصًا لو لاقيت الماسدج هاااي بس أو إزيك وأنا مطبقة بقالي يومين والساعة أصلا 2 الفجر فا مكنتش دريانة أصلا وأنا بقرا الماسدج!!

أو إن ابني لعب في الموبايل وما شوفتش الماسدج أصلاً..

ساعات ابني بيمسك الموبايل مع إني بكون مخبّاه ويلعب فيه وما بشوفش الماسدج إلا بالصدفة!!

أو كنت بذاكر لابني فا قولت هخلص وأكلمك ونرغي براحتنا...

والله العظيم ممكن أبانلك أونلاين وأنا ولا عارفة الموبايل فين!!! شيلوا من دماغكوا الأفكار الشيطانية إني ماسكة الموبايل وقاصدة ما أفتحش الماسدج!!!!

بس سيبك من كل ده،

أنا ممكن ما يكونش عندي مزاج أردّ على بشر أصلاً, ممكن زهقانة.. ممكن مخنوقة من حاجة.. مش لازم مخنوقة منك أنت شخصيًا خالص. مخنوقة من كل حاجة وأي حاجة, عادي.. إحنا بشر كلنا ينمرّ بمشاكل وضغوطات فا مستتية أفك وأردّ عليك رّدّ ظريف وحلو.. عشان لو رديت بعصبية هتزعلي وأنا مش عايزة أزعلك!!

فا بكتبك شوية وهكلمك.. أعمل إيه تاني طيب؟

في ناس بتفتح الماسدج بتخاف لتكون حاجة مهمة فا تسبب اللي وراها عشان تساعد إن أمكن، لكن لو الدنيا في اللذيذ بيشفوفوا اللي وراهم وبعدين ترغوا براحتكوا..

أو ممكن أكتبك ثواني وبتتقمصي برضه!!

أكرّر للمرة الألف الموضوع مش شخصي.. لازم تفهموا كده..

ومش لازم لما أردّ بعد ما أخلص اللي في إيدي تكوني مقموصة وزعلانة وأقعد

أصالحك وأبررك ساعة وتقدي شيلهالي سنة قدام!!
المفروض العلاقة تكون أقوى من كده بكتير وبكتيبيير أوي كمان..
فا بعد إذن سعادة جناب معالي حضرتك إدي البشر فرصة عشان يردوا.. هما
مش قاعدين على زراير الموبايل..
ومش كل حاجة تاخدها بسوء نية.. إدوا أعذار للبشر... إنت متعرفش اللي
قدامك ظروفه إيه واللإ إتلخم في إيه..
ما تعلقوش المشانق لبعض..
استنوا شوية بس..
إحنا الطبيعي إننا بنردّ في لحظتها.. إعدرونا لو اتأخرنا مرة واللإ اتنين!!..
فا ياريت نحسّ ببعض شوية..
الله يخرب بيت الـ seen اللي بيزعل الناس من بعض..
لو محتاجين بعض ضروري دقيقة الموبايل بـ 19 قرش من اتصالات.. ما تحوروش..

"لمّي الدور يا فوزية"

بصّي يا فوفة, استهدي بالله ونفكرّ سوا بالعقل كده..
لمّا تقارني جوزك بجورج كلوني بدمتك مش إنتي بتستهيلي؟
بتستهيلي وإنتي عارفة كده كويس.. وكلنا عارفين مش إنتي بس!!!
إنتي ليه حاطة أمل علم الدين في دماغك وزاعقة؟
هيّ مرات أبوكي لا سمح الله؟
يعني إنتي مشكلتك إن إزاي وإزاي جورج يجيب لأمل مطعم سوشي جنب
بيتهم مخصوص، عشان بتحب مطعم معين ومكانش فاتح في لندن!!
عادي يا حبيبتي.. بالنسبة لإمكانياته عادي... يقدر يعملها أكثر من كده.. هو مش

مقدور عليكم إنتوا الجوز..

وارحمي الراجل من المقارنات دي عشان بقه بدأ يتعوج وإنتي محتاجاه يا غالية..
كل واحد بيعبر بإمكانياته وكل واحد بيعبر بطريقته..
الاهتمام ممكن يكون بوردة... بكلمة حلوة... بخروجة تفرحكوا مش لازم يكون
بعربية أو بحاجة غالية عشان نحسه..
وما تنسيش إن لو هو قارنك بأمل أو كيت أو غيرهم هتزعلي..
جو المقارنات ده ظالم لأي طرف فيكوا.. إنسوه خالص أحسن.

"واتس آب جروب الفصل"

- سلام عليكم.. ممكن تضيفوا سها مامت لارا ..
سها دخلت الجروب ...
* هاااي يا ماميز..

نورتي الجروب يا سها

* بنوركوا

غادة: حد يعرف هوم وورك الماث إيه؟
فاطمة: طيب يا ماميز هما الولاد بينزلوا الفسحة كام دقيقة من فضلكم؟

هدى مامت عمر joined الجروب

علا مامت كارما joined الجروب

أنا حبيت جوزي مامت أحمد joined الجروب

25 members joined the group

* هااااي ماميز

- هدى وعلا وأنا حبيت جوزي: هااااي بنعشقكوا عشق ما يتوصفش...سنة

سعيدة علينا يارب

* وإحنا كمان والله....

هدى: حد يعرف كتاب عمر بتاع الفرينش فين؟

علا: كارما مش بتاكل خالص في الكلاس ؟؟؟؟؟؟؟؟؟ شوفولي حل... وإدوني وصفات أكل حلوة..

باكينام: شوفي وصفات عادة التلي ونجلاء الشرشابي..

سميرة: حدّ يعرف أجيب لحمة فلتو حلوة منين، وعايضة أشتري فانلات بكم لفريده يا ماميز..

دينا: البوتجاز فرقع في وشي، ممكن حد منكوا يبجي يحمي العيال عقبال ما أروح المستشفى..

ولاء: مين مامت زياد؟ زياد تفّ على بنتي حبيبة النهارده!!! عيب أوي كده.

بسمة: برسيل جيل أحسن واللا إريال جيل؟ بنطلون جوزي عليه بقعة كاتشاب وهينفخني لو مراحتش.

هدى: فين أم كتاب الفرينش بتاع عمر؟ محدش بيرد ليه.

حنان: حدّ يعرف كوافيرة شاطرة تعمل كيراتين في التجمع؟

ليلي: عايضة شغالة تجيلي جمعة وسبت وتكون أمينة.

رانيا: شهد جابت حلا من شعرها... فين مامت شهد هنا؟

مها: هو الباص بيوصلكوا الساعة كام؟

عبير: مسلسل جرانند أوتيل بيتعاد الساعة كام؟

ميّار: الرز اتحرق..

شيرين: عايضة نوع كونسيلر حلو

علا: سيل مذر كير إمتي؟

هديل: ممكن واجب العربي؟

حنان: قولولي ألبس إيه في حنة بنت خالت صاحبة صاحبتني؟ بليبييز.

يارا: التيتشر بتاعة السابنس دي لازم نشتكيها... الولد مش فاهم أي حاجة.

هالة: صبغة باليت أحلى واللا كوليستون؟

أسماء: حد بيأجر شاليه في بورتو يا بنات اليومين دول؟

أنا حبيبت جوزي: بتعملوا إيه مع سلفتكوا لما تتدخل في حياتكوا يا ماميز؟

أم فرح: لانش بوكس فرح اتأخذ من شنطتها ممكن تشوفوهولي..

سماح: تردد قناة كوكي إيه؟

مامت فرح : عايضة حد بيع منتج تابروير ..

ولاء: الفراخ مهما غسلتها زفرة، الحل إيه؟

هدى: فين أم كتاب الزفت الفرينش بتاع عمر؟ ارحموني بقى وردوا عليا!!

Hoda left the group

Hoda blocked the group

Hoda left the school

هدى انتحرت وغطوها بصّفح كتاب الفرينش بعد ما لقوه في شنطة لارا بالغلط!!

"اشترى مِنِّي"

لَمَّا تَبَطَّلَ تَزَعَلَ مِنْكَ... اَقْلَقْ..
لَمَّا تَبَطَّلَ تَحْكِيكَ زِي مَا كَانَتْ بِتَحْكِي زَمَانِ.. اَقْلَقْ..
لَمَّا مَا تَعَاتِبْكَش لَوْ اتَضَايَقْتَ مِنْكَ فِي حَاجَةِ مَعِ إِنَّكَ مَزَعَّلَهَا وَعَارَفَ إِنَّكَ مَزَعَّلَهَا.. اَقْلَقْ..
لَمَّا تَتَخَانَقُوا سِوَا وَتَلَاقِيهَا بَطَلْتَ تَعَيِّطُ أَوْ تَحَاوُلُ تَصَالِحْكَ أَوْ تَتَكَشَّكَ عَشَانَ تَتَكَلَّمُوا.. اَقْلَقْ..
لَمَّا تَأْخُذُ مِنْكَ جَنْبَ وَكُلِّ مَا تَبْصَلُهَا تَلَاقِي دَمُوعَ مَتَحَجَّرَةَ فِي عَيْنِيهَا بَسْ بَرِضَهُ مَا بَتَتَكَلَّمْش.. اَقْلَقْ..
لَمَّا تَحَلِّ مَشَاكِلَهَا لَوْحَدَهَا مِنْ غَيْرِ مَا تَأْخُذُ رَأْيِكَ فِيهَا وَلَا تَلْجَأُكَ.. اَقْلَقْ..
لَمَّا تَحْرَجُهَا قَدَّامَ حَدِّ وَتَضْحَكُ ضَحْكَةَ صَفْرَا وَتَعْدِّي الْمَوْضُوعَ مِنْ غَيْرِ وَلَا كَلِمَةَ.. اَقْلَقْ..
لَمَّا مَرَاتِكَ اللَّيِّ كَانَتْ بِتَهَزَّرَ وَتَضْحَكُ وَتَتَكَشَّشُ فِيكَ تَبْقَى سَاكِتَةً طَوِيلَ الْيَوْمِ.. اَقْلَقْ..
لَمَّا تَبَطَّلَ تَعَاتِبْكَ وَتَسِيْبُكَ تِيْجِي عَلَيْهَا مِنْ سَكَاتٍ.. اَقْلَقْ..
لَمَّا تَكَلَّمُ صَحْبَاتِهَا تَحْكِيْلَهَا حَاجَاتٍ عَنْ نَفْسِهَا إِنَّتِ مَتَعْرِفْهَاش وَتَدُورُ عَلَى حَدِّ غَيْرِكَ يَسْمَعُهَا.. اَقْلَقْ..
لَمَّا وَجُودُكَ فِي الْبَيْتِ يَبْقَى زِي عَدَمِهِ وَمَشْ بِتَقُولُكَ نَفْسِي نَقَعْدُ سِوَا.. اَقْلَقْ..
لَمَّا قَعَدْتَكُوَا تَبْقَى سَكُوتَ بَارِدٍ بَعْدَ مَا كَانَتْ مَلِيَانَةَ كَلَامٍ وَرَغِي وَهَزَارٍ.. اَقْلَقْ..
لَمَّا تَبْقَى رَدُودَهَا عَلَيْكَ "حَاضِرٌ.. طَيِّبٌ.. مَاشِي.. أَيُّ حَاجَةٍ" يَعْنِي كَلِمَتَيْنِ وَرَدَّ غَطَاهُمْ.. اَقْلَقْ..
السَّتْ لَمَّا بَتَعْمَلُ كَدَهُ بَتَبْقَى جَابِتَ آخِرَهَا..
لَمَّا بَتَبَطَّلُ تَشَارِكُكَ تَفَاصِيْلَهَا بَتَبْقَى تَعْبَتُ مِنَ اللَّامِبَالَةِ وَعَدَمِ الْإِهْتِمَامِ فَآ بَتَقَرَّرُ تَأْخُذُ جَنْبٍ..
بَتَبْقَى حَاجَاتٍ كَثِيرَةً حَلُوةً جَوَّاهَا مَاتَتْ أَوْ فِي طَرِيقِهَا لِلْمَوْتِ..
بَتَبْقَى اتَعَوَّدَتْ عَلَى الْوَجْعِ وَمَا عَادَتْشْ بِتَتَوَجَّعُ..
بَتَبْقَى قَوِيَّتَ مِنْ نَاحِيَّتِكَ وَالْقُوَّةَ فِي الْمَشَاعِرِ لَوْ زَادَتْ بَتَبْقَى جَفَاً وَبَعْدَ صَعْبٍ يَرْجِعُ لِلدَّفَا تَانِي..

واكتب Miss you Already... إوعى تنسى.. فلّ كده؟

- ما تنساش تتصوّر سيلفي الوداع وصور جماعية للذكرى وخذ ساتر لأن في احتمال تلاقي شلايت وبونيات من صاحب المكان اللي إنتوا فيه وممكن تسمع يا تيببييت ويا ترباتيبييت كمان...
- روح وارغوا بقى على الـ whatsapp واعرفوا أخبار بعض اللي معرفتوهاش في الخروج.. لأن وشوشكوا كانت في الموبايلات!!!!

"ناس ما بيعجبهاش العجب "

عمرك ما هتعجب الناس خصوصًا اليومين دول, لإن الناس بقت بتركّز في حياة غيرها أكثر ما بتركّز في حياتها..

- لو مقولتيش حاجة خاصة بيكي تبقي كهينة..

- لو قولتي يبقى بتنططي على خلق الله..

- لو ميش بتتكلمي كتير تبقي شايفة نفسك وتسمعي بقى: "على إيه إن شاء الله!!! وهي فاكرة نفسها مين الست هانم؟"

- لو بتتكلمي "دي لسانها فالت، دي الواحدة تخاف منها".
- إذا كنتي بيتوتية ومش بتحبي الخروج؛ هتطلعي مكلكة وبتخرجي في السرّ وبتخبي على صحابك..
- لو بتحبي الخروج هيتقال دي مطلوقة في الشارع؛ مش لاقية اللي يلمها..
- بتلبسي محتشم ومراعية ربنا في لبسك، هيقولوا عليكى ستو حاجة وستنا الشيخة!!
- بتلبسي أي حاجة حلوة هيتقال هي شايفة نفسها على إيه؟ لا تكون فاكرة نفسها حلوة!!
- تجدد حاجات في بيتها، يتقالك بيجيوا الفلوس دي كلها منين!! ما يعيشوا عيشة أهلهم!!!
- مش معاكى فلوس تجددى، هيقولوا دول على قلبهم قد كده، ليه البخل والتاريط؟!!
- بتشتغلي؛ يبقى مقصرة مع جوزك وجاية على بيتك وولادك..
- ربة منزل؛ يبقى ملكيش لازمة وبتاكل وبتشربي وبس!!
- لو جوزك بياخد رأيك هيقولوا عليكى ست قادرة وممشياه..
- لو مش بياخد رأيك هيقولوا هبله وتستاها تاحد على دماغها..
- تضحكي في وشّ حدّ ما تعرفيهوش هيقولوا ده جنان ده واللا إيه..
- تبقى راسية كده وراكزة هيقولوا فاكرة نفسها بنت بارم ديله!!!!
- تهتمى ببيتك وولادك وبتفاصيلهم، هيقولوا دي أوفر ومحبكاها.
- تخليكي في حالك، هيقولوا دي طبعها صعب ومش بتحب غير نفسها ومش بتطبق حدّ يتعرف عليها..
- تودّي الناس، هيقولوا خير!!! دي أكيد ليها مصلحة، مش معقولنا بتودّنا لله وللوطن!!
- تخسّي عشان صحتك، يقولوك شكلك عيان ووشك دبلان..
- تفضلي زيّ ما إنتي يقولوك لازم تخسّي!! إنتي إزاي ساكتة على نفسك كده!!!!
- آخر حاجة ممكن الواحد يشغل دماغه بيها هي كلام **الناس** , عشان كله هري لا بيقدم ولا بياخر!

"قواعد الفيرست ديت للشباب"

- أولًا حاول تتكلم مع أختك كثير أو مع أي بنت في عيلتكوا قبل أول مقابلة ليك عشان تفهم الدماغ ماشية إزاي, صدقني فايتك كثير من كتر قعدتك مع ميدو وحمادة..
- أول ما تتقابلوا، مش هوصيك على الجنتلة بقى, تفتحلها الكرسي عشان تقعد، تقولها المكان هنا مريحك واللا تحبّي نروح حتة تاني. طب التكييف لو مضايك أقولهم يقفلوه.. الكلام ده بيعمل شغل عالي أوي.
- بلاش من أول مرة تدبّس نفسك وتجيب بوكيه ورد. افرض ما اتفقتوش أو كنت مش طايقها أو مغيث قبول، يبقى إنت كده دبّست نفسك بدون داعي.. اتقل.. هتتغرم كثير ما تقلقش من النقطة دي..
- ابعده خالص عن أبو تريكة ورمضان صبحي وسيرة الكورة والماتشات والبلاي ستيشن, كل بنت بتحسّ إنهم ضررتها, حتى لو بتموت في الكورة مش لازم تحكيلها تفاصيل ماتش أرسنال وتشيلسي اللي فات!!!
- حاول ترغي. أنا عارفة إن الرجالة غالبًا بنسبة 99% بتكره الرّغي بس معلش حاول.. ده مستقبلك حاول تعرف هي بتحبه إيه، بتكره إيه، شخصيتها إزاي عشان مصلحتك والله..
- حاول تندمج معاها لو حكيتلك عن صحباتها لأنك لو وصلت لصحباتها يبقى غالبًا الصنارة غمزت.. وحاول تحب منة صحبتها لأنها هتبقى عنصر أساسي في حياتكوا...
- بلااااش تاخذك الجلالة وتحكيلها عن مغامراتك العاطفية وإنك مدوّخ البنات، وإن بنات الدفعة كانوا بيغمى عليهم وإنت معدّي من قدامها, الكلام ده نتيجته عكسية تمامًا..
- قولها إنتي شيك.. إنتي دماغك حلوة.. عاجبني تفكيرك "ده لو الجو عجيبك طبعًا" .. هتلاقها احمرّت واخضرّت واصفرّت وهتقول عليك ذوق وبتفهم..
- مش من أول مرّة تشوفها تقولها مش بحب الستات اللي بتشتغل ومش بحب الستات اللي بترغي واللي.. واللي... هتتحسّ إنك بتتشرط وهتقفل منك..
- مش لازم تاكل براحتك أوي كإنك قاعد على القهوة مع أصحابك في المنيل, هي مراقبة كلّ تصرفاتك وطريقتك.. دول سوس يا بابا..
- لو حسّيت إن في استلطاف من الطرفين بلاش جوّ التقل الغلس, خليك عادي.. لا تقيل ولا مدلوق.. بس فهمها راسها من رجليها..
- مهما كان الحساب اللي هتدفعه إوعى تقول المكان ده عالي. هتتحسّ

إنك بخيل وبدال ما إنت اللي مختار المكان يبقى تدفع وإنت ساكت.. عدّي الليلة!

- وصلها.. سواء لعربيتها أو لحاجة هتركبها.. هتبقى شياكة أوي منك..
- لو في قبول ابعتها مسدج حلوة كده تقولها كان يوم لطيف.. يوم لذيذ.. ما تسبهاش تقعد حيرانة.. ممكن تقفش..
- ومن هنا ورايح اهتمام بقى وبوكيهات الورد اللي كنت مستعجل عليها وشيكولاتات.. عيش وعيشها وباركلكوا قريب يا قفايط..

"قواعد الفيرست ديت للبنات"

- مش لازم تخفي ملامح وشك بالفلو ميك أب, عادي خليك طبيعية لأنه هيشوفك كتير لو في نصيب وهيقفشك في يوم من الأيام, خليه يتعرف على ملامحك....
- بلاش بهرجة في اللبس, إنتي مش رايحة فرح أختك.. إنتي في نادي يا حبيبتني ملوش لازمة السواريه خالص ولا الموضوع بيستدعي جليتر وترتر وخلاخيل. إلبسي لبسك العادي..
- ملهوش أي داعي من أول لحظة تحكيه إن 500 واحد اتقدملك، إيشي مهندس وطيار ودكتور جراحة ورائد فضاء وأستاذ جامعي مهاجر لأمريكا،

وبالرغم ده كله إنتي رفضتهم كلهم عشان بيان إنك جامدة أوي.... بتبقي مفقوسة أوي إنك أوفر ومش هيصدقك في بقية الكلام اللي هتقوليه طول القعدة

- بلاش مٌحن ولا سهوكة خليكى عادي برضه, مش لازم تقولي "مش تزعل مني... مش تبطل تكلمني.. مش زحلانة.. مش قمصانة".. الشباب ملهومش خلق للجو ده ...

- بلاش كذب من نوع:

إحنا في الويك إند بنروح عزبة باهي وبنركب خيل ومش بيغمضلي جفن إلا لما بقعد على البيسين لحد ما أروح في النوم والدادا بتيجي تطلعني أوضتي..

وفي الصيف بركب الجيت سكي بتاعنا في الفيلا بتاعة دادى في سيدي عبد الرحمن كل أربع وخميس... يا ريت بلاش عشان بتتهرشي بسرعة أوي.

وهو لو جه وخطبك من شقتكوا اللي أوضة وصالة ولقى كل ده سراب مش هتشوفي وشه تاني...

- ملوش لازمة تقوليله أنا طيبة وغلبانة وعسولة ومسمومة وربة بيت هائلة وبحب الاستقرار الأسري. هو هيكتشف ده بنفسه.. بس إديله مساحته..

- بلاش تقعدى تتكلمى عن نفسك طول القعدة وما تديش فرصة للراجل إنه يتكلم أو يعلق حتى على جملة قولتيها... الأيام جاية كتير وهتاكلى دماغه براحتك بس براحة عليه في الأول...

- لو قالك اختارى مكان نتقابل فيه, مش لازم تختارى مكان المينيم فيه 300 جنيه، دي مش بتدل إنك بنت ناس يعني, خصوصاً لو كان مكان أول مرة تروحيه.. هيبان إنك تايهه وولا عارفة حاجة, اختارى نادي أو كافيه عادي.. (كوستا) مش بيئة على فكرة...

- مش من أولها طلبات وعايزة وهاتلي...

لو قالك أطلبلك إيه؟ كفاية عصير وقوليه ممكن جوووس، بتبقى حلوة... مش لازم تاكلى نجرسكو وفاهيتا وسيزر سالاد من أول طلعة.. إهدى شوية... ممكن يحس إنك ما صدقتي...

- مش لازم كل كلامك على "علا وهالة وإيمان...", هو مش جاي عشان يسمع آخر أخبارهم، وهو ما يعرفهمش أصلاً ولا فارق معاه يعرف إن علا صبغت شعرها ولا إن هالة اتخطبت لمعتز.. خليكى في نفسك...

تجيب قرارها وقرار اللي جابوها عشان تعرف ترن الزن الصح وميقاش في معلومة واقعة منها ممكن تخليك ترفض طلبها.. بتعمل عليك كماشة من الآخر..

- هتبدأ معاك الحوار بجملة: "حبيبي، ممكن أطلب منك طلب"... فا لو إنت عارف إن كده خلاص إنت لابس لابس فا ريح دماغك وقولها موافق حتى قبل ما تعرف إيه هو الطلب، صدقني هترحم نفسك من نخورة دماغ لا يتحملها عقل إنسان اسمها نخورة الشنيور في الجمجمة.. ودي بينشأ عنها صداد بيفضل معاك شهر كده لحد ما تتعافى منه...

- لو المحاولة الأولى فشلت، هتقوم تكتيلك مسدج على الماسنجر كتلقيح كلام كده... بتعرفك إن المعركة لسه في أولها.. هتكتيلك جملة من نوع: "شكرًا إني عرفت غلاوتي عندك" وأنا لو كنت مكانك كنت استحالة هكسر بخاطرك...

وهتفضل تلاحقك على الواتس أب والفايبر بنفس الماسدج اللعينة دي لمدة 3 أيام، لدرجة إنها هتلق في دماغك زي ما أغنية تلمة بتلق في مخك ومش بتعرف تنساها..

- لو طنشت الجملة دي فا هتبتدي تعلن الحرب..

كل اللي فات ده كان جس نبض!!

هتفتح الباب وتقلب وشها وتنكش شعرها وتصحيك الساعة 3 الفجر وتقولك مع النغز في كتافك: "أنا مش قادرة أفهم ليه ما ينفعش نجهز الشنط دلوقتي ونطلع الساحل يومين مع مها وجوزها!!! دلوقتي الساحل بقى وحش!!!! واللا هو بيحلى مع هشام وكريم؟!!!"..

ما إحنا لو كنا هنطلع مع إيمان أختك كان زماننا على الصحراوي دلوقتي...

وقابل بقى!!

- لو طنشت هتتبع معاك مبدأ (التوتر هو الحل) ها...ها!!!!؟

ها!!!!؟!! ها!!!!؟!!

أحضر الشنط... ها!!!!؟ ها!!!!؟!! ردّ عليّ؟ يعني أحضرها واللا لأ ها!!!!؟ والمرحلة دي ممكن تلتزم معاك في 72 ساعة متواصل بلا نوم بلا أكل بلا دخول حمام، 72 ساعة من ها!!!!؟ ها!!!!؟!! ردّ عليّ؟!!

- لو المرحلة دي قدرت تستحملها هتسمع موشح ها!!!! ها!!!! وهتضيف عليه بوز إخص رباعي الأبعاد مع تمتمة وهمهمة بكلام مش مفهوم هو إيه بس واضح جدا!!!! إنه لا يسرّ عدو ولا حبيب...

- غالبًا 90% من الرجال بيكونوا استسلموا عند المرحلة دي بس الـ10%

التانيين بيحبوا ورا لما تبدأ اللعنة تحلّ عليهم بسبب إن المدام مش راضية، فا الراجل بعد ما الإكصدام اتدغدغ منه وبعد ما 8 خروجات إتكنسلوا مع صحابه هيضطر يرحم نفسه ويقولك غوري حضري الشنطة عشان نروح الزفت الساحل مع مها..

وبكده يبقى انتصر الزن النسائي للمرة المليون بعد المليار لأنه سلاح بشري لا يحتمله بشر. سلاح أقوى من النووي لأنه بيدمر خلايا المخ من كتر الهري واللت..

"أسطورة النيش"

كنت برغي مع واحدة صاحبتني أجنبية فا جات سيرة الجواز ومعرفش إيه خلاني أتسحب من لساني اللي عايز قطعه ده وأقولها على "النيش"...
طبعا لكم أن تتخيلوا حجم المأساة إنني أترجمها كلمة نيش بالإنجليزي!!!
ويتش إزرز حاجة صعبة جدا..

فا بقولها ده العروسة بتجيبه عشان الجواز وحاولت أكروت الموضوع..
فا أصرت تعرف هو إيه ده..

مع إنني قولتلها بلااااش، بس أصرت..

أنا عرفت إنني داخلة على موأل أزرق، فا أخذت نفس عميق وحاولت أبسطها المعلومة قد ما أقدر..

قولتلها فضلت خيرك كده يا نيكول ده 20 حلة فوق بعض "تيغال على سيراميك على الألمونيا" حتى لو الألمونيا بيلزق بنجيبوا برضه غتاته..

على طقمين صيني بندق فيهم دم قلبنا وملهمش أي ثلاثين لازمة..
على طقم خشاف "وقولتلها وحياء أغلى ما عندك ما تسأليني يعني إيه
خشاف لحسن أطم فإ اسمعي وإنتي ساكتة " ..
على 3 أطقم أطباق أركوبال على ميلامين على زفت على دماغنا..
غير الـ50 مج والـ200 كوباية اللي بودن واللي مقطوع وذنهم على طقم
الشورية والكبشات والمغارف وطقم المعالق المكون من 4000 قطعة ولازم
نصهم نكون مش عارفين بيتهب بيهم إيه بس بيتجابوا..
غير الصواني اللي بتترصص فوق بعض والأباريق والشفاشق وطقم القهوة
العربي والأفريقي والهندي..
على صناعة السندوتشات ومفرقة الفيشار والوافل مبيكر مع إننا عمرنا ما
دوقناه بس أهى أنعة والسلام..
على صواني الكب كيك وقوالب التورتات و 5 أطقم جيلي سيليكون عشان
طالعين موضة!!
على البلاستيكات والملاحات وحاجات التوابل..
وكووول ده بنحطه عشان نملي بيه النيش..
وحدت ربنا إنني خلصت الحوار ده ووصلتلها المعلومة....
اللي فاجئني بقى إن نيكي حبييتي مفهمتش كل الكلام اللي فات إلا
كلمة spoon قالتلي سو وات إذ نيش؟ بعد ده كله بتقولي وات إذ نيش؟!!!
بعد ما نتعت في قلبي كل ده، بتقولي وات إذ نيش؟
معقولة مفهمتش شفاشق وأباريق والحلل السيراميك!!! ده إيه الجهل
ده!!!!
يعني تعبني كله راح في الأرض وداسته تريلا سواقها عامل دماغ
صراصير!!!!
وساعتها الصراحة حسبتها بيني وبين نفسي أنا لسه هشرحلها تاني يعني إيه
نيش فا قومت قفلت الواي فاي علي أمل إن النت قطع وقولت هدخل أكلها
تاني بعد شهرين كده تكون نسيت أم الحوار الزفت ده..

"آداب الموبايل"

- ما تتصلش بحد أكثر من مرة، ما تزّنش، هو أكيد لو فاضي كان ردّ ومتخافش رقمك طلع عنده يعني هيكلّمك بس اتقل شوية..
- ما تجاصرش حد بمكالمات و messages على الماسنجر وواتس آب وفايبر وتانجو وكلها أنت فين، فين، فين... نرجع لنفس النقطة ما تزّنش، ما تعرفش ظروف اللي قدّامك إيه..
- مش بفهم يعني إيه 30 ميسد كول وفي الآخر يكون مفيش حاجة مهمة!! أيّ حد هيصحي يشوف الرقم ده هيتربع وقلبه هيقع في رحله..
- عيب تمسك موبايلك وإنت قاعد في تجمّع عائلي أو مع باباك ومامتك، ما يصحش يتكلموا وإنت مش معاهم أصلاً... الزفت ده مش هيطيير..
- وشك مكانه مش شاشة الموبايل 24 ساعة، مش أول ما تصحي تمسكه لحد ما تنام، الموضوع بيوصل للإدمان. الموبايل بيدمّر العلاقات الاجتماعية، محدش يستهتر بيه.. مراتك وولادك ليهم حق عليك..
- لازم تعمل الموبايل سايلنت وإنت داخل تصلي، ما ينفعش الموبايل يرنّ وإنت بتسجد أغنية من بتوع المهرجانات!! ولا حتى لو نغمة إسلامية. المسجد ليه هيبتة واحترامه..
- وحتى ولا ينفع يرن في محاضرة، إعمله سايلنت..
- متحطش نغمات مسقّه أو ضحكة خليعة أو صوت مقرف، لو ده عاجبك فا إحنا مش مضطرين نسمعه..
- عيب لما تعمل الموبايل flight mode وضع الطيران عشان أهلك أو مراتك ما يعرفوش يوصلوك وإنت خارج، إنت مبسوط لكن هما ميتين من القلق عليك..
- ما تكتبش حد باسم ما تقدرش تقولهوله في وشّه زي الحكومة واللا الزفت، عيب ممكن جدّا يشوفها في مرة.. وإنت مترضهاش لنفسك...
- الولاد يراعوا ربنا في كل أبليكيشن بينزلوه وكل صورته وكل فيديو.. وأخيرًا في حياة تانية فايتاكووا برّه محيط شاشة الموبايل.. أهلك وولادك ومراتك وصحابك أهمّ..
- خسارة عمرك يضيع وأنت مدمن حته جديدة!!

"احترس من الكمين"

عزيزي الزوج نصيحة لوجه الله..

إصحي من بدري
لبّسيهم المايوهات..
ما تنسيش الطاقة اللي عليها the avengers وإيلسا.. الحاجات دي مفياش
هزار الله يكرمك..
إوعي تنسي نضّارات الشمس البلاستيك اللي على شكل سبايدر مان
ومتدللة من مناخيرهم ومش شايفين منها حاجة..
هاتي نضّارات السباحة.. قال يعني بنتك اللي بتعوم كلابي دي هتقلب رانيا
علواني وهيّ نازلة تعوم بيها..
خدي البورنس بتاعه وبتاعها وفوط كتير أوي..
حطيلهم الصن بلوك..
حطّي بذمة.. الشمس ما بترحمش..
انفخي العوّامات..
بلاش لايف جاكيت هما مش بيعوموا في المحيط الأطلنطي يعني والبتاع ده
غالي وبايخ كده.. عوّامات على شكل بطة وقطة بيحبوها أكثر..
الجرادل والشوك ملهاش لازمة في البيسين أقسم بالله.. هتضيع منكم
وهيعيطوا عليها سنتين قدام..
إنزلي قرفصي معاهم في بسين الأطفال أبو شبر ونصّ ده لحد ما ركبك تزرق..
لبّي نداء الطبيعة بتاع "في بيبي يا ماما" اللي بيخليكي تطلعي الأوضة 10 مرات
خلال الوقت اللي إنتوا فيه في البيسين..
لبّي نداء الطبيعة بتاع أخته، هي ملهاش نفس تعمل بيبي هي كمان!!
لو حسّيتي إن لون بسين الأطفال بدأ يتغير خدي ولادك واطلعوا فوراً لأن كده
واضح إن في أطفال تانية لبّوا نداء الطبيعة جوّه البسين..
اتعودي تسمعي جملة "أنا سقعان يا ماما"، وصوت تكتكة سنانهم كخلفية
لأحداث اليوم مع إن مياه البيسين مولعة بس أهو حافظين مش فاهمين بقى..
إوعي تسوّل لكي نفسك تنزلي البيسين الكبير هيعملوكّ مناحة.. قرفصي من
سكات..
نظمي حركة الولاد اللي بيتزحلّقوا على زحليقة بطوط الوحيدة اللي في بسين

لَبَّوْا نداء الطبيعة عشان بقالكوا كثير ما لَبَّنوش!!
إلحقي ابنك اللي بيسفّ أكياس السكر وإنتوا قاعدين في الكافيه..
قوموا من الكافيه بكرامتكوا.. لأن أشكالنا دي لازم تقعد في بلاينج ايريا...
رَوِّحِيهم وهَمِّمًا بيعيطوا ولا كَانِكْ طلع بوزك معاهم من 6 الصبح..
خليهم يعملوا بيِّي..
نِيَمِيهم..
لَمِّي المايوهات من المنشر..
اصحوا من بدري ولَبِّسِيهم المايوهات، وما تنسيش تلبسي ركبة كاوتش عشان
ركبتك باظت من إِمبارح.. وخدي معاكي ساندوتشات وشيليهم فوق راسك وأنت
مقرفة في البيسين عشان العوم بيجوع..
ورغم ده كله لما بنشوف ضحكة ولادنا طالعة من قلبهم، فا تعب الدنيا كله
بيهون..
وبعد ده كله يتقالك إنتي راجعة تعبانة ليه؟ ده إحنا حتى كنا بنصيف!!

"دعوة بكنوز الدنيا"

ربنا ما يحوجك لحدّ يا بنتي...
ربنا ما يحوجك لحدّ يا بني..
الدعوة دي ياما سمعناها من أمهاتنا ومن جدتك وجدتي، وكنا نقول في سرّنا هو
ما فيش دعوة أحسن من دي شوية!!
هما كل مرة هيدعوها لنا؟

كنا بنقول آمين ونبوس راسهم وننسى الدعوة..
دلوقتي مع كل يوم الدعوة دي بترنذ في وداني وأدعي ربنا إنه يكون استجابها
فعلًا من ماما وجدتي لأنني كبرت وعرفت قيمتها..
لما يبقى تكالك على رب العالمين دون البشر.. دي نعمة لا توازيها نعمة..
لما تبقى عايش ومش بتذل نفسك لشخص.. دي نعمة..
لما ما تتحوجش لبني آدم يتحكّم فيك ويبهلك دي نعمة ما بعدها نعمة..
لما محدّش يبقى كاسر عينك.. دي نعمة..
لما محدّش يهينك عشان ليه جمایل عليك.. دي نعمة...
لما محدّش يغمزلك عشان يفكرك باللي عملهوك عشان تخرس وتحطّ لسانك
في بقك.. فا دي نعمة..
لما محدّش يلّقح عليك كلام.. ويقولك فاكر لما عملتلك كذا.. دي نعمة..
لما محدّش يجرؤ يقولك أنا خيرى مغرّقك وشوف أفضالي عليك.. فا دي نعمة..
الفضل من عند الله..
لما محدّش يعايرك بخدمة عملهاك في يوم..
ويفكّرك بيها ويسمّ بدنك بيها صبح وليل.. دي نعمة..
لما تبقى رافع راسك لأنك عارف إن محدّش ليه عندك حاجة ومحدّش هيقولك لو
كنت ناسي أفكرك.. دي نعمة..
ادعوها لنفسكوا ولحبايبكوا ولولادكوا..
ربنا ما يحوجهم لحدّ..
خصوصًا في الأيام دي..
وادعوا إن لما حدّ يحتاجكوا تكونوا سبب لتسهيل أمورهم وسبب إنه ما يتدلس من
حدّ تاني..
خليكوا إنتوا الناس اللي لو حدّ إحتاجلهم ما يندموش على اختيارهم ليكوا..
ربنا ما يحوجكوا لحدّ لا وإنتوا شباب ولا لما تكبروا إن شاء الله..
اللهم لا تُحوجني لأحد ولا تجعلني عبثًا على أحد، واجعلني غنيًا بفضلك عمّن
سواك..

"فيس بوكهم وفيس بوكنا"

الفيس بوك عند الرجاله غيرنا خالص..

عالم تاني..

الراجل بيحط بروفايل بيكتشر واحده وممكن يفكر يغيرها بعد 10 سنين لما يحط صورة فرحه وبيشيلها بعد اسبوع ويرجع لنفس الصورة اللي كان حاططها تاني, مع إنها ممكن تكون صورته في اولى جامعة وهو مدي ضهره للبحر ومش باين منه حاجة بس بيحبها..

مش كل شوية تزني غير صورتك.. غير صورتك.. مش هيغيرها..

ولو حاطط صورة النادي الأهلي خلّي تعليقاتك لنفسك.. ده مبدأ حياة..

معندهم مش مبدأ حط الصورة.. شيل الصورة.. حط الصورة.. شيلها..

كل اللي بيشيره فيديوهات لأجمل أهداف ميسي أو إخوان محمد صلاح أو تصريح لنادي بيشتري لعيب أو بيبع لعيب.. أو فيديو لـ free stlyer بينطط الكور بشكل مبهر..

مفيش check in معندوش الجو ده, ممكن يكون في باريس وتلاقيه معموله tag إنه كان مع ناس هناك, مش في بالهم الهري ده..

مش بيحبوا الستاتس زينا.. بيكتبوا ستاتس لو في حدث عظيم حصل..

زي مثلاً الحمد لله رزقنا الله بعمر..

نقطة ومن أول السطر.. الخبر خالص..

بس كده مفيش لتّ وعجن خالص.. ما قلّ ودلّ..

متحطيش راجل في الـ favourite هتجيك نوتيفيكيشن كل 3 سنين إنه شير حاجة..

سياسة تلقيح الكلام دي غالباً مش بي فهموها غير لما بيشوفوا وول مراته أو أخته وبيفطس من الضحك..

لو عربيته اتدشدشت بيحط صورتها ويقول قدر الله وما شاء فعل, مش منه لله رامي ركب معايا وما صلاش على النبي.. ويقطع مع رامي..

لو عجبته حاجة أووووي يعني, ودي بتحصل كل فين وفين بيعمل لايك, لو جوزك عملك لايك يبقى بجد عجبته.. ملهومش في الكومنتات بتاعتنا ولو عمل شير يبقى صلي ركعتين شكر..

أعلى نشاط لأي راجل في البوستات والشير وقت ماتشات الأهلي والزمالك أو قرب نهاية الدوري أو أثناء ماتشات الكلاسيكو.. تلاقي البوستات بتترف..

مفيش جو feeling sad و disappointed.. الكلام ده ملوش مكان في الوجود,
ومش بيهتم بأي حد كاتبه.. ولا كأنه قراه أصلاً.. هو ناقص هم!!

مفيش راجل عنده خلق يقرا كل حاجة المدام بتشيرها له أو بتعمله فيها tag
طبيعتهم كده.. لو البوست كورة هيقرا لكن بوست بتلقحي كلام فيه عليه
هيقراه ليه؟ ده حتى لو قراه هيعمل عبيط..

خناقاته مع أصحابه ممكن تكون على فاوول، على ضربة جزاء، على top score
في لعبة ذهنية رهيبه.. ممكن الفاوول ده ما ينيموش لحد ما يقنع صاحبه بيه..

الرجاله بتعصب بعض بانهم يصوروا نتيجة ماتش فيفا وينزلوها على الفيس بوك
والموضوع بيقلب هزار وضحك.. مش بيقوموا يجيبوا بعض من شعرهم زي ناس..
إحمممم إحممممم.

عادي يعمل check in في قهوة مع أصحابه وما يعملش في cilantro قعدة
القهوة عنده أحلى..

لو عملتي تاج لراجل في صورة فانوس أو كحك عيد بيشيل التاج في لحظتها
وممكن جدااااا جداااااا يعملك بلوك في نفس اللحظة برضه....

عادي تلاقي الوول عنده فيها جمل كده..
إيه الكلام؟
ها يا برنس؟
عاش يا معلم..

كل الجمل كلمتين.. والمعلومة بتوصل وبيترد عليها بكلمتين بالكثير برضه..

هقولها ثاني لا بيحبوا المنشن ولا الـ tag..

لو فاكرة إن في عيد ميلادك جوزك هيبعتلك صورة تورتة تبقي عبيطة.. أظن
إنتي عرفتي غلطتك..

كفاية إن التايم لاين عندهم خالي من baby وقمراية وكيوتة وطيبوة وزفتونة...
دي لوحدها كفاية..

فيس بوكهم خالي من السيلفي وما أدراك ما السيلفي بيرفع الضغط إزاي..
مفيش بوز البطة ورجل البجعة.. والعسل ده..

الفيس بوك عند الرجاله الحق يتقال مريح للأعصاب.. مفيش خناقات ولا شد
شعر ولا تلقح كلام.. أنا بشوف الفيس بوك عند جوزي بحس إنه version مختلف
عن اللي موجود عندي..

إنما فيس بوك الستات يتكتب فيه كُتب بقى.. نخلييه بعدين بقى على رواقه..
عايزله مخمخة..

يوقف أكثر ما هو واقف خلقه..

- لو في خناقة أو اشتباه في حدوث خناقة هتلاقي تلال من الفانلات والإسدالات طالعة من الشبايبك والبلكونات وتحسّ إن تعداد السكان جوّه الشقة الواحدة 50 مواطن, كله طالع بيتفرّج... اللي بيتفرج وفي إيده نص بطيخة وبيتف البذر على اللي بيشتتم واللي بتأزاز لب سوپر واللي وقف مذاكرة وبيتحجج بالخناقة..
- كمصري أصيل لازم تفاعل... مش بنرتاح إلا لما بناخد الحاجة أم 20 بـ 10 ونحسّ إننا ضحكنا على البيّاع مع إن تمناها أصلا ٢ جنيه يعني متأمر وأهبل..
- لازم لو بتتصل بحدّ بره مصر تعلّي صوتك عشان يسمعك كويس..
- لازم يوم الرؤية تنزل الشارع حتى لو مش هتشتري حاجة.. بس لازم ننزل الشارع..
- استحالة أو شبه مستحيل نقول ما نعرفش لازم نخطّ التاتش ونقول أيّ كلام.. أوّمال نقول ما نعرفش ونطلع مش عارفين, ودي تيجي!! ونسيب الفتّي والهزّي لمين؟
- إحنا بناخد بسرعة جدّا على اللي جنبنا في المترو أو في أي وسيلة مواصلات... من حقنا عليه نبصّ معاه في الجرنان ونقوله ما يقلبش لحدّ ما نخلص وممكن نقول رأينا في الموضوع اللي بيتخانق فيه على الموبايل وننط معاه بجسمنا في ساب وإي سيرف...
- إحنا كمصريين غالبًا بنزيد في الوزن أو بنكرش أو بنترهل بعد الجواز وده ملوش علاقة إن أكل الستات حلو لأن ساعات ستات ورجاله بيطلعوا غلبهم في الأكل..
- إحنا كمصريين شايفين نفسنا الشعب اللي فاهم في الكُفت وده مخلينا متأخرين في معظم المجالات من كتر الفلسفة والتفلسف والتحوير, لا دول الخليج عاجبانا ولا أوروبا ولا آسيا... إحنا بس اللي بنفهم.. إحنا بس اللي صح!!
- المصري بيحافظ على موبايله أكثر ما بيحافظ على سلامته الشخصية.. بيحط الموبايل في جراب ويحطه كافر حماية, بس مش بيلبس الحزام وهو سايق عشان بيخنقه..
- المصري هو الأب الوحيد اللي كان بيطلع الأول كل سنة بس قرّر يخشّ معهد حبا في جو المعهد رغم أنه كان أول أو ثاني الجمهورية..
- المصري الأصيل هو اللي بياخد معاه وهو مسافر جنبه بيضا ورومي وعيش وحلاوة ومحشي كرنب وعسل أسود لو طلع بره مصر كأنه رايح صحرا...
- المصري هو اللي بيستنصح ولما يروح مطعم يقوله مش عايز المياه دي عشان سعر الإزارة 10 جنيه وهو دافع في الغدوة 400 جنيه والأكل

- أصلاً تكلفته 100 جنيه وهو عارف بس إزازة المياه لا.. مش بقولك نصاحه...
- إحنا الشعب اللي الردّ الطبيعي عنده لما حدّ بيسأل على أي عنوان: هو قالك فين؟
 - إحنا الشعب اللي مش بيرمي الأكياس البلاستيك ولا الأزايز ولا علب البسكوت.. موضوع إعادة التدوير والاستخدام ده بيحري في دمنا..
 - إحنا الشعب اللي وحياء أبوك عنده محايلة ووحياة أمك شتيمة...
 - إحنا الشعب اللي بيحيب معظم مشاكله في العين والحسد والأرّ حتى لو مشاكل في الاقتصاد القومي..
 - إحنا الشعب اللي بيقعد يشرب ويأربع ميه لحدّ ما أدان الفجر يقول الله أكبر.. قال يعني إحنا جمال وهنحتفظ بالمياه... اللي دخل على قدّ اللي رايح.. بس ده أسلوب صيام..
 - إحنا اللي معظم الرجالة ما بتقوليش اسم مراتهم على أساس إنه ما يصحّش! اسمنا الجماعة أو ماما أو أم كذا... ثقافة شعب..
 - إحنا الشعب اللي ما بيكونش معاه 100 جنيه في جيبه بس لازم نمسك أحدث موبايل ونقسّط أحسن عربية ونستلف عشان نصيّف في هاسيندا..
 - إحنا الشعب اللي لو في كمين كل العربيات اللي جاياه عكسك بترعشلك عشان تاخذ بالك..
 - إحنا الشعب اللي ما يسيبش شيشب مقلوب أبدااااا وما يرتاحش إلا لما يعدله.. وبنعتبر ده من دلائل قوة الإيمان!
 - إحنا الشعب اللي اختار شيبسي بطعم الجمبري!! شوفت العكّ!
 - إحنا الشعب اللي مهما أكل أحسن أكل لازم يقول جملة: "بس أكل ماما أحلى" ..
- إحنا المصريين..
والمصري معروف بقوّته وجبروته.

"جوّ رخيص"

"إحسبها صحّ"

بالعقل كده وعشان نبقي على بيّنة..
الطبع اللي إنت شايفة فيها دلوقتي مش هيتغيّر بعد الجواز والطبع اللي مش
عاجبك فيه دلوقتي، واتكلمتي فيه بدل المرة 500 مش هيتغيّر بعد الجواز زي ما
إنتي فاكرة..

الجملة السحرية بتاعت "كله هيتغير بعد الجواز" المفروض تفقد مصداقيتها
والمفروض إن ما يتضحكش على أي حدّ عاقل بيها ثاني...
لا "كله" بيتغير مع الجواز ولا حاجة..
"كله" دي كلمة بتودّي في داهية..
الجملة دي يا ما كانت سبب في فشل جوازات..
"الطبع يغلب التطبع"..

مش معقول تكوني شايفاه بعينك بخيل وجِلدة ومش بيلبس عدل وبيستخسر
في نفسه اللقمة وبيحاسبك على المليم ويقولوك هيتغير بعد الجواز
وتصدّقي!!!

مش ممكن يكون لسانها طويل ومش عاملالك قيمة وملهاش كبير وتصدّق اللي
يقولوك هتتعديل بعد ما يتقفل عليكوا باب!!!

صعب أوي يكون كدّاب أو تكون كدّابة في كل تفاصيل الحياة وكل ده يتبدل بعد
الجواز!!

لا البخيل على نفسه هيغرّك في كرمه، واللا اللي لسانها طويل هيبقى
لسانها بينقّط عسل، ولا اللي عايش حياته كدبة هيتوب فجأة!!
بالعقل كده لو اعتبرنا إنه بالحب الطباع بتتغير فا هتتغير بنسبة كام؟ ممكن
تتحسّن بنسبة 10 إلى 20 % بس ده بالزعيق والخناق والزعل والنكد والعيشة
اللي تقصّر العمر!!

لو مش عاجبك طبعها ورافضه من الأول جملة وتفصيلا ما كنتش اتجوزتها وما
كنتيش اتجوزتية ووافقتي عليه.

لأنه ببساطة مش هو ده اللي هينفعك ولا هي دي اللي هتتاسبك..
اللي اتنازلت عنه من البداية استحالة هتتعرف تعيد تكوينه من أول وجديد
بالشكل اللي يرضيك.. لأنه أصلاً مكانش ليه وجود..

في طباع بتكون ثوابت في الشخصية مش بتتغير بالطبل البلدي وفي رفايع
ممكن تتظبط بالعشرة وبالكلمة الحلوة!!

كل واحد عقله ف راسه يعرف خلاصه وركّزوا مع الإشارات اللي ربنا بيعتھالكوا...
بتكون واضحة جدًّا بس في ناس بتحب تعمل عبيطة وتعيّط في الآخر..
كل الناس يحذّروها من شخص وهي شايفة بعينها إشارات تسدّ عين الشمس
وبرضه تكمل..
متنكدة ومش مبسوطه وبرضه تكمل..
طبعهم مش راكب على بعض وبرضه تكمل..
خلاص كملي إنتي عاقلة كفاية إنك تحدّدي إنتي عايزة إيه..
وإنت عاقل كفاية عشان تختار مصيرك، ويا ريت كلنا نبطل نبصّ تحت رجلينا
عشان الجواز قرار محتاج تفكير مش مشاعر وبس..

"صراع الأبناء"

يا ريتهم كانوا اطلقوا قبل أما أشوف أمي بتتضرب وبتترمي قدّامنا على الأرض..
يا ريتهم كانوا اطلقوا قبل ما أسمع أمي بتدعي على أبويا وبتحسين عليه من
كثر اللي شافته منه..

يا ريتهم كانوا اتطلقوا قبل ما أسمع أبويا بيكلم ستّات غريبة آخر الليل وأسمع صوت ضحكته المسروقة في الضلّمة لما أقلق وأدخل الحمام..
يا ريتهم كانوا اتطلقوا قبل ما أكره أنا وإخواتي عشيتنا معاهم..
يا ريتهم كانوا اتطلقوا قبل ما أشوف صوابع إيد أبويا معلّمة على وشّ أمي كل يوم!!

يا ريتهم كانوا اتطلقوا بسّ فضلت صورتهم حلوة في عنينا ومبنية على الاحترام المتبادل!!

يا ريتهم مكملّوش سوا عشان أمي خايفة من لقب مطلقة وأبويا مش عايز يصرف علينا نفقة!!

يا ريتهم كانوا احترموا بعض سواء كمّلوا أو اتطلقوا..
يا ريتهم ما عقّدوناش أنا وإخواتي من الجواز والارتباط!!
يا ريتني كنت عشت وسط أب وأم بيعرفوا يتناقشوا عادي من غير شتايم ولا مدّ إيد ولا إهانة..

أنا وإخواتي اتكسرنا..

عايشين وسط أم مكسورة ومجروحة وأب بنخاف من صوت مشية رجله وهو يفتح باب الشقة!!

أهلنا ما يعرفوش حاجة عنّا لأنهم مش فاضيين غير للخناق والضرب ورمي التهم على بعض !!

إحنا بننام على صوت عياط أمي المكتوم وبنصحى على شخط أبونا اللي شايف أمي وإخواتي سبب كل المصايب اللي ممكن تحصله..

في أهالي كثير مش بياخدوا بالهم قد إيه حياة ولادهم بتتدمر وهما عايشين وسطهم، وهما خايفين ومرعوبين ومش لاقيين مع أهلهم الأمان والحنان..
لو الدنيا وصلت للشتيمة والإهانة والضرب والرمي برّه الشقق اتطلقوا بدال ما نموت بحسرتنا وإحنا بنتفرّج عليكوا..

انفصلوا بهدوء بدال ما نفرّج على مشاكلنا اللي يسوى واللي ما يسواش!!

حجر الناس في المترو... طعمه وحش... وحييييش... حتى لو جبتوا
400 واحدة رقصوا بالبكيني في الإعلان برضه وحش...

• إعلانات زانوسي على خلوصي على مدام بوسي, حاجة كده تجيب
الضغط والسكر!!

• زهقنا من هالة فاخر في الإعلانات وصوت هالة فاخر في الإعلانات
وروح هالة فاخر اللي بترفرق على الإعلانات اللي لسه ما طلعتش
فيها..

• الشيف حسن والشيف شربيني عنصرين هدامين لأي منتج.. مش
بيضيفوا حاجة لأنهم بيستظرفوا لو طلغوا بشر زينا عاديين، قشطة..
ولو سمعنا يا جمالوو واللا يا تكاته يا حركاته ما تستغربش لو الفرن
اللي قدامك هبّ فيك... كل حاجة وليها حدود... زهقنا!!!!!!!!!!!!...

• جينة كيري ولا فاش كيري وطعمة وبريزيدون فيهم كالسيوم يخلي
ابنك يطلع ضرس العقل وهو عنده سنة..

• لازم أيّ موديل بتاكل مربّي أو حلاوة أو حتى مخلل ترفع كتافها لحدّ
السقف وتقوم ممم
يغمى عليها من فرط اللذة!!
كل ده عشان حلاوة..

عشان حلاوة يا مها!!

• إعلانات الشركة السعودية..

مش منطقي إن اللحاف الدايل فيس أبو خداديه الـ 8 قطع منه بـ
300 جنيّه!!

اللحاف بـ 37 جنيّه ونصّ يعني تمن كومبو من ماكدونالدز!!

• برفيوم لولوااا ده مش برفيوم بعطور عالمية... ده مجرد كحوّل متطايّر..
بـ 50 قرش تفتكر حاجة بخمسين قرش هتعمل إيه... ده كيس
الشيبسي بـ 5 جنيّه...

- جبنة دومتي عملنها الكوا بتفرد... العلبة هتفرد سندونشات ولادكوا الترم الأول كله.. مش هتحتاج علبة تانية إلا الترم الثاني.. مش قولتلكوا دومتي بتفرد...
 - الفرخة والبطة والكبسة اللي بتطلع في إعلان الشيف سرحان هما برضه اللي بتطلعوا في إعلان بدوية.. الفراخ نشفت من اللفّ على الأستوديوهات..
 - كيس مكرونة ستار الذهبية عمره ما هيكفي فيه يا كدابين.. ده بيكفي نفرين بالعافية!!
- الناس اللي بتعمل الإعلانات دي عايز تتشك في المينتاليتي بتاعتها بجدّ!!
وتتشق في ميدان عام عشان يكونوا عبرة وعظة ..

"سببيه نايم يا فوزية"

ما تصّحيش جوزك من النوم إلا لو :
- الأوضة اللي نايم فيها بتتهدّ رسمي فهمي نظمي، وأظن إن كلامي واضح لما قولت: "الأوضة اللي نايم فيها" يعني خلاص الحيطه هتتطبق على دماغه والأسمت هيدخل في بقه اللي مفتوح سبعة متر ده... لكن لو البيت نفسه

بيتهدّ وأوضته لسّه مجرلهاش حاجة سيبه نايم ..

- لو بتولدي وخلص شايفة نصّ جسم البيبي بعينك وكل المياه اللي حواليه نزلت... صحّيه، لأن الطلق بالنسباله تفاسيح ودلع فا ملوش داعي يقطع نومه عشان حضرتك جالك الطلق ...

لو قولتيله إصحى جالي الطلق، هيقولك يشرفّ ويانس وهيتقلب على الجنب الثاني وينفخ زي التنين مع شتايم بصوت مجلجل وبس كده !!

- لو في نيزك نزل عليكى وإنتي قاعدة على الكنبه ولقيتني كائنات فضائية بدأوا يتجولوا في الشقة ورايحين يبلعوا عبد الرحمن ابنك، ساعتها أنا اللي بقولك صحيه... لكن لو جايين يلعبوا بالطحال والبنكرياس ويمشوا خليه نايم.. ما تقلقيهموش ...

- لو في ماتش للأهلي أو ماتش لبرشلونه وريال مدريد أو ماتش بيلعب فيه محمد صلاح... صدّقيني يومك هيبقى مهبّب لو نسيتي تصحّيه ...

- لو لقيتني فار في بيتكوا قدّ العجل كده وبيجري وراكي إنتي والعيال ما تصحيهوش، لو عشر صراصير بتطير خليه مرتاح..

لو الموضوع دخل في تعاين وسحالي جربّي تصحّيه خصوصًا لو كان وسطهم أناكوندا !!

- لو ولدتني خلاص وربنا رزقكوا بملوكة حبيبة قلب مامي ولازم يلحق يشوفها قبل السبوع عشان ميقولكيش بنت مين اللي إنتي شايلها دي وسايباني لوحدي فا ممكن ساعتها تصحّيه على استحياء وخجل ..

- لو البوتاجاز هبّ في وشكّ وعندك حروق درجة أولى، وطبقتين من جلدك وقعوا فا كده ممكن تقوّميه بسّ بالراحة وبنبرة صوت حنينة وتقوليله "موووووودي

ممكن تصحى لحسن مش لاقية عيني في مكانها" وقولتلك تختاري نبرة الصوت دي لأن الموضوع مش مستاهل يصحى مفزوع.. ده قضاء وقدر، إيبيبه هنعترض على قضا ربنا!!! إنتي هتكفري بالله واللا إيه!!!!!!

- لو حرامي دخل عليكوا الشقة وخذك مطوة في وشكّ وسرق اللي سرقه واتكل على الله خلاص.. ملوش لازمة تقلقيه.. إحكيه لّمّا يصحى.. إوعى تصحّيه... نصيبكوا كده ..

- لو حدّ من صحابه على القهوة كلّمه على الموبايل، إنفضيه من مكانه كده
وصحّيه... صحّيه بعنف... صحاب القهوة دول بيتعملهم ألف حساب يا ماما ...
- لو إترفتي من الشغل ودخلتي في تريلا وإنتي مروّحة بعربيتك ما تصحيهوش..
وركزي في ضمير الملكية اللي في "عربيتك" عشان لو عربيته هو يبقى تلمي
هدومك وعلى بيت أمك، ما تفتكريش هيقولك خدت الشرّ وراحت... كنتي تغوري
إنتي بدالها ولا إن العربية تتخدش أو تصحّيه من نوم القيلولة اللي بيستمّر 18
ساعة ده !!

- إوعى تصحّيه لو جالكوا ضيوف حتى لو فضلوا مستنينه في الصالون خمس
ساعات... في داهية... خليه نايم بدال ما يطلعهم بالبيجامة وشعره منكوش..
استري نفسك يا شابة ..

أنا كمان عايزة أوضلكم حقيقة عن نوم الرجالة ...
الراجل لو غمّض عينيه وعدّيتي من واحد لتلاتة هتسمعي صوت شخيره بيهرّ
العمارة كلها ..

ودي ظاهرة احتار العلماء في كل العالم إنهم يعرفوا يفسّروها أو يشرحوا إزاي
بيدخلوا في غيبوبة النوم خلال ثانيتين ونصّ، واعتبروا الظاهرة دي من واحدة
عجائب الدنيا

فا بمجرد ما جوزك يقولك تصبّحي على خير، ده إن كملها فا هو كده في سكة
اللي يروح ميرجعش وهيتطبق عليكى كل الكلام اللي فوق ده... هو كده راح
ملكوت الرز باللبن والمهلبية واندمج ...

ونصيحة للسّتات لأن في ستات يا جماعة بيوصل بيها العبث إنها تصحّي جوزها
لو جالها شرخ في الجمجمة أو عندهم حالة وفاة !!!
... هتتعلقي مكان النجفة لحدّ ما بيانك صاحب ...
خليه نايم أكرملك

"بُوز الويك إند"

دي ظاهرة ما يعلم بيها إلا ربنا بتبدأ بالظهور يوم الثلاثاء وبتظهر أعراضها بوضوح يوم الأربعاء وبتطفح في وثننا يوم الخميس عشان النكد والبوز بين المتجوزين يبقى على أصوله من ليلة الخميس وتمتد ليوم الجمعة والسبت... يصاحبها تلايك وتلقيح كلام بدون أيّ سبب... وتنتهي بخناقات ملهاش ثلاثين لازمة... وعشان تفهموا قصدي أكثر... اتفضلوا معايا....

سيناريو الزوج النكدي

الجزء الأول

يوم الثلاثاء :

- مروة... يا مروة... ما عملتليش فطار ليه؟
☒ إنت بقالك 5 سنين بتفطر في الشغل يا إيهاب..
- طب قومي اعمليلي فطار، كبرت في دماغي إفطر في البيت..
☒ مالك يا إيهاب؟
- مالي؟ إيجنت؟ ما أنا عادي أهو... شايفاني بهوهو واللا بمشي على الحيطه؟
!!!
☒ براحتك.

- يعني إيه براحتك؟
☒ خلاص يا إيهاب... خلاص.
- خلاصين...3 خلاصات..

يوم الأربعاء :

- مرووووة... مرووووة... فين القميص الكحلي؟
☒ إنت حرقتة من السجارة ورميته بإيدك..
- حرقتة؟ وكننتي فين حضرتك لّمّا طفلي السجارة وقع على القميص؟
☒ إنت كنت ع القهوة يا إيهاب... أنا مالي؟ آجي أقعد معاكوا ع القهوة يعني؟
- نعم يا أختي!!! وتتلزقي في الرجالة؟ ليه؟ متجوزة سوسو؟!!! إيه الغلب اللي الواحد عايش فيه ده يا ربي؟!!!
☒ إيه يا إيهاب؟ مالك؟ إنت قرфан مني ليه؟
- ولا قرфан ولا زفت... إنتي قايمة تعملي إيه؟
☒ الفطار زي إمبرح..
- لا يا أختي... متشكرين... هتنيل في الشغل..

يوم الخميس :

- مرووووووووة.... مرووووووووة..... آخرة العطلة دي إيه؟ وانا أكل عيش وإنتي ولا دريانة بحاجة !!!
- ☒ نعم يا إيهاب... نعم..
- فين الفطار؟! هغنيها؟! أنزل على لحم بطني عشان ترتاحي؟
- ☒ مش قولتلي إمبراح مش عايز..
- إمبارح... مالنا وماله بقى!!! البيت بقى كله نكد وزهق وخرافات.... حرام عليك يا شيخة....
- ☒ خلاص هعمله أهو..
- ولا تعملي ولا تسوي... مش طافح.... إخربي على نفسك يا مروة... إخربي عشان ترتاحي !!!
- ☒ حرام عليك يا إيهاب!!! إنت جنتني... إنت عايز إيه؟! ...
- يوووووه هتعيطي وتقرفيني وترتني... طيبيب أنا هطلع من الشغل على القهوة.... شكله ويك إند مهيب عشان إنتي نكدية..
- ☒ أنا برضه... أنا مش عارفة أرضيك إزاي !!
- كمان مش عارفة ترضيني إزاي!!! مش بقولك بتخربي على نفسك.... أنا نازل... إبقى اتغدي لوحدة.. وخلي أمك تنفعك..
- ☒ إيه اللي دخل أمي دلوقتي؟
- هو في حدّ خاربهالنا إلا أمك.... ده أنا شايل ومعبي... ورزق الباب ومشبي ...

يوم الجمعة :

- مرووووواةةةةةة.... مروووووااااااةة..
- ☒ البيت ماله مش نضيف ليه?!!
- ما أنا بكنس أهو..
- ☒ وضافت بيكي الدنيا تكنسي وأنا قاعد..
- مش إنت اللي قولتلي أنصف يوم الجمعة عشان تشوف بنفسك بعمل إيه..
- ☒ ما إنت لو بتنضفي بذمة مكنتش قولت كده..
- وإيه ريحة الإريال دي..
- ☒ ده الغسيل..
- قال يعني النضافة مقطعة بعضها أوي... بلا خيبة..
- ☒ فين الفطار?!
- جاهز أهو..
- ☒ بايت يعني؟ طب أنا هروح أفطر عند أمي... وساييلك أم البيت اللي ريحته إريال
- ده.... يا مدام نظيفة ...
- تحبّ تخرج النهارده؟

"راحة البال نعمة"

محدّث بقى مرتاح ...
ده الإحساس اللي بقى ماشي بيننا دلوقتي ..
اللي في بلده مش مرتاح.. اللي برّه مش مرتاح... اللي مش معاه تعبان واللي
معاه تعبان برضه ..
اللي اتجوّز واللي لسّه نصيبه مجاش ..
اللي عنده ذرية دماغه بتودّي وتجيّب، واللي ربنا ما كتبها لوش دماغه بتودّي
وتجيّب ...
اللي مش لاقى شغل واللي بيشتغل شغلانتين.. كله في حاجة مش فاهمها
بيحسّ بيها جوّاه ..
تعدّدت الأسباب واختلّت المستويات والمعايير وتبقى عدم الراحة القاسم
المشترك بين الجميع ...
طلعت الراحة اللي بجدّ مش في الفلوس ولا الرّاحة بالرّفاهيات اللي حوالينا...
طلعت إحساس من جوّاك مش عارفه تفسير مع إنك فكّرت فيه كثير ...
يعني أعلى نسب للانتحار في سويسرا اللي هيّ فيها أعلى نسبة مستوى
معيشة للفرد ..
كنت شوفت من فترة فيديو لواحد في سويسرا راح عيادة مخصصة للانتحار ..
دي اللي عايز ينتحر بيروح فيها وبيمضي على إقرار أنه عايز ينتحر ويبدّوله حقنة
بيدأ مفعولها بعد كام دقيقة بيروح بعدها في النوم وبعدها يموت ...
وكانت قاعدة جنبه مراته و ماسكة ايده لحد ما مات !!
طبعاّ الانتحار حرام والشاهد الوحيد من الفيديو ده إن عدم الراحة غير مرتبط
بماديات أو أسلوب معيشة لأنك ممكن تكون عندك كل السبل للراحة بس مش
مرتاح برضه لأسباب جوّاك إنت بس ...
لما ربّنا سبحانه وتعالى قال: "لقد خلقنا الإنسان في كبد"، كان ده أدقّ وصف إن
الحياة الدنيا كلها تعب ومشقة وإن الرضا نعمة ما بعدها نعمة ومش حاجة سهلة
تتزرع في قلوب البشر بالعكس؛ إن الإنسان يرضى بتقلبات الدنيا وابتلاءاتها فا
دي درجة عالية من الإيمان مش أي حدّ يوصلها... والأصعب كمان الرضا بتوزيع
الأرزاق من غير مقارنات، والتيقن إن ده الخير لينا طالما بنعمل اللي علينا ..
الإنسان بوجه عام خلق في كبد وصراع باختلاف الدول والمدن اللي بيعيش
فيها. باختلاف النعم اللي عنده لأن الإنسان دايمًا عايز الأكثر والأحسن، ولو كان
في ناس مرتاحة طول حياتها حتى مماتها كان ربنا سبحانه وتعالى ذكر تخصيص
للإنسان دي، لكن ربنا عز وجل ذكر إن المشقة دي هيقابلها كل إنسان وأي
إنسان لأن لا توجد جنة على وجه الأرض ..

تقريبًا إحنا مش مرتاحين عشان مركزين أوي في دنيتنا وحياتنا وعمالين نجري ونجري وراها بدون تفكير.... إزاي نجيب فلوس عشان ندخل مدارس ونشترك في نوادي ونسافر ونروح ونيجي وفي المقابل متهاونين في كل العبادات... ولو صلينا الصلاة اللي هي عماد الدين في ناس تقولك: "يا عم ده طلع بيصلي كمان" اللي هو بيعمل معجزة !!

قال تعالى: ((وَمَنْ أَعْرَضَ عَن ذِكْرِي فَإِنَّ لَهُ مَعِيشَةً ضَنْكًا وَنَحْشُرُهُ يَوْمَ الْقِيَامَةِ أَعْمَى * قَالَ رَبِّ لِمَ حَشَرْتَنِي أَعْمَى وَقَدْ كُنْتُ بَصِيرًا * قَالَ كَذَلِكَ أَتَتْكَ آيَاتُنَا فَنَسِيَتْهَا كَذَلِكَ الْيَوْمَ تُنْسَى)) صدق الله العظيم ..

أظن كده السبب بقى واضح، والسبب واضح من البداية بس الدنيا فعلاً بتلهي، والإنسان نفسه أمارة بالسوء ولازم نجاهدها..

مش معني كلامي ندّي الدنيا ضهرنا لكن نعمل اللي علينا في الدنيا ونعمل لآخرتنا، وأظن ساعتها إحساس عدم الراحة ده هيختفي تدريجي لأننا هنبقى إدينا كل حاجة قدرها ..

" اللهم لا تجعل مصيبتنا في ديننا، ولا تجعل الدنيا أكبر همّنا، ولا مبلغ علمنا، ولا تسلط علينا من لا يرحمنا .."

اللهم ارزقنا الرضا والقناعة والرضا بقضائك وقدرك

يا رب ارزقنا حمدك في السراء والضراء ...

يا رب قوينا ...

اللهم لك الحمد كما ينبغي لجلال وجهك وعظيم سلطانتك ..

*

"الشوبينج مع أحباب الله"

- * عليّ.. ملك... إحنا هندخل المحلّ ما تعملوش شقاوة عشان تبقوا مؤدبين
وماما تجبلكوا حاجة بتحبّوها ...
- صوت صرصور الحقل وعنيهم بتبظّ على البلاوي اللي هي عملوها ...
◻ مدام... ممكن بعد إذّك تخلي ابنك ما يقطعش تيكيت الأسعار ..
* حاضر أنا أسفة..
◻ مدام ممكن تخلي ابنك ما يفتحش البروفة على الناس اللي في الـ fitting room
* أسفة والله..
◻ مدام ابن حضرتك بيمسح بالبلوفرات الأرض!! مش هينفع كده؟
* أسفة..
◻ مدام بنت حضرتك رجّعت على فستان سواريه.. ممكن تحاسبني عليه عند
الكاونتر؟
* حاضر... جاية... أسفة جدّا..
◻ مدام.. بنت حضرتك لبست جيبة ودماعها وألف جزمة ما تقلعها... حضرتك
هتاخديها؟ بس هو مقاس إكس لارج على فكرة !!!
* معلش، أنا أسفة ...
◻ مدام.. ابنك كسر دراع المانيكان عشان إداله شلوت..
* أسفة، حقّك عليّا..
◻ مدام.. ابنك وبنّتك بيستخبوا جوّا الهدوم ومسحوا مناخيرهم في كلّ الجواكت ..
* سامحني... أسفة..
◻ مدام.. ابنك وبنّتك بيلعبوا خلاويص لسه، وصوتهم شغلّ أجهزة الإنذار .. أرجوكي
ما تعملوليش مشاكل أكثر من كده!!
* أسفة..
◻ مدام ابنك قطعّ زرار بنطلون وداخل على الثاني.. هو عنده عقدة من الزراير؟
* والله ما أعرف، بس أسفة ..
◻ مدام بنّتك بتاخذ الهدوم في الشوبينج باج وبتطلع بيها برّة المحلّ... حضرتك
حرامية؟
* لا والله.. أسفة جدّا!
◻ مدام ابنك وابن واحدة بيلعبوا كراتيه وسحلوا بعض على الأرض .. والزباين مش
عارفة لا تدخل ولا تخرج!!

* آسفة..
☒ مدام.. ممكن تاخدي عيالك وتغوروا من أمّ المحل.. بسرعة....
بسسسرررررعاااa

"أبنائي الأعزاء.. شكرًا"

- عن تحوّل العيد من الخروج مع شلة صحاب للخروج مع عيلتك الصغيرة ..
- بدل ما تروحو كافيه وعادي لو فيه شيشة أو مدخين لمكان لازم يكون فيه kids area ولازم non-smoking عشان الولاد ..
- لازم تعجبهم الكيدز مينيو قبل ما تقولوا إن المطعم ده حلو وهتقعدوا فيه ...
- بتسألوا على الـ coloring book قبل ما تبلوا ريقكوا بشوية مياه ..
- بدل ما تدخل فيلم أكشن أو رومانسي حفلة نص الليل، تدوروا على finding Dory أو The jungle book ويكون D 3 عشان الولاد تتبسط... والحفلة تكون عزّ الض عشان ما يناموش منكوا ..
- بعد ما كان العيد لبس جديد ليك بقى مش مهم ليك والمهم لولادك عشان تشوف الفرحة في عنيهم ...
- بعد ما كنت بتاخذ العيدية بقيت إنت اللي بتديها ...
- بقيت بتوعدهم اللي هتجيلها Elsa واللي هتجيله spiderman أول يوم العيد عشان نفسهم فيها ..
- بقيت بتشغل في العربية ماما زمانها جاية وأنا إبريق الشاي و five little momkeys والعجيب إنك بتدندن معاهم ومش متضايق ..
- بعد ما كنت بتخرج مع أيّ حدّ بقيت بتدور على عيلة ولادهم في سن ولادك عشان يعرفوا يلعبوا سوا
- بقيت بتقضي نصّ الخروج رايح جاي على التواليت واتعودت على كده ..
- إنك تحاول تنهرب من شكولاتة كيندر جوي اللي متنطوة في المول، ومن

أكشاك الكانديز اللي مرشقة في المول كإنك بتفادي تريلا وإنّ على سرعة 180
- بقيت بتروح أماكن مش على كيفك عشان هما يتبسّطوا ...
- بقى عندكوا لعب ماكدونالدز "الهابي ميل" ممكن تملي دولاب النيش ..
- بقيت تروح كيدزانيا وتعيش معاهم إنهم طبّاخين ورسامين ومذيعين وبتصورهم
100 صورة ..

- إنك تبقى شايل كروت الملاهي في المحفظة وخايف عليها زي كروت الفيزا
والـ ATM بالظبط ..
- بقيت بتشاور باي باي 500 مرة عشان تحسّس ولادك إنك مندمج معاهم ...
- بقيت بتطلب عصير فريش عشان ما يقلدكوش ويشربوا بيبسي ...
- بقيت بتفكر فيهم قبل ما بتفكر في نفسك إنت ومراتك ...
- بقى المهم إنهم اللي يتبسّطوا حتى لو بتقفوا طول الخروجة على المراجيح
والزحاليق أو حتى لو طول سفرك بتحمّي وتلبّسي وتغيّري وتأكلي عشان الولاد
بيحبوا البيسين ...

السعادة بقت إنك تشوف ضحكتهم وهما مبسوطين حتى لو إنتي وجوزك
مسحولين ومتبهدين ودافعين اللي وراكوا واللي قدّامكوا ..
السعادة بقت هماً 😊

الفرحة بقت بتتشاف في عنيتهم.. مش في أيّ حاجة تانية ..
احمدوا ربنا على الذرية وادعوا إنها تكون سالحة، إن شاء الله.

"ملحوقه على إيه؟"

في شهر العسل :
أحمد: بصّي يا بنت الجلال، بدال إتجوزتيني طلباتك كلها مُجابهة وإنّتي قاعدة في
البيت معزّزة مكّرمه... أيّ حاجة تعوزيها قوليلي ...
بعدها بشهر :
* أحمد... حبيبي... الحنفية بتنقّط جامد ممكن تنادي السّبّاك ...
- من عنيا..

بعدها بشهرين :

* أحمد... حبيبي... ممكن التجار بس لحسن الكرسي اتكسر ...
- طيب..

بعد 6 شهور :

* أحمد.. السخان بايظ بقاله أسبوع... ممكن نصلحه... واللا أكلم السباك؟
- لا طبعًا أنا هجيبه.. إنتي إتجننتي, تكلمي مين وأنا موجود؟

بعد سنة :

* أحمد السخان بايظ بقاله 6 شهور وحرام مايا تستحمي بمياه ساقعة تلج وهي
مكملتش 10 أيام ...

- ما قولنا طيب... المياه الساقعة دي مناعة على فكرة ...

بعد 3 سنين :

* أحمد... عايزة أحمي عمر ومايا والسخان بايظ بقاله 3 سنين!!! حرام عليك
العيال بتزرق مني من السقعة... دول يقوا لون غطا القلم البيك يا أخي !!!
- مش قولتلك حاضر يا مها... بطلي زن بقي... زهقتيني.. أكيد زمانهم اتعودوا
عليها... ما تحبكيهاش ..

بعد 30 سنة

* ياااااأحمد "كح كح كح" البت مايا جاية هي وولادها والعيال بتموت من السقعة
لما بيدخلوا الحمام هنا وبننت عمر حرمت تيجي تبات عندنا في الشتا عشان
السخان بايظ... وأنا الروماتيزم بقي بينخور في عضمي من الميه المتلجة دي....
أكلم أنا السباك بقي؟

- ما پس بقي يا مها، أسكتي بقي وبطلي أم الزن ده... قولتلك هصلحه...
هصلحه.... اصبري شوية... الدنيا مطارتش... ياااااااي عليك يا وليه ... ده إنتي
تزهقي بلد!!

بعد 50 سنة ...

* أحمدتش... هقولك وصيتي قبل ما أموت... كح كح كح... ناولني دوا السل...
شكلي هموت والله... أحمدتش أبوس إيدك مع إن معادش فيا صحة... إوعي
تغسلوني بمياه ساقعة... أبوس إيدك إرحمني على الأقل وأنا ميتة... مياه
ساقعة تلج لا يا أحمدتش... كح كح كح ...

* يخرب بيتشك يا وليه... لسه فيكي حيل تزني... قلبي قلبي قلبي... شكلي
هموت من زنك يا بعيدة... ما قولنا هصلحه... إهمدشي بقي ...

قولنا هجيبه حاضر... كح كح... بس غالبًا عم فرغلي السباك كانت جنازته
الجمعة اللي فاتتش... هدورلك على سباك تاني... اصبري بقي شوية... ما
تصربعيناش بقي .. إهيبييه!!